

Dato: 10. juni 2017

Kontor: Nordatlantenheden

Sagsbeh: Nikolaj Jagd Sørensen

Sagsnr.: 2014-731-0039

Dok.: 2168141

Kalaallit Nunaani pinerluttulerinermi inatsisip aamma Kalaallit Nunaanni
eqqartuussisarnermik inatsisip allangortinneqarnissaat pillugu
inatsisissatut
(kinguaassiuutitigut pinerluttarnerit il.il.)

siunnersuummut

missingiut

§ 1

Kalaallit Nunaanni pinerluttulerinermik inatsimmi, inatsit nr. 306 apriliip 30.-anni 2008-meersumi, inatsit nr. 735 juunip 25-ani 2014-imi § 1-ikkut, inatsit nr. 103 februaarip 3.-anni 2016-imeersumi § 4-kkut aamma inatsit nr. 149, februaarip 7-anni 2016 imeersumi § 2-kkut, allangortinneqartumi, allanguutit makku ivertinneqassapput:

1. Inatsisip ilaani tamani ”kujannittoq allatulluunniit kinguaassiuutitigut atoqatiginnittoq” allangortinneqassaaq: ”kujannittoq allatulluunniit ittumik kinguaassiuutitigut atoqatiginnittoq”-

nngorlugu«.

2. § 74-imi oqaaseqatigiit aappaatut ivertinneqassaaq:
” ilaqquttamik qanigisamik kujanninneq allatulluunniit ittumik kinguaassiuutitigut atoqatiginninneq pineqartillugit qitornavissiaqarneq toqqaannartumik aaqatigiittut pissuseqarnermut nallersuunneqassaaq.”
3. § 77, imm. 1, nr. 1-imi ”kujannittoq allatulluunniit kinguaassiuutitigut atoqateqartoq” allanngussaaq imatut: ”allatut kinguaassiuutitigut atoqateqartoq,”
4. § 77, imm. 1, nr. 2-mi ”inummik katissimanngisamik” peerneqassaaq, ”akerlileeriarsinnaanngitsumik” kingorna ilanngunneqassaaq ”soriarsinnaanngitsumilluunniit”.
5. § 77, imm. 1, nr. 3-tut ilanngunneqassaaq:
»3) meeqqamik 12-it inorlugit ukiulimmik kujannittoq imaluunniit kinguaassiuutitigut allatut atoqateqartoq.«
6. § 77, imm. 2-mi ”allatulluunniit kinguaassiuutitigut atoqatiginnittoq” allanngortissaaq imaalillugu: ”kinguaassiuutitigut allatut iliuuseqartoq”.
7. § 78, imm. 1-imi allanngortinneqassaaq: »pineqartumik katissimanani kujannittoq allatulluunniit kinguaassiuutitigut atoqatiginnittoq.« imaalillugu: »pineqartumut kujannittoq allatulluunniit kinguaassiuutitigut atoqatiginnittoq.«
8. § 78, imm. 2-mi ”atorfimminik imaluunniit aningaasatigut pingitsuuisinnaanngneranik ... katissimanngisaminik kujannittoq allatulluunniit kinguaassiuutitigut atoqatiginnittoq:” allanngussaaq ilaalillugu: ”suliaqarnikkut, aningaasaqarnikkut imaluunniit passunneqarnermik paaqqutarineqarnermilluunniit pinngitsuuisinnaanngissusianik ... kujannittoq allatulluunniit kinguaassiuutitigut atoqatiginnittoq”.
9. § 78, imm. 3, imatut allanngortinneqassaaq:
” Imm. 3. Aammataaq eqqartuunneqassaaq, inuk
 - 1) pinerluttunik nakkutilliivimmi atorfeqartuusooq inummik pinerluttunik nakkutilliiviup suliffiutaani inissisimasumik, tassumanngalu oqartussaaffigineqarluni inissisimasumik kujannittoq imaluunniit atoqatiginnittutut iliuuserinnittoq,
 - 2) inummik kiffaanngissusiiagaasumik politiinillu nakkutigineqartumik politiitut atorfilik kujannittoq imaluunniit allatut atoqatiginnittutut pissusilersortoq, imaluunniit
 - 3) ulloq unnuarlu paaqqinnittarfimmi imaluunniit meeqqanut inuusuttunullu inissiisarfimmi, tarnikkut nakorsarneqarfittut immikkoortumi, tarnikkut annertuumik innarluutilinnik assigisaannillunjniit ulloq unnuarlu inissiisarfimmi atorfilik imaluunniit nakkutilliisoq inissiisarfimmi inissisimasumik kujannittoq imaluunniit allatut atoqatiginnittutut pissusilersortoq.”
10. §§ 79-imi 81-milu ”kinguaassiuutitigut atoqatiginnittoq” allanngussaaq imatut: ”atoqateqarnikkut pissusilersortoq”.

11. § 79-imi ” mianersuaalliorluni iliorsimalluni” allanngortinneqassaaq imatut:”
mianersuaalliorsimaguni, iliuuserisaq § 77, imm. 1, nr. 3-mut attuumatinneqanngippat”.
12. § 80, imm. 2-mi ”qitornavissiarisaminik, ” peerneqassaaq.
13. § 81-imi imm. 2-tut ivertinneqassaaq:
” Imm. 2. Taamattaq eqqartuunneqassaaq inuk peqataasoq inuup 18-it inorlugit ukiullip akilersilluni imaluunniit akilersinnissamik neriorsorneqarluni akiliisumut atoqateqarnikkut pissusilersorneranut, iliortuusup ilisimappagu pineqartup ukioqqortussusia imaluunniit tamatumunnga tunngatillugu mianersuaatsumik iliorsimaguni.”
14. § 82 imatut oqaasertaqassaaq:
”§ 82. Inummik inuusuttumik atornerluisimasutut eqqartuunneqassaaq inuk peqataasoq, inummik 18-it inorlugit ukiulimmik ilaatitsisoq pornografiimi isiginnaagassioqataanermut, iliortuusup ilisimappagu pineqartup ukioqqortussusia tamatumunngalu tunngatillugu mianersuaatsumik iliorsimaguni.
Imm. 2. Taamattaq eqqartuunneqassaaq inuk imm. 1-imi inuup 18-it inorlugit ukiullip peqataaffiani takutitsinermi isiginnaartuusooq.”
15. § 83 imatut oqaasertaqassaaq:
”§ 83. Iluanaarniutigalugu arnerisitsisutut/anguserisitsisutut eqqartuunneqassaaq inuk suliffimmik ingerlatsisoq, inuk alla akiliilluni imaluunniit akiliiumalluni neriorsuinikkut pisisuusooq atoqatigiinnertut pissusilimmik.
Imm. 2. Taamatut pineqassaaq allatigut atuisuusooq inuk alla inuussutissarsiutigalugu akiliisitsinikkut imaluunniit akiliinissamik neriorsuinikkut pisisumik allamik atoqateqarnermik iliuseqartitsisoq, imaluunniit ajornarunnaarsaasoq inuup allap akiliilluni inummik allamik atoqateqarnermik iliuseqaneranut iluanaarniarnikkut imaluunniit akulikinnerusumik uteqattaartumik akunnermiliuttutut pissusilersorneranut.
Imm. 3. Aammattaq eqqartuunneqassaaq inuk akunnittarfimmi inimik atukkiussisoq inuup allap inuussutissarsiutigalugu akiliilluni imaluunniit akiliinissamik neriorsuuteqarluni pisisumik atoqateqartitsippat.
Imm. 4. Taamattaq eqqartuunneqassaaq inuk inatsisinut akerliususumik paatsoortitsilernermit, paatsuinermik sakkortusisitsinermit atornerluinermigulluunniit, imaluunniit assuarnartumik periuseqarluni alla akiliiffigitilluni imaluunniit akiliiffigineqarnissamik neriorsorneqarluni pisiumasumik atoqateqartitsitsoq.”
16. § 84, imm. 1-imi ”kannguttaalliorluni iliuseqarluni kannguttaalliorfiginnittoq”
allanngortinneqassaaq imatut: ”inoqatiminut kannguttaalliorfiginnittoq”, aamma ”imaluunniit inunnik mamiatsatsitsisoq” atorunnaarpoq.
17. § 85, imm. 1, 2 aamma 4-mi ”kinguaassiuutitigut inuunerlunnermut tunngasunik” allanngussaaq imaalillugu: ”pornografiskiusunik”.
18. § 85, imm. 2-mi ”takusassianik”-ip kingornagut tapiliunneqassaaq: ”imaluunniit internetikkut assigisaatigulluunniit paasissutissanik siammarterinikkut”.

19. § 85, *imm. 3* imatut oqaasertaqassaaq:

”Imm. 3. Imm. 2-mi aalajangersakkamut ilaanngillat inunnik 15-inik ukioqalereersimasunik assilisanik, filminik assigisaannilluunniit pigisaqarneq, pineqartoq pigisaqarnermut akuersisimatillugu.

20. § 85, *imm. 4-mi* ”siunertaralugu” -p kingorna uiggiunneqassaaq: ”, iliortup pineqartup ukioqqortussusia ilisimappagu tamatumunngalu tunngatillugu mianersugaalliorluni iliuuseqarsimaguni.”

21. § 93, *stk. 1, nr. 5-imi aamma imm. 2-mi* »kinguaassiuutitigut assuarnartumik pissuseqarneq« allanngartissaaq imaalillugu: »akissarsiutigalugu atortittarneq, assilisanik filminilluunniit pornografiskiusunik, pornografiskimik pissusilersornermik isiginnaartitsineq”

§ 2

Kalaallit Nunaanni eqqartuussisarnermik inatsimmi, tak. inatsisitut nalunaarut nr. 1581, 13. december 2016-imeersoq, inatsit nr. 149, 7. februar 2017-imeersut allanngartinneqartumi § 1-ikkut allanngartinneqartumi tulluuttumik allannguisoqassaaq:

1. § 333, *imm. 1-imi* ”§§ 91, 92” allanngartinneqassapput imatut: ”§§ 91-93”.

§ 3

Inatsit atortussanngartinneqarpoq ulloq [...]

Inatsisissatut siunnersuummut oqaaseqaatit

Oqaaseqaatit nalinginnaat

Imarisai

1. Aallaqqaasiut
2. Kujanninneq aamma kinguaassiuutitigut allatut atoqateqarnerit
 - 2.1. Inatsisit atuuttut
 - 2.2. Justitsministeriamit isumaliutersuutit aamma aaqqissuussineq siunnersuutigineqartoq
3. Qitornavissianik kinguaassiuutitigut atoqateqarnerit
 - 3.1. Inatsisit atuuttut
 - 3.2. Inatsisinik Atuutsitsinermut Ministereqarfimmit isumaliutersuutit aamma aaqqissuussineq siunnersuutigineqartoq
4. Pinngitsaaliilluni atoqateqarneq
 - 4.1. Inatsisit atuuttut
 - 4.2. Inatsisinik Atuutsitsinermut Ministereqarfimmit isumaliutersuutit aamma aaqqissuussineq siunnersuutigineqartoq
5. Atornerluineq
 - 5.1. Inatsisit atuuttut
 - 5.2. Inatsisinik Atuutsitsinermut Ministereqarfimmit isumaliutersuutit aamma aaqqissuineq siunnersuutigineqartoq
6. Akilersillutik atortittartut 18-it inorlugit ukiullit
 - 6.1. Inatsisit atuuttut
 - 6.2. Inatsisinik Atuutsitsinermut Ministereqarfimmit isumaliutersuutit aamma aaqqissuineq siunnersuutigineqartoq
7. Pornografiitut takutitassaliat

7.1. Inatsisit atuuttut

7.2. Inatsisinik Atuutsitsinermit Ministereqarfimmit isumaliutersuutit aamma aaqqissuussineq siunnersuutigineqartoq

8. Arnerisitsineq/anguserisitsineq il.il.

8.1. Inatsisit atuuttut

8.2. Inatsisinik Atuutsitsinermit Ministereqarfimmit isumaliutersuutit aamma aaqqissuussineq siunnersuutigineqartoq

9. Kannguttaalliorfigisaaneq

9.1. Inatsisit atuuttut

9.2. Inatsisinik Atuutsitsinermit Ministereqarfimmit isumaliutersuutit aamma aaqqissuussineq siunnersuutigineqartoq

10. Meeqqat pornografiliarineqartarnerat

10.1. Inatsisit atuuttut

10.2. Inatsisinik Atuutsitsinermit Ministereqarfimmit isumaliutersuutit aamma aaqqissuussineq siunnersuutigineqartoq

11. Kinguaassiuutitigut atonerluiniarluni inunnik niuffateqartarnek

11.1. Inatsisit atuuttut

11.2. Inatsisinik Atuutsitsinermit Ministereqarfimmit isumaliutersuutit aamma aaqqissuussineq siunnersuutigineqartoq

12. Inunnik niuffateqarnermik suliani illersuisut

12.1. Inatsisit atuuttut

12.2. Inatsisinik Atuutsitsinermut Ministereqarfimmit isumaliutersuutit aamma aaqqissuussineq siunnersuutigineqartoq

13. Pisortanut aningaasaqarnikkut allaffissornikkullu kinguneri

14. Inuussutissarsiortunut il.il. aningaasaqarnikkut allaffissornikkullu kinguneri

15. Innuttaasunut allaffissornikkut kinguneri

16. Avatangiisinut kinguneri

17. EU-mi inatsiseqarnermut pissutsit

18. Oqartussat aamma suliniaqatigiiffiit il.il. tusarniaavigisat

19. Eqitikkatut immersugaq

1. Aallaqqaasiut

1.1. Kalaallit Nunaanni pinerluttulerinermik inatsisip kinguaassiuutitigut pinerluttarnermut tunngasunik malittarisaa pingaarnertut siunertaraat atoqateqartarnermik kiffaanngissutsip namminerlu aalajangiisinnaanerp illersornissaat. Taamaattumik malittarisat nalitsinnut naleqquttuunissaat maannalu inuiaqatigiisunut naapertuunissaat pingaartuuvoq.

Atoqateqartarnermut tunngasunik pinerluttuliornerit pillugit malittarisat pinerluttulerinermik inatsimmi kapitali 18-imiipput, inatsisillu 2010-mi atuutilerneraniilli allanngortinneqarsimanatik.

1.2. Danmarkimi 2013-imi – Pillaasarnermik Inatsit pillugu Siunnersuisoqatigiit kinguaassiuutitigut tunngasunik pinerluttarnerit pillugit isumaliutissiisutaat nr. 1534/2012 aallavigalugu – pillaasarnermik inatsisip kinguaassiuutitigut pinerluttuliornerit pillugit malittarisaaani annertuunik allannguisoqarpoq.

Kalaallit Nunaanni Eqqartuussisarneq pillugu Siunnersuisoqatigiit tamatuma kingorna 2013-imi

ataatsimiinnerminni aalajangerput allannguutit tamakku pinerluttulerinermik inatsimmut attuumassusiat nalilersorneqassasoq.

Tamanna tunngavigalugu allannguutinit taakkunanga suut Kalaallit Nunaannut naleqqussinnaanersut pillugu allattuiffik Inatsisinik Atuutsitsinermut Ministereqarfimmit 2014-mi suliarineqarpoq, Kalaallit Nunaannilu Namminersorlutik Oqartussat tamatumunnga isummeqqullugit qinnuigineqarlutik. Allannguutit amerlanersaat allattuiffimmut ilaapput, kisiannili pillaatit uuttorneqartarnerinut suliallu nutaangilisoornerinut killigititanut allannguutit ilaanatik.

2016-imi Kalaallit Nunaanni Namminersorlutik Oqartussat nalunaarput, Inatsisinik Atuutsitsinermut Ministereqarfimmit naliliinerit taperserlugit.

Kalaallit Nunaanni Eqqartuussisarneq pillugu Siunnersuisoqatigiit 2016-imi ataatsimiinnerminni aalajangerput kinguaassiuutitigut pinerluttarnerit pillugit Kalaallit Nunaanni inatsisit danskit inatsisaasa sapinngisamik annerpaamik assigisariaqaraat. Taamaakkaluatorli Kalaallit Nunaanni pissutsit immikkut ittut atuuffiini tamanna atuutinngilaq, soorlu pillaasarnermut killigitassat aamma suliat nutaangilisoornerinut killigitat pinerluttulerinermik inatsimmi imaritinneqanngimmata.

1.3. Inatsisissatut siunnersuut manna tamanna tunngavigalugu siunertaqarpoq kinguaassiuutitigut pinerluttarnernut malittarisat tamanut atuuttumik nutaangorsassallugit pingaartumillu aallaavigissallugit allannguinerit danskit pillaasarneq pillugu inatsisaanni inatsit nr. 633 juunip 12.-ani 2013-imeersukkut atulersinneqartut.

Inatsisissatulli siunnersuutip aammattaaq aallaavigai pillaasarneq pillugu inatsimmi allannguutit inatsit nr. 319 apriliip 28-anni 2009-meersukkut atulersinneqartut, aamma meeqqat kinguaassiuutitigut atonerlunneqarnissamut aamma atoqatigiinnikkut atonerlunneqarnissamut illersorneqarnissaat pillugu Europarådip isumaqatigiissutaata danskinit atortussanngortinnissaata pisinnaalersinniarnernik siunertaqartut.

Inatsisissatut siunnersuut makkuninnga pingaarnertut immikkuualuttoqarpoq:

Pinerluttulerinermik inatsimmi oqariaaseq ”kujanninneq” siunissami aamma iteruilluni kujanninnertut (inuit suaassutsimikkut assigiinngitsut aamma suaassuseqatigiit akornanni) paasineqassasoq, aamma oqariaaseq ”allatigut kinguaassiuutitigut atoqatigiinneq” (aammattaaq ”atoqatigiinnikkut allatigut pissusiliorneq”-nngorlugu allanngortinnissaa siunnersuutigineqartoq) siunissami inuit suaassutsimikkut assigiinngitsut assigiillu akornanni atoqatigiinnerit pineqartassasut. Tamanna tunngavigalugu pinerluttulerinermik inatsimmi § 82-imi suaassuseqatigiittut atoqatigiinnerit pillugit aalajangersagaq immikkut ittoq atorunnaarsinneqassasoq siunnersuutigineqarpoq.

Siunnersuutigineqarpoq pinerluttulerinermik inatsisip § 74-iani aaqatigiittut eqqarleriinni

atoqatigiittarnerup pinerlunnertut isigineqarnera annertusineqassasoq ilaqqatut siuleqatigisat qitornavissiarineqartarnerannuttaaq tunngalersillugu. Taassumallu kingunissaatut siunnersuutigineqarpoq aalajangersagaq meeravissianut, qitornassanut, meerarsianullu 18-it inorlugit ukiulinnut kinguaassiutitigut atoqateqarneq innersuussutigineqartoq peerneqassasoq.

Siunnersuutigineqarpoq pinerluttulerinermik inatsisip § 77-iani pinngitsaaliilluni atoqateqarneq pillugu aalajangersagaq annertusineqassasoq atoqateqartarneq atonerluinikkut, pineluffigineqartoq inissisimatillugu iliorfigineqarnermut akertilissalluni pisinnaanani, aamma ilanngunneqassasoq meeqqanik 12-t inorlugit ukiulinnik atoqateqartarneq. Tamatuma kinguneranik pissuseq taaneqartoq kingulleq pinerluttulerinermik inatsisip § 79-iani meeqqanik atoqateqartarnermut tunngasumut ilaatikkunnaarlugu.

Siunnersuutigineqarpoq pinerluttulerinermik inatsisip §§ 77-iani 78-iannilu inerteqqut atuuttoq atoqateqatiginnittarnermik pinerluffigineqartup imminut ikiorsinnaanginneranik imaluunniit tarnikkut nappaateqarneranik imaluunniit isummakkut pissutsimigut kinguarsimasumik atonerluineq aamma atoqateqarniartarneq sulinikkut imaluunniit aningaasatigut pinngitsuuisinnaangissutsimik annertuumik atonerluinikkut annertusineqassasoq ilanngullugu aappariinerup iluani atoqatigiinnikkut pissuseqatigiinneq aamma ilanngullugu.

Siunnersuutigineqarpoq nutaatut pinerlunnertut isigineqalissasoq atoqateqarniartarneq passusinikkut sullissinikkullu pinngitsuuisinnaanginnermik annertuumik atonerluineq.

Siunnersuutigineqarpoq inerteqqummut atuuttumut allanguutit arlallit pinerluttulerinermik inatsimmi § 78, imm. 3-mi angerlarsimaffigititani aalajangersimasuni sulisut inissisimasullu akornanni kujanneqquusaanginnermut tunngasoq.

Siunnersuutigineqarpoq pinerluttulerinermik inatsimmi § 81-imi, inerteqqusiisumi inuk 18-it inorlugit ukiulik akilersilluni akiliinissamillunniit neriorsortilluni pisiniamut atoqateqartoq, iliortup pineqartup ukioqqortussusia ilisimagaangagu imaluunniit tamatumunnga tunngatillugu mianersuaalliorluni iliuuseqarsimasuni, ilanngunneqassaaq tamatumunnga pisooqataanermik aalajangersagaq.

Siunnersuutigineqarpoq aalajangersakkamik nutaamik ivertitsisoqassasoq, tamanna tunngavigalugu pinerlunnertut isigineqalissasoq peqataaffigisimagaani inuk 18-it inorlugit ukiulik pornografiskimik takutitsinermut ilaatillugu, iliortup ilisimasimappagu pineqartup ukioqqortussusia imaluunniit tamatumunnga tunngatilugu mianersuaaliortutut iliuuseqarluni. Aammattaaq siunnersuutigineqarpoq pinerlunnertut isigineqalissasoq taamatut takussutissiinernut isiginnaaqataaneq.

Siunnersuutigineqarpoq pinerluttulerinermik inatsimm § 83-imi arnerisitsinermut / anguserisitsinermut aalajangersagaq atuuttoq nutaamik allaganngortinneqassasoq, taamaalilluni arnerisitsineq / anguserisitsineq ilaalersillugu suliffiteqarnermut inuup allap akiliilluni imaluunniit akiliinissamik neriorsuilluni pisiniamut atoqateqartitsinernut. Siunnersuutip pingaartumik

kingunerissavaa arnerisitsinerup/anguserisitsinerup kisiat ilaginngimmagu illumi akissarsiutigalugu arnerisitsineq/anguserisitsineq, aammali imerniartarfinni akissarsiutigalugu atortittarneq, akissarsiutigalugu qaniortittarneq aamma aqqusinermiit akissarsiutigalugu atortittarneq.

Siunnersuutigineqarpoq pinerluttulerinermik inatsimmi § 84 kannguttaatsuliorfigisaanermut tunngasoq paasiuminarsarlugulu oqaasertamigut nutarteriffigineqassasoq.

Siunnersuutigineqarpoq meeqqanik pornografiimi atugassianik pigisaqarnissamik pinerluttulerinermik inatsimmi § 85, imm. 2-mi inerteqqut annertusineqassasoq aamma ilagitilerlugit pisut inuup piaaraluni meeqqanik pornografiinik atugassianik internetikkut il.il. pissarsiniarnera, naak atugassiat tamakku pissamaatigineqanngikkaluartut soorlu. pineqartup qarasaasiaani, aamma naak atugassiat piniarlugit akiliuteqartitsisoqanngikkaluartuq.

Siunnersuutigineqarpoq pinerluttulerinermik inatsimmi § 85, imm 3-mi aalajangersagaq atuuttoq, inatsisit malillugit meeqqanik 15-iniit 17-inut ukiulinnik assilisanik pornografiskiusunik pineqartup akuersineratigut pigisaqarneq allaganngortinneqassasoq takuneqarsinnaalersillugu aalajangersakkamik pineqartunut ilaammata assiliasat aamma filmit, aamma akuersineq akornuteqanngitsumik atuukkunnaarsinneqarsinnaasoq.

Siunnersuutigineqarpoq pineqartup ukioqqortussusianut tunngasumik mianersuaalliorneq pinerlunninngortinneqassasoq pinerluttulerinermik inatsimmi § 85, imm. 4-mi inerteqqutikkut atuuttukku inunnik 18-it inorlugit ukiulinnik pornografiimik assiliineq, filmiliorneq imaluunniit assigisaannik iliorneq, siunertaralugu tuniniaanissaq imaluunniit allatigut atortussianik siammarterinissaq.

Siunnersuutigineqarpoq pinerluttulerinermik inatsimmi § 93 inunnik niuffateqarnermut tunngasoq oqaasertamigut nutarteriffigineqassasoq.

Kiisalu siunnersuutigineqarpoq Kalaallit Nunaanni pinerluttulerinermik inatsimmut ivertinneqassasoq periarfissaq illersuisumik toqqaaneq, pinerluffigisaasoq inunnik niuffateqarnermut akuliussaasimappat.

2. Kujanninneq aamma allatut kinguaassiuutitigut atoqateqarneq

2.1. Inatsisit atuuttut

Pinerluttulerinermik inatsimmi § 74 (ilaquttatut qanigivallaakkamik atoqateqarneq pillugu), § 77 (pinngitsaaliilluni atoqateqarneq), § 78 (kinguaassiuutinut tunngasutigut atonerluineq), § 79 (meeqqanik kinguaassiuutitigut pissusilersorneq), § 80-ia (ileqqussaannngitsuliortitsineq, tavatsitsineq) aamma § 81-ia (inummut inuusuttumut kinguaassiuutitigut pissusilersorneq)

pinerlunninngortippai iliuitsit aalajangersimasut kujanninnermut allatullu kinguaassiuutitigut atoqateqarnermut tunngasut.

Kujanninnermi pineqarpoq taamaallaat suaassutsit assigiinngitsut utsutsigut kujannerat, aamma kinguaassiuutitigut atoqatigiinnermi taamaallaat pineqarpoq suaassutsit assigiinngitsut imminnut pissusiliorfiginerat. Pinerluttulerinermik inatsimmi § 82 malillugu §§ 77-imiit 81-imut assigisaanik iliuseq atuuppoq inuup suaassuseqatiminik kinguaassiuutitigut atoqateqarnerani.

Allatut kinguaassiuutitigut atoqatigiinnertut taaneqarsinnaapput iteruilluni kujanninneq, qanermik atuilluni kujanninneq, kinguaassiuutinik kunissuineq il.il. inussanik imalunniit atortunik illummut mangutsineq aamma usummik passussineq.

2.2. Inatsisinik Atuutsitsinermut Ministereqarfimmit isumaliutersuutit aamma aaqqissuussineq siunnersuutigineqartoq

2.2.1. Danskit pillaasarnermik inatsisaata 2013-imi allanngortinneqarnerani inatsisissamut piareersaatini piumasarineqarpoq oqariaatsimi ”kujanninneq”-mi siunissami pillaasarnermik inatsimmi aamma pineqassasooq iteruilluni kujanninneq (inuit suiassutsimikkut assigiissut assigiinngitsullu akornanni).

Inatsimmut piareersaataasunit takussaavoq, Pillaasarnermik Inatsit pillugu Siunnersuisoqatigiit paasinninnerigaat, pinerluffigineqartup iteruilluni kujanninnikkut narrunarsagaanera sanilliuuneqarsinnaasooq narrunarsagaanermik pinerluffigineqartup ilukkut kujatsinnermini narrunarsagaaneranut, aamma oqariaatsimik ”kujanninneq”-mik atuneq ataatsimut taaguutaasooq ilukkut iteruillunilu kujanninnermut oqariaatsinut tamanut atuuttunut naapertuuttut. Siunnersuisoqatigiit taamaattumik siunnersuutigaat iteruilluni kujanninneq pinngitsaaliilluni atoqateqarnermik aalajangersakkamut toqqaannartumik ilaasooq – aamma kujanninneq pillugu pillarneqaatinik aalajangersakkanut tamanut – taamaattorli allatut kinguaassiuutitigut pissusilersorneq ilukkut iteruillunilu kujanninnermit allaasut nangittumik immikkut aalajangersaavigineqassasut.

Siunnersuisoqatigiit tamatumunnga tunngatillugu siunnersuutigaat allatut suaassuseqatigiinngitsut kinguaassiuutitigut pissusilernerik kujanninnermit aamma suaassuseqatigiit kinguaassiuutitigut pissusilersornerik pillugit aalajangersakkat atuuttut katinneqassasut aalajangersakkatut ataatsitut kujanninnermit kinguaassiuutitigut allatut pissusilersornermit allaasumut tunngasuni.

Inatsisinik Atuutsitsinermut Ministereqarfimmit siunnersuisoqatigiit isumaliutersuutaat siunnersuutaallu isumaqatigineqarput.

Innersuussutigineqarput inatsisissatut siunnersuummi oqaaseqarfiginnissutit tamanut atuuttut, imm. 3.2.1 aamma 3.2.4, tak. Folketingstidende 2012-13, A, L 141 saqqummiunneqartut, qupp. 12-13.

2.2.2. Inatsisinik Atuutsitsinermut Ministereqarfimmit isumaqartoqarpoq pineqartut danskit pillaasarneq pillugu inatsisaanni kujanninnermik oqariaatsip siammasinnerusumik paasineranut tunngasut annertuutigit pineqartunut Kalaallit Nunaanneersunut assingusuusut.

Taamaattumik nutaatut piumasarineqarpoq, oqariaaseq ”kujanninneq” pinerluttulerinermik inatsimmi siunissami aamma paasineqassasoq iteruilluni kujanninnertut (inuit suaassuseqatigiit suiassuseqatigiinngitsullu akornanni).

Aammattaaq nutaatut piumasarineqarpoq oqariaaseq ”allatut kinguaassiuutitigit pissusilersorneq” siunissami imaqartoq inuit suaassuseqatigiinngitsut suaassuseqatigiillu akornanni pissusilersornermik. Tamatumuuna pineqanngilaq inatsisitigit pissutsit imarisaannik allanngineq, tamatumani malinneqarmat pinerluttulerinermik inatsimmi § 82, pinerluttulerinermik inatsimmi §§ 77-imiit 81-imut aalajangersakkat atuutereermata inummut suaassuseqatigisaminut kinguaassiuutitigit pissusilersortumut.

Tamatumali kinguneraa pinerluttulerinermik inatsimmi § 82 atuuffeerummat, tamannalu pillugu aalajangersagaq atorunnaartussatut siunnersuutigineqarluni.

Peqatigitillugu siunnersuutigineqarpoq kinguaassiuutitigit pinerluttarnerit pillugit malittarisassat oqaatsitigit tamanut atuuttumik nutaanngorsaavigineqassasut, taamaalilluni pinerluttulerinermik inatsimmi ”allatigit kinguaassiuutitigit pissusilersornerit”-nik innersuussinertit allanngortinneqassasut tassaalerlutik ”atoqatiginninnikkut allatut pissusilersornerit. ”Kinguaassiuutitigit allatut pissusilersorneq” tassunga tunngatillugu paasineqassaaq kinguaassiuutitigit pissusilersorneq ilukkut iteruillunilu kujannermit allaasumik.

Inatsisissatut siunnersuummi § 1, nr. 1, 3, 6, 8 aamma 10 innersuussutigineqarput.

3. Qitornavissianut kinguaassiuutitigit pissusilersortarneq

3.1. Inatsisit atuuttut

Pinerluttulerinermik inatsisip § 74-iani ilaqttatut qanigilluinnakkamik atoqateqartut eqqartuunneqassaaq inuk ilaqttatut qanigilluinnakkaminik imalunniit qatannumminik angummik arnamillunniit kinguaassiuutitigut atoqateqartoq.

Aalajangersakkami pineqanngillat qitornavissianut pissusilersornerit, taakkuli akerlianik pineqarput pinerluttulerinermik inatsimmi § 80, imm. 2-mi, tamatumani pinerlunninngortillugu inummik 18-it inorlugit ukiulimmik, pinerliisup qitornavissiaanik, qitornarsiaanik imaluunniit qitornatut paarisaanik imaluunniit tatigisatut perorsaasussarisaanik, kujanninneq imaluunniit allatut kinguaassiuutitigut pissusilersorneq, pinerliisup pineqartup ukioqqortussusia ilisimasimappagu imaluunniit tamatumunnga tunngasumik mianersuaalliortumik pissusilersorsimappat.

3.2. Inatsisinik Atuutitsinermut Ministereqarfimmit isumaliutersuutit aamma aaqqissussineq siunnersuutigineqartoq

3.2.1. Danskit pillaasarnermik inatsisaata 2013-imi allanngortinnerani toqqaannartumik ilaqttanik (tassa qitornanik, ernuttanik il.il.) kinguaassiuutitigut pissusilersorneq taamani pinerlunnerusooq pillaasarnermik inatsimmi § 210, imm. 1 annertusineqarpoq aamma ilanngullugit toqqaannartumik ilaqqat qitornavissiarineqartut (tassa qitornavissiat, qitornavissiat qitornaat, qitornavissiat ernutaat il.il.).

Inatsimmut piareersaatitigut takuneqarsinnaavoq, Pillaasarneq pillugu Siunnersuisoqatigiit isumaqartut, qitornavissiarartaarnermi ineriartornerup kingunerigaa qitornavissiat aqaatigalugit ilaqqatut nallersuuttariaqartut, toqqaannartumik ilaqqatut kinguaassiuutitigut pissusilersornermik inerteqqut pineqartillugu. Justitsministeriamit isumaqatigineqarput siunnersuisoqatigiit isumaliutersuutaat siunnersuutaallu. Innersuussutigineqarput inatsisissatut siunnersuummut oqaaseqarfiginnissutit tamanut atuuttut, imm. 10.2.1.1. aamma 10.2.4, tak. Folketingstidende 2012-13, A, L 141 saqqummiunneqartoq qupp. 43 aamma 45.

Pinerluttulerinermik inatsimmi § 74-p imarisamigut assigaa pillaasarnermik inatsimmi § 210-mi siornatigut aalajangersagaq.

3.2.2. Inatsisinik Atuutitsinermut Ministereqarfimmit isumaqartoqarpoq qitornavissianik kinguaassiuutitigut pissusilersornerit pillugit danskit malittarisasa allannguutaannut tunngaviusut annertuutigit Kalaallit Nunaannit isumaliutinut assingusuusut.

Tamanna pissutigalugu siunnersuutigineqarpoq pinerluttulerinermik inatsimmi 74-imi assingusumik allannguisoqassasoq.

Taamaalilluuni siunnersuutigineqarpoq pinerluttulerinermik inatsisip § 74-iani toqqaannartumik ilaqqatut aqaatigisanik kinguaassiuutitigut pissusilersornermik inerteqqut annertusineqassasoq

toqqaannartumik ilaqtarisat qitornavissiat ilanngullugit. Qatanngutit akornanni kinguaassiuutitigut pissusilersornissamik inerteqqut akerlianik nangittumik killeqassaaq qatanngutininut aaqatigisanut.

Tamatuma kinguneranik siunnersuutigineqarpoq qitornavissianut innersuussineq qitornavissianut, qitornarsianut, qitornatut paarianut il.il. 18-it inorlugit ukiulinnut kinguaassiuutitigut pissusilersorneq pillugu pinerluttulerinermik inatsisip § 80, imm. 2-ani aalajangersakkami atuuttumiittoq atuukkunnaassasoq.

Siunnersuutip taamaalilluni kinguneraa qitornavissiallit taakkualu qitornavissiaasa 18 sinnerlugit ukiullit, angajoqqaat taakkualu aaqatigalugit qitornavissiaasa 15-it qaangerlugit ukiullit akornanni aamma qitornavissiallit taakkualu qitornavissiaasa aaqatigalugit qitornaasa imaluunniit qitornavissiaasa 15-it qaangerlugit ukiullit akornanni kinguaassiuutitigut pissusilersornerup nutaatut pinerlunninngortinnera.

Inatsisissatut siunnersuummi § 1, nr. 2 aamma 12 innersuussutigineqarput.

4. Pinngitsaaliilluni atoqateqarneq

4.1. Inatsisit atuuttut

Pinerluttulerinermik inatsimmi § 77, imm. 1, nr. 1-imi pinngitsaaliilluni atoqateqartutut eqqartuunneqassaaq inuk pinngitsaaliilluni kujannittoq imaluunniit allatigut kinguaassiuutitigut pissusilersortoq pinngitsaaliinikkut imaluunniit pingitsaaliiniarluni siorasaarinikkut.

Tamatumannga pissuteqarpoq kujanninnerup pinngitsaaliissutaanissaanik, pissuteqartariaqarlunilu ataqatigiinnermik pinngitsaaliinerup kujanninnerullu akornanni. Piumasaqaatip tamatuma kinguneraa kujanninneq naammassineqartoq pinerluffigineqartup piumasaa akimorlugu.

Aammattaaq pinngitsaaliilluni atoqateqartutut eqqartuunneqassaaq inuk katissimalluni aappariinnerup avataatigut kujannittoq imaluunniit allatigut kinguaassiuutitigut pissusilersortoq inummut imatut inissisimasumut pineqartoq iliuitsimut akerliliisinnaanani, tak. § 77, imm. 1, nr. 2.

Kiisalu pinerluttulerinermik inatsimmi § 77, imm. 2-p kinguneraa inuk pissutsimik imm. 1-imi pineqartup avataaniittumik kujannittoq imaluunniit kinguaassiuutitigut allatut pissusilersortoq inatsisit uniorlugit pinngitsaaliilluni, tak. pinerluttulerinermik inatsimmi § 91, taamattaaq pinngitsaaliilluni atoqateqartutut eqqartuunneqassaaq.

Pinerluttulerinermik inatsimmi § 91 malillugu inuk inatsisit uniorlugit pinngitsaaliisutut

eqqartuunneqassaaq pinngitsaaliinikkut imaluunniit annersaaniarluni soorasaarinikkut pisattanik annertuumik innarliinikkut, kiffaangissusiaanikkut imaluunniit pinerlunnissamik ilumuunngitsumik saqqummiussinikkut imaluunniit pissutsinut nikanarsaataasinnaasunut imaluunniit inuttut pissutsinik pissuseqatigiinnermut tunngasunik oqaatiginnissalluni pingitsaaliissutigalugu iliornissaq, atuisariaqarneq imaluunniit arlaannik pinngitsuuineq, tak. aalajangersakkani nr. 1, imaluunniit soorasaarinikkut saqqummiunniarlugu imaluunniit pinerlunneq oqaatiginiarlugu imaluunniit saqqummiunniarlugit ilumoortut pasilliutit nikanarsaataasinnaasut pinngitsaaliissummik iliuseqartitsilluni pissutsit qunusaarutaasut naleqquttut isigineqarsinnaanngitsut tunngavilersuutigalugit, tak. aalajangersakkami nr. 2.

4.2. Inatsisinik Atuutsitsinermut Ministereqarfimmit isumaliutersuutit aamma aaqqissuussineq siunnersuutigineqartoq

4.2.1. Danskit pillaasarnermik inatsisaata 2013-imi allanngorneratigut pinngitsaaliilluni atoqateqartarnermik oqariaaseq pillaasarnermik inatsimmi § 216 annertusineqarpoq ilagilerlugu kujanninneq allatut inatsisimik uniuusutut pinngitsaaliilluni, tak. pillaasarnermik inatsimmi § 260, imaluunniit inuk inissisimasooq qanoq pissutsimik inissisimaffimmiluunnit, pineqartoq iliutsimut akerliusinnaanani. Pinngitsaaliilluni atoqateqartarnermik oqariaaseq aammattaaq annertusineqarpoq ilagilerlugu meeqqamik 12 inorlugit ukiulimmik kujanninneq. Iliuutsit taaneqartut taamanikkut pinerluutinngortinneqarput pillaasarnermik inatsisip ilaani allani. Aalajangersagaq assinganik atuuppoq allatigut kinguaassiuutitigut pissusilersornerni kujanninnerup saniatigut, tak. pillaasarnermik inatsimmi § 225.

Kujanninnermik imaluunniit kinguaassiuutitigut pissusilersornermik inummut imatut *qanoq issusilimmut* pineqartoq iliutsimut akerliusinnaanani, tassani ilaatigut pineqarput ilisimajunnaaqaneq, annertuumik aalakoorneq imaluunniit sininneq. Inatsimmut piareersaatitigut takuneqarsinnaavoq Inatsisinik Atuutsitsinermut Ministereqarfimmit ataatsimut isiginninneq tunuliaqutaralugu isumaqartoqartoq, pissutsit taama ittut siunissami pinngitsaaliilluni atoqateqanermik aalajangersakkamut ilagitittariaqartut. Inatsisissatut siunnersuummut oqaaseqaatit nalinginnaat imm. 3.2.4-miittut innersuussutigineqarput, tak. Folketingstidende 2012-13, A, L 141 saqqummiunneqartut qupp. 13. Siornatigut tamatumunga tunngasumik aalajangersagaasimasooq aammattaaq imaqarpoq piumasaqaammik taamatut pissusilersorneq iliornerusimassasooq katissimasutut aappariinnerup avataani. Inatsisissamat piareersaatitigut takuneqarsinnaavoq Pillaasarnermik Inatsit pillugu Isumalioqatigiissitani amerlanerusut isumaqatiginnikkaat tamanna nalitsinni katissimalluni aappariinnermut naapertuuttut taamatut nakuuserneq pillaassutaassinnaasunit ilanngutinngitsuussallugu, taamaattumillu siunnersuutigalugu piumasaqaat tamanna peerneqassasooq. Inatsisinik Atuutsitsinermut Ministereqarfimmit isumaqataasooqarpoq siunnersuisoqatigiit isumaliutersuutaannut siunnersuutaannullu. Innersuussutigineqarput inatsisissatut siunnersuummut oqaaseqarfiginnissutit tamanut atuuttut, imm. 4.2.1 aamma 4.2.9, tak. Folketingstidende 2012-13, A, L 141 saqqummiunneqartoq qupp. 15 aamma 19.

Inissisimanerit pineqartup iliutsimut akiuisinnaannginnerani pingaartumik pineqarput pisut

pinerluttup periarfissaqarnera pinerluffigisaasoq pakasassallugu kujanniffigilerlugu imaluunniit atoqatigilerlugu, pineqartup taassuma periarsinnaanginnerani. Pisut pinerini pineqarnerussapput pinerluffigisaasoq tamakkiisumik ilaannakortumillunniit atisaajarsimatillugu, pinerluffiginnittorlu pissusissamisoortumik periarfissaqartoq malussarinnerusortaasigut attualaassallugu, pinerluttulli suliaasaqarfitsigut killissarititat pisumi qaangerai. Inatsimmut piareersaataasuni takuneqarsinnaavoq Pillaasarnermik Inatsit pillugu Siunnersuisoqatigiit isumaqartut tamakku pakasaanernik taaneqartut assigiissuteqartut pisunut pinerluffigisaasup nammineq inissisimanini tunngavigalugu iliuitsimut akerliliisinnaangitsoq, taamaattumillu siunissami aalajangersakkamut assinganut ilagitittariaqartut. Inatsisunik Atuutsitsinermut Ministereqarfimmit isumaqataasoqarpoq siunnersuisoqatigiit isumaliutersuutaannut siunnersuutaannullu. Innersuussutigineqarput inatsisissatut siunnersuummut oqaaseqaatit nalinginnaat, imm. 4.2.3 aamma 4.2.9, tak. Folketingstidende 2012-13, A, L 141 saqqummiunneratut, qupp. 16 aamma 19.

Pinngitsaaliilluni atoqateqarnermik oqariaatsimik inummik 12 inorlugit ukiulimmik kujannineq ilanngullugu annertusisitsinermut tunngaviusoq inatsisissatut siunnersuummi immikkuullarissortaligaanngilaq. Taamaalilluni taamaallaat takuneqarsinnaavoq Pillaasarneq pillugu Siunnersuisoqatigiinnit tamatumunnga siunnersuut Inatsisunik Atuutsitsinermut Ministereqarfimmit isumaqatigineqartoq. Siunnersuisoqatigiit isumaliutissiissutaanni nr. 1534/2012-imi qupp. 395-imi takuneqarsinnaavoq taamatut annertusisitsineq siunnersuisoqatigiit paasinninnerat malillugu pingaartumik paasineqarsinnaasoq pinngitsaaliilluni atoqateqarnermut assingusumik pinerlunnertut annertoorujussuartut kalerrisaarutitut.

4.2.2. Inatsisunik Atuutsitsinermut Ministereqarfimmit isumaqartoqarpoq danskit pinngitsaaliilluni atoqateqarnermik aalajangersaanerannik annertusisitsinermut isummernerannut tunngaviusut annertuutigut assingummata Kalaallit Nunaanni isummernernut.

Taamaattumik siunnersuutigineqarpoq pinerluttulerinermik inatsimmi § 77-imi assinganik allannguisoqassasoq.

Pinerluttulerinermik inatsimmi § 77-imi pinngitsaaliilluni atoqateqarnermik oqariaatsimut ilaareerpoq – pillaasarneq pillugu inatsimmi § 216-imut siornatigut atuuttumut akerliusumik – katissimasutut aappariinnerup avataatigut kujannineq imaluunniit allatut kinguaassiuutitigut pissusilersorneq inunnut imatut inissisimasumut pineqartoq iliuitsimut akerliusinnaanani, tak. imm. 1, nr. 2 aamma inatsisit uniorlugit pinngitsaaliilluni kujannineq imaluunniit allatut kinguaassiuutitigut pissusilersorneq, tak. imm. 2.

Siunnersuutigineqarporli § 77, imm. 1, nr. 2-p atuutsinneranut annertussuseq annertusineqassasoq ilanngullugu katissimalluni appariinnerup iluani pisunut.

Siunnersuutigineqarportaaq § 77, imm. 1, nr. 2 atuutsinneranut annertusineqassasoq ilagilerlugu pisut pineluffigineqartoq inissisimagaangat pineqartoq iliuitsimut akerliliisinaanani. Malittarisassat atuuttut malillugit taamatut atoqatigiinnermi narrunarsaanerit taamaallaat atatinneqarsinnaapput pinerluttulerinermik inatsimmi § 84-imut kannгуттаatsuliorfiginninnermut tunngasumut.

Aammataaq siunnersuutigineqarpoq § 77-imi pinngitsaaliilluni atoqateqarnermik oqariaaseq ilaneqassasoq imm., 1, nr. 3-mik nutaamik, tassani pineqarlutik meeqqamik 12 inorlugit ukiulimmik kujanninneq imalunniit allatigut kinguaassiuutitigut pissusilersorneq. Pissutsit tamakku ilagitinneqarput pinerluttulerinermik inatsimmi § 79-imi, meeqqanik kinguaassiuutitigut atoqateqarnermut tunngasuni, tamannalu tunngavigalugu aalajangersagaq taanna siunnersuutigineqarpoq allanngortinneqassasoq, takuneqarsinnaasutut aalajangersagaq pinerluttulerinermik inatsimmi § 77, imm. 1, nr. 3-mi aalajangersagassatut siunnersuummit pingaanginnerusuummat.

Innersuussutigineqarput inatsisissatut siunnersuummi § 1, nr. 4, 5 aamma 11.

5. Atornerluineq

5.1. Inatsisit atuuttut

Pinerluttulerinermik inatsimmi § 78, imm. 1-imi kinguaassiuutitigut atornerluisutut eqqartunneqassaaq inuk inuup tarnikkut nappaateqarnera imaluunniit isummamigut kinguarsimasuunera atornerlullugit katissimalluni apparinnerup avataatigut pineqartumik kujannittoq imaluunniit allatut kinguaassiuutitigut pissusilersortoq. Tamannattaq atuuppoq inuup inummik suliffimmigut imaluunniit aningaasaqarnikkut pinngitsoorsinnaanngisaminik kujanninnera imaluunniit katissimasutut apparinnerup avataatigut kinguaassiuutitigut allatut pissusilersornera, tak. imm. 2.

§78 imm.1-mi "Atornerluineq"-mik oqariaatsimi nalunaarneqarpoq kujanninneq pisimasariaqartoq pineluffigineqartup inissisimaneranik atornerluinikkut. Inummik aalajangersakkap pissusiatigut tarnikkut nappaateqartumik imaluunniit silamigut kinguarsimasumik kujanninneq pineqartoq nammineerluni aalajangersagaq atorsinnaalersinngilaa.

Piomasavaoq atornerluineq pisimasariaqartoq, kisianni § 78, imm. 2-mi aalajangersagaq malilluguunngitsoq, pineqartoq inuup inissisimaneranik annertuumik atornerluineqartoq.

§ 78, imm. 3 malillugu aammataaq eqqartuunneqassaaq inuk meeqqanut inuusuttunullunniit

angerlarsimaffimmi, tarnikkut nappaatilinnut napparsimmavimmi imalunniit inissiisarfimmi assingusumi suliffilik imalunniit nakkutilliisuusooq inummik inissiisarfimmi taama ittumi kujannittoq imalunniit kinguaassiuutitigut allatut pissusilersortooq.

Aalajangersagaq taanna atortilerneqarpoq pinerluttulerinermik inatsisip 2008-mi akuersissutigineratigut. Aalajangersakkamut piareersaatigut takuneqarsinnaavoq, tak. Folketingstidende 2007-08, tapiliussaq A, qupp. 1659, assigaaalu taamani danskit pillaasarnermut inatsisaanni § 219-imi atuuttoq aamma ilaatigut pinerluttulerinermik inatsimmi maanna atuuttumi § 52, nr. 1, nr. 2. (aappariittut katissimanerup avataatigut pinngitsoorsinnaanngisamik, angutip oqartussaaneratigut imaluunniit isumaginninneranut imalunniit immikkut toqqagaasimanikkut nakkutilliisooq annertuumik atornerluilluni kujannittoq imalunniit allatigut kinguaassiuutitigut pissusilersortooq).

Pillaasarnermik inatsimmi § 219-imi taamanikkut inerteqqutaavoq inuk parnaarussivimmi, angerlarsimaffimmi isumaginniffiusumi, meeqqanut inuusuttunullu angerlarsimaffimmi, tarnikkut nappatilinnut napparsimmavimmi, inunnut isummamikkut annertuumik innarluutilinnut assigisaannullunniit inissiisarfimmi sulisup imaluunniit nakkutilliisup inissinneqarsimasumik kujanninnissaa.

Pinerluttulerinermik inatsimmi § 78, imm. 3-mi erseqqissumik takuneqarsinnaanngilaq aalajangersakkamut ilagitinneqarnersut inissiisarfiit aamma pinerluttunik isumaginnittoqarfiup attavii ineqarfiit imaluunniit angerlarsimaffiit isumaginniffiusut. Tamannali ilimagineqarsinnaavoq pillaasarneq pillugu inatsisiusimasumi § 219-mi oqaasertaliineq tunngavigalugu.

Pinerluttulerinermik inatsiseqarnikkut § 78, imm. 3 malillugu akisussaanermut tunngatissallugu piumasaaqaataanngilaq tigussaasumik atupiluttoqarnera, assigisaanillunniit atornerluisoqarnera, aamma pingaaruteqanngilaq pinerluffigineqartoq immaqa pisumi peqataasimasinnaasoq. Naammappoq sulisooq imaluunniit nakkutilliisooq inissiisarfimmi pineqartumi inunnik inissiisarfimmi tassaniittunik kujannittarsimasooq. Innersuussutigineqarpoq aalajangersakkamut piareersaatit, tak. Folketingstidende 2007-08, tapiliussaq A, qupp. 1659.

5.2. Inatsisinik Atuutsitsinermut Ministereqarfimmit isumaliutersuutit aamma aaqqissuussineq siunnersuutigineqartoq

5.2.1. Danskit pillaasarnermik inatsisaata 2013-imi allannguutaani pillaasarnermik inatsisip § 218, imm. 1-ia pinerluffigisap tarnikkut nappaateqanera imaluunniit isumakkut kinguarsimasuunera atornerlullugu kujanninneq aamma pinerlunneq §220 malillugu suliffikkut aningaasaqarnikkullunniit pinngitsoorsinnaanngisaaq annertuumik atornerlullugu kujanninneq annertusineqarpoq ilagilerlugit katissimasutut aapparinnerup iluani pissusilersornerit. Pillaasarnermik Inatsit pillugu Siunnersuisoqatigiit tamanna siunnersuutigisimavaat tunngavilersuutit nalunaarlugu nalitsinni katissimasutut aapparinnermik paasinninnermut naapertuutinnigisooq pillaasarnerup iluani taamatut nakuusertarnerit minissallugit, tamakku katissimasutut aapparinnerup iluani pisimappata. Inatsisinik Atuutsitsinermut Ministereqarfimmit siunnersuisoqatigiit siumaliutersuutaat siunnersuutaallu isumaqatigineqarput.

Innersuussutigineqarput inatsisissatut siunnersuummut oqaaseqarfiginnissutit tamanut atuuttut, imm. 4.2.1 aamma 4.2.9, tak. Folketingstidende 2012-13, A, L 141 saqqummiunneratut, qupp. 15 aamma 19. Aalajangersagaq assinganik atuuppoq kujanninnermit atoqatigiinnermi pissulersornermut allamut, tak. pillaasarnermik inatsisip § 225-a.

Aammattaaq pillaasarnermik inatsisip 220-ata oqaasertalersornerani nutaanngorsaasoqarpoq, taamaalilluni "suliffittut" pinngitsoorsinnaanngisarneq allanngortillugu "sulinikkut"-mut.

Taakkua saniatigut pillaasarnermik inatsisimmi § 220-mi nakorsartarialinnik paaqqutarisarialinnillunniit pinngitsuuisinnaanngitsunik peqqarniitsumik atornerluilluni kujanninneq (imalunniit allatigut pissusilersorluni atoqateqarneq, tak. § 225). Inatsisissamut piareersaatitigut takuneqarsinnaavoq Pillaasarneq pillugu Siunnersuisoqatigiit siunnersuutigeqqaarsimagaat aalajangersagaq taamaallaat paaqqutarisariaqarnermik pinngitsuuisinnaannginnermut tungatinneqassasoq. Siunnersuisoqatigiit tassunga atasumik nalunaarsimavaat inersimasunik isumaginninnermut tunngasunik suliassani ineriartornerup kingunerigaa inuit sanngiitsumik inissisimasut inissiisarfinni najugaqartarnerat nikikkiartortoq, inuit taama ittut namminneq inigisaminni najugaqartalerlutik soorlu najugaqatigiiffinni minnerusuni. Ineriartornerup ilaatigut kinguneraa inersimasut annertuumik innarluutillit ikinnerusut inissiisarfinni pillaasarneq pillugu inatsisip sulisut najugaqartullu akornanni kinguaassiuutitigut atoqatigiinnermik avaqqutsivigineqarsinnaanngitsumik inerteqquteqarfigisani inissinneqartalersut. Inatsisunik Atuutsitsinermut Ministereqarfimmit siunnersuisoqatigiit siunnersuutaannut uiguusumi isumaqartoqarpoq aalajangersagaq aamma annertusisariaqartoq nakorsartariaqarnermik pinngitsuuisinnaanngitsunik peqqarniitsumik atornerluineq ilanngullugu. Inatsisunik Atuutsitsinermut Ministereqarfimmit immikkut pingaartinneqarpoq Sundhedsstyrelse malillugu assersuutissaqarmat uninngasoq sivisunerusumik suliartittussaq nakorsaatilik pinngitsoorsinnaanngortitsisartunik nakorsarneqarsimasoq nakorsamik suliarinnittumut atoqateqartalersimasoq kingusinnerukkullu nassuiarsimallugu nakorsaatissaminik pinngitsuuisinnaanngortitsisartunik pissarsissaguni atoqatigiinnissaq piunasaqaataasoq misigisimallugu. Pisut taama ittut eqqorniarlugit aamma taama ittut assingilik napparsimasup aamma nakorsap imaluunniit katsorsaaq allap annertuumik pinngitsoorsinnaanngisap peqqarniitsumik atornerluinerisa pisanninnissaat siunertaralugu saqqummiunneqarpoq, katsorsarneqarnissamik pinngitsoorneqarsinnaanngisamik peqqarniitsumik atornerluinissaq aamma ilannguneqassasoq. Innersuussutigineqarput oqaaseqaatit nalinginnaat, imm. 4.2.5 aamma 4.2.9, tak. Folketingstidende 2012-13, A, L 141 saqqummiunneqarneratut, qupp. 18-19.

Kiisalu pillaasarnermik inatsimmi § 219 sulisut aamma inuit inissiisarfinni aalajangersimasuni inissitat akornanni kujannermut tunngasoq annertusineqarpoq.

Siullertut pinerluttunik isumaginnittoqarfiup suliffiutaanni sulisut imaluunniit nakkutilliisut inissiisarfimmilu pineqartumi inissitat akornanni kujannerup pinerlutinnngortinnera atuuttoq pinerluttunik isumaginnittoqarfiup sulisuinut tamanut atuuttunngorlugi annertusineqarpoq, killilerneqarlunili sulisunut inissisimasunik oqartussaaffiginnittunut atuuttut. Pillaasarnermik Inatsit pillugu Siunnersuisoqatigiit tamanna siunnersuutigisimavaat, kisianni tamatumunnga

tunuliaqutaasoq immikkuullarissumik inatsisissatut siunnersuummi allaaserineqanngilaq. Taamaattoq Pillaasarneq pillugu Siunnersuisoqatigiit isumaliutissiissumminni nr. 1534/2012, qupp. 312-imi nalunaarpaat illersuinissamik isigimanninnerup pissusissaatikkaa, § 219 ilaatigut aamma atorveqarsinnaasasoq, tassani Direktoratet for Kriminalforsorgimi imaluunniit pinerluttunik isumaginnittoqarfimmi sulisoq suliffimminut atasumik sunngiffeqarnermini inissitanik attaveqarsimasoq. Immikkoorutaasoq taamaalilluni unaasariaqanngilaq pineqartoq inissiisarfimmi pineqartumi sulisuusoq (imaaluunniit nakkutilliisuusoq), kisianni pineqartoq pinerluttunik isumaginnittoqarfimmi sulisuusoq taamaannermigullu sulinerminut atasumik inummik pinerluttunik isumaginnittoqarfiup suliffiutaaniittunut ilaasoq. Inatsisunik Atuutsitsinermut Ministeqarfimmit siunnersuisoqatigiit isumaliutersuutaat siunnersuutaallu isumaqatigineqarput. Innersuussutigineqarput oqaaseqaatit nalinginnaat, imm. 4.2.9, tak. Folketingstidende 2012-13, A, L 141 saqqummiunneratut, qupp. 19. Aalajangersagaq assinganik atuuppoq kujanninnermit atoqatigiinnermi allatut pissusilersornermut, tak. pillaasarnermik inatsimmi § 225.

Aappaattut ilanngunneqarpoq politiini atorfillip inummik kiffaanngissusiiagaasumik politiinillu nakkutigineqartumik kujanninnissaanik (imalunniit §225 malillugu allatut atoqateqarnermut tunngasumik pissusilersornissaanik) avaqqunneqarsinnaanngitsumik inerteqquteqalernera. Inatsimmut piareersaatinit takuneqarsinnaavoq Pillaasarnermik inatsisit pillugit Siunnersuisoqatigiit aamma taanna siunnersuutigisimagaat tunngavilersuutitullu nalunaarsimallugu, nammineq piumassutsimik politiini atorfillip kiffaanngissusiiakkallu politiinit nakkutigisaasup atoqatigiisinnaanerup (imaluniit anngiortumik atornerluinerup) ilimanassusia annikkaluarpuunniit, taamanikkut pillaasaarnermik inatsimmi § 129-mut ilaasut assigalugit immikkut sakkortuumik pinngitsuuisinnaanngitsuusinnaasoq. Inatsinik Atuutsitsinermut Ministereqarfimmit isumaqatigineqarput siunnersuisoqatigiit isumaliutersuutaat siunnersuutaallu. Innersuussutigineqarput oqaaseqaatit nalinginnaat, imm. 4.2.4 aamma 4.2.9, tak. Folketingstidende 2012-13, A, L 141 saqqummiunneqartut qupp. 17 aamma 19.

Pingajuattut, inissiisarfimmi aalajangersimasuni sulisut inissisimasullu akornanni kujannermik inerteqqut atuuttoq arlalitsigut allannguiffigineqarsimavoq. Taamaalilluni taaguusersuutit ilaat erseqqissaasernerqarlutillu nutaanngorsarneqarsimapput, soorlu angerlarsimaffik isumaginniffik aalajangersakkamit peerneqartoq. Tamanna aamma Pillaasarnermik Inatsit pillugu Siunnersuisoqatigiit siunnersuutigisimavaat. Inatsimmut piareersaataasumi takuneqarsinnaavoq siunnersuisoqatigiit isumaginngikkaat angerlarsimaffiup isumaginniffiusup aalajangersakkap atuuffippiaanut ilagitinnissaa. Siunnersuisoqatigiit tassunga tunngasumik oqaatigaat naak inuit eqimattat sanngiitsumik inissisimasut (angerlarsimaffeqanngitsut) pineqaraluartut, taakkua angerlarsimaffimmi isumaginniffimmi najugaqarnerat taamaannermigut ilisarnaquteqarmat annertuumik nammineq piumassutsimik periarsinnaanermik, sanilliukkaanni parnaarussivinnut, tarnikkut nakorsartiffittut immikkoortortanut aamma meeqqanut inuusuttunullu ulloq unnuarlu paaqqinnitarfennut. Inatsinik Atuutsitsinermut Ministereqarfimmit siunnersuisoqatigiit isumaliutersuutaat siunnersuutaallu isumaqatigineqarput. Innersuussutigineqarput oqaaseqaatit nalinginnaat, imm. 4.2.4 aamma 4.2.9, tak. Folketingstidende 2012-13, A, L 141 saqqummiunneratut, qupp. 17 aamma 19. Aalajangersagaq assinganik atuuppoq kujanninnermit

atoqatigiinnermi allatut pissusilersornermut, tak. pillaasarnermik inatsimmi § 225.

5.2.2. Inatsisunik Atuutsitsinermit Ministereqarfiup paasinninnera imappoq mianerisassat atornerluineq pillugu danskit aalajangersagaannik annertusisitsinermit tunngaviusut annertuutigit mianerisassanut Kalaallit Nunaanni atuuttunut naapertuuttut.

Taamaattumik siunnersuutigineqarpoq pinerluttulerinermik inatsimmi § 78 assigisaanik allannguuteqartitsineqassasoq.

Taamaalilluni siunnersuutigineqarpoq pineqartup tarnimigut nappaateqarneranik imaluunniit isummamigut kinguarsimaneranik atornerluilluni kinguaassiuutitigit pissusilersornissamik periarfissarsiornermik inerteqquteqalissasoq, tak. imm. 1 aamma sulinikkut imaluunniit aningaasaqarnikkut pinngitsuuisinnaannginnermik peqqarniitsumik atornerluilluni atoqatiginnikkut atornerluinermik periarfissarsiorneq, tak. imm. 2, annertusineqassasoq ilagilerlugu katissimasutut aapparinnerup iluani atoqatigiinnikkut pissusilersorneq.

Tulliullugu siunnersuutigineqarpoq pinerluttulerinermik inatsimmi § 78, imm. 2-mi inerteqqut annertusineqassasoq katsorsaannikkut paaqqutarinninnikkullu pinngitsuuisinnaannginneq peqqarniitsumik atornerlullugu atoqatiginninnissarsiorluni pissusilersortarnermut. Peqatigitillugu siunnersuutigineqarpoq oqaatsitigit nutarterinissaq, taamaalilluni ”sulinikkut” pinngitsoorsinnaasaqarneq allangortinneqassasoq ”sullissinikkut” pinngitsoorsinnaasaqannginnermut. Siunnersuummi kingullermi siunertarineqanngilaq aalajangersakkap suliaqarfittaa imamigut allannguuteqassasoq.

Aammataaq siunnersuutigineqarpoq pinerluttulerinermik inatsimmi § 78, imm. 3-mi inissiisarfanni aalajangersimasuni sulisut najugaqartullu akornanni kujannermik inerteqqummut allannguutissat arlallit.

Siullertut siunnersuutigineqarpoq aalajangersakkamik ivertitsisoqassasoq inerterisumik pinerluttunik isumaginnittoqarfimmi atorfilik inummik pinerluttunik isumaginnittoqarfiup inissiisarfiani taamalu atorfillip oqartussaaffiata ataani inissisimasumik atoqatigiinnikkut pissuseqateqassanngitsoq, tak. imm. 3, nr. 1-itut siunnersuutigineqartoq.

Imm. 5.1-ip ataani soorlu takuneqarsinnaasoq ilimagisariaqarpoq § 78, imm. 3-mut maanna Kalaallit Nunaanni Pinerluttunik Isumaginnittoqarfiup ataani inissiisarfiit najugaqarfiillu ilaalereersimasut, naak aalajangersakkami tamanna immikkut toqqaannartumik takuneqarsinnaanngikkaluartoq. Inatsimmi allannguutissatut siunnersuutigineqartumi tamanna aalajangerneqartumi toqqaannartumik takuneqarsinnaalissaaq. Peqatigitillugu aalajangersagaq annertusineqarpoq ilagilerlugit pinerluttunik isumaginnittoqarfimmi sulisut taamaasa, kisianni illuatungaaticigit killilerlugu ilagilerlugit atorfillit inissitaasimasunik oqartussaaffiginnittut.

Aappaattut siunnersuutigineqarpoq, nutaatut politiini atorfillip inummik

kiffaanngissusiagaasimasumik politiinillu nakkutigineqartumik atoqatigiinnikkut pissusilersomera pinerlunninngortinneqassasoq, tak. imm. 3, nr. 2-mi siunnersuutigineqartoq.

Pingajuattut siunnersuutigineqarpoq inuup meeqqanut inuusuttunullu angerlarsimaffimmi, tarnikkut nappaatilinnut napparsimmavimmi imalunniit inissiisarfinni assigisaanni atorfillip nakkutilliisullunniit kujanninneranik allatullunniit kinguaassiuutitigut pissusilersorneranut inerteqqut atuuttoq nutarterneqassasoq, tak. imm. 3, nr. 3-mi siunnersuutigineqartoq. Tamatumunnga tunngatillugu siunnersuutigineqarpoq aalajangersagaq allangortinneqassasoq erseqqissumik takuneqarsinnaatilerlugu, inunnut annertuunik tarnikkut innarluuteqartunut ulloq unnuarlu inissiisarfinni sulisut imarisaanut ilagitilerlugit. Siunnersuutigineqarportaaq angerlarsimaffiit isumaginniffiusut aalajangersakkamut ilaajunnaassasut.

Inatsisissatut siunnersuummi § 1, nr. 7-9 innersuussutigineqarput.

6. Atortittartut 18-it inorlugit ukiullit

6.1. Inatsisit atuuttut

6.1.1. Pinerluttulerinermik inatsimmi § 81 malillugu inummik inuusuttumik akilerlugu atoqateqartutut eqqartuunneqassaaq inuk akiliilluni pisisutut imalunniit akiliinissamik neriorsuilluni inummik 18-it inorlugit ukiulimmik kujannittoq imalunniit allatut atoqateqarnermik pissusilersortoq, iliortup pineqartup ukioqqortussusia ilisimasimaguniuk imalunniit tamatumunnga tunngasumik mianersuaalliorsimaguni.

Oqartarnek ”pisisoq” imaqarpoq atuuffik killiligaasoq pisunut ukiukitsup atoqatigiinnikkut peqataassutai akilerlugit akiliinissamillunniit kissaateqarnikkut tunineqartut. Pingaartuunngilaq pisisoq nammineq imaluunniit peqataasoq pingajuusoq akiliisuunersoq. Aamma pingaaruteqanngilaq pisisup akiliutai aningaasaanersut, kisianni akiliut aningaasanngorlugu naatsorsorneqarsinnaassaaq.

Aalajangersakkamulli aamma ilaavoq ukiukitsoq pisumi ataasiinnarmi atoqatigiinnikkut pissusilersornermut akilersittoq.

Inuk inummik 18-it inorlugit ukiulimmik kinguaassiuutitigut peqateqartoq akiliisimappat, soorlu ukiukitsup najugaanut, nerisaanut, atisaanut il.il. pineqartoq tamanna pissutigalugu ilisarnaasernerqarsinnaassanngilaq ”pisisoq”-tut. Tunngaviumillu suliap misissorneqarnerani pineqartoq nalilernerneqarsinnaavoq ”pisisartoq”-tut.

”Pisisutut pissuseq” pineqarnersoq naliliinermi aammattaq ilagittinneqarsinnaavoq pissutsit qanoq ittut iluanni isumaqatigiittoqarsimanersoq, assersuutigalugu kinguaassiuutitigut pissusilersornissaq aalajangerneqarnersoq aqqusinermi, imerniartafimmi imaluunniit imigassartortarfimmi imaluunniit peqataasut naapereerneratigut, aamma pissusiliorneq killeqarnersoq kinguaassiuutitigut attumaqatigiinnermut, allatigut naapittaratik.

Pisisoq pinerluttulerinermi inatsisitigut akisussaasuusoq pisuusunngortissinnaavoq aalajangersagaq

siunnersuutigineqartoq malillugu, naak pisisoq nammineq 18-it inorlugit ukioqarluni (kisianni 15-inik ukioqalereersimalluni, tak. pinerluttulerinermik inatsimmi § 16).

Innersuussutigineqarput § 81-imut piareersaataasumik suliat, tak. Folketingstidende 2007-08, tapiliusaaq A, qupp. 1659.

6.2. Inatsisinik Atuutsitsinermut Ministereqarfimmit isumaliutersuutit aamma aaqqissuussineq siunnersuutigineqartoq

6.2.1. Danskít pillaasarneq pillugu inatsisaata 2013-imi allanngortinneqartumi pillaasarneq pillugu inatsisip § 224, imm. 1-imi ivertinneqarpoq aalajangersagaq nutaaq, inuup 18-it inorlugit ukiullip akiliisitsinikkut imaluunniit akiliinissamik neriorsuinikkut pisisumik kujannitsitsinermut peqataanera pillugu. § 223-mi a-mi pisisup akiliilluni imaluunniit akiliinissamik neriorsuilluni inummik 18-it inorlugit ukiulimmik kujannissinnaanerani inerteqqut atuuttoq ingerlateqqinneqarpoq § 224, imm. 2-tut nutaatut. Aalajangersagaq assinganik atuuppoq kujannermit allamik kinguaassiuutitigut pissusilersornermut, tak. pillaasarneq pillugit inatsimmi § 225.

Inatsisissatut siunnersuut tunuliaqutaqarpoq Pillaasarnermik Inatsisit pillugit Siunnersuisoqatigiit siunnersuutaannit. Siunnersuisoqatigiit isumaliutissiisumminni nr. 1534/2012, qupp. 537-mi oqaatigaat, pillaasarnermik inatsimmi § 228, imm. 2 taamanikkut atuuttoq imaqaareersoq immikkut malittarisassanik inuup 21-t inorlugit ukiullip akissarsiutigalugu atortittarneranut peqataanermut, sulili (amma sulii taamaalluni) inunnik niuffateqarnertut pinerlunnerutinneqartarluni, tak. § 262 a, imm. 2, inummik 18 inorlugit ukiulimmik akissarsiutigalugu atortittarnermut atonerlutassatut siunertaqartumik pissarsiniarneq, angallassineq, nuussineq, ineqartitsineq imaluunniit kingornatigut tigusineq tassani pineqarmat. Siunnersuisoqatigiit aammattaaq oqaatigaat § 228, imm. 2 imaluunniit § 262 a, imm. 2 pissuseq matussusinnigikkaluarpagu, pisisup inummut 18-it inorlugit ukiulimmut kinguaassiuutitigut pissusilersorneranut akiliilluni imaluunniit akiliinissamik neriorsuilluni peqataaneq pillarneqaataasinnaasoq, tak. pillaasarnermik inatsimmi § 223 a-mi aalajangersagaq taamani atuuttusoq.

Siunnersuisoqatigiit malillugit pillaasarnermik inatsisip inunnik niuffateqartarneq pillugu § 262 a, imm. 2-p ilagaa, pisutigut peqataaneq sunaluunniit inuk 18-it inorlugit ukiulik akissarsiutigalugu atortittarnermut peqataagaangat pineqartumik atonerluinissamik siunertaqartumik.

Inuup 18-it inorlugit ukiullip akissarsiutigalugu atortittarnermut, pineqartumik atonerluinissamik siunertaqanngitsumik pisumi peqataanera eqqorniarlugu, Pillaasarnermik inatsisiliornermik Siunnersuisoqatigiit siunnersuutigaat inummut peqataasumut inuup 18-it inorlugit ukiullip akilersilluni imaluunniit akiliinissamik neriorsuisoqarneratigut pisumut kinguaassiuutitigut pissusilersornera pillugu pillaanissamut aalajangersagaq nutaaq. Siunnersuisoqatigiit siunnersuutigaat aalajangersagaq ilusilersorneqassasoq pillaasarneq pillugu inatsimmi § 235 a, imm.

1, pillugu peqataanermik inuup 18-it inorlugit ukiullip pornografiimik takutitassiami peqataanera peqatigalugu. Aalajangersagaq taamaalilluni nutaatut isikkuligaanermigut inuillu 18-it inorlugit ukiullit pillugit pillaasarnermik inatsimmi § 228 a, imm. 2-mut ilaagitinneqanngitsut ilaat, inunnik niuffateqarnermut tunngasut, ingerlateqqillugit.

Inatsisinik Atuutsitsinermut Ministereqarfimmit siunnersuisoqatigiit isumaliutersuutaat siunnersuutaallu isumaqatigineqarput. Innersuussutigineqarput inatsisissatut siunnersuummut oqaaseqaatit nalinginnaat, imm. 7.2.4, tak. Folketingstidende 2012-13, A, L 141 saqqummiunneratut, qupp. 35–36.

6.2.2. Danskit pillaasarnermik inatsisaanni § 228 malillugu pillaasarnermik inatsisip kinguaassiuutitigut pinerluttarnernut tunngasut, pinerliisup iliorfigisap inissisimaneranik ukioqqortussusianilluunniit ilisimasaqannginnera aalajangersakkanik aalajangersimasunik unioqqutitsinerit pinerliisumut piaaraluneerinertut naatsorsuutigineqassasoq, pillarneqassasoq allanut naleqqiullugu sakkukinnerusumik, pinerliisorli mianersuaatsumik iliorsimappat.

Pillaasarneq pillugu inatsisip 2013-imi allanngorneratigut taamanikkut pillaasarnermik inatsisimmi § 226 mianersuaalliorneq pillugu aalajangersagaq ingerlateqqinneqarpoq § 228-mi aalajangersimasutigut allannguuteqarluni tamatumunngalu tunngasumik annertusineqarluni ilaatigut ilanngullugu § 224, imm. 1-ip nutaap unioqqutinneranut tunngasunik, inuk akiliilluni akiliinissamilluunniit neriorsuilluni inummik 18-it inorlugit ukiulimmik kujanninnermut peqataanermut tunngasumi.

Inatsisissamat piareersaatini takussaavoq, Pillaasarnermik inatsisit pillugit Siunnersuisoqatigiit isumaqartut mianersuaalliornermik inummut 18-it inorlugit ukiulimmut pissusiliornermi attatiinnartariaqartoq pineqartillugit aalajangersakkat immikkut siunertaqartut inuit 18-it inorlugit ukiullit kinguaassiuutitigut atonerluinnermut imaluunniit atonerlutaanermut illersussallugit. Pineqarput qitornarsianut, qitornatut paarianut il.il. kinguaassiuutitigut pissusilersorneq, aamma peqqarniitsumik ukioqqortussutsikkut misilittakkatigullu pingaarnerusorinnermut, akiliilluni akiliinissamilluunniit neriorsuilluni atoqateqarnermi imaluunniit pornografiimi assinut imaluunniit filminut siammarterinissaq siunertaralugu ilanngussinnermi, taamanikkut mianersuaalliorneq pillugu aalajangersakkami ilaatitaareersumi.

Pillaasarnermik inatsisit pillugit Siunnersuisoqatigiit paasinninnerat malillugu isigimanninneq taama ittoq atuuppoq inuk 18-it inorlugit ukiulik pisilluni akiliinikkut akiliinissamilluunniit neriorsuilluni kinguaassiuutitigut atoqateqaraangat, aamma siunnersuisoqatigiit taamaattumik siunnersuutigaat mianersuaalliornermik pinerlunninngortitsineq annertusisariaqartoq pinerluffigisaasup ukioqqortussusia aamma pinerlunnerit tamakku ilanngullugit isigimallugit.

Inatsisunik Atuutsitsinermit Ministereqarfimmit siunnersuisoqatigiit isumaliutersuutaat siunnersuutaallu isumaqatigineqarput.

Innersuussutigineqarput inatsisissatut siunnersuummut oqaaseqaatit nalinginnaasut, imm. 10.2.2.2 aamma 10.2.4, tak. Folketingstidende 2012-13, A, L 141 saqqummiunneratut, qupp. 44-45.

6.2.3. Inatsisunik Atuutsitsinermit Ministereqarfimmit paasinnineq imaappoq, danskit inummik 18-it inorlugit ukiulimmik akiliilluni akiliinissamilluunniit neriorsuilluni atoqatigiinnerup inerteqqutiginerata annertusineranut tunngavigisaat annertuutigut isigimasanut Kalaallit Nunaanni atuuttunut assingusut.

Taamaalilluni siunnersuutigineqarpoq pinerluttulerinermik inatsimmi § 81-imut imm. 2 ivertinneqassasoq, inerteqquteqartoq inuup 18-it inorlugit ukiullip akiliilluni akiliinissamilluunniit neriorsuilluni pisisumik atoqateqarneranut peqataanermik.

Tamatumunnga atatillugu siunnersuutigineqarpoq – pillaasarnermik inatsit malillugu atuuttup assinganik – aamma eqqartuussisoqarsinnaassasoq, imaappat iliortoq mianersuaalliorluni iliorsimasoq pinerlineqartup ukioqqortussusia eqqarsaatigalugu. Tamatumunnga tunngatillugu oqaatigineqarpoq pinerluttulerinermik inatsimmi § 81-ikkut pisup mianersuaalliornerata pinerlunninngortereeraa inummik 18-it inorlugit ukiulimmik akiliinikkut akiliinissamilluunniit neriorsuilluni kinguaasiuutitigut atoqateqarneq.

Pillaasarnermik inatsisip § 228-ani aalajangersagaq, mianersuaalliornermik pisuni pillaammik naleqqiussinikkut sakkukinnerusassasoq, ilanngunneqassanngilaq, pineqaatissiissutit aalajangersarnerannut pinerluttulerinermi inatsimmi maleruagassat immikkut ittut pissutigalugit.

Innersuussutigineqarput inatsisissatut siunnersuummi § 1, nr. 13.

7. Pornografiit takutitassiat

7.1. Inatsisit atuuttut

Pinerluttulerinermik inatsimmi kapitali 18-imi meeqqap pornografiimi peqataaneranut peqataaneq, imaluunniit takussutissiamut taama ittumut najuunneq namminerisaminnik pinerluutinngortinneqanngillat.

Pinerluttulerinermik inatsisip kinguaassiuutitigut pinerluisarnerit pillugit kapitaliata taamaattoq aalajangersakkat pissutsinik tamakkuninnga sammisaqartutut ilaatigut isigineqarsinnaasorinartut imarai. Pinerluttulerinermik inatsimmi § 83 arnerisitsinermut/anguserisitsinermut tunngasoq taamaalilluni imaqqarpoq inuit allat iliuusiinik allat inuussutissarsiutaasigut kinguaassiuutitigut kanngunartuliornernik, pinerluttulerinermilli inatsimmi § 94 inunnik niuffateqarnermut tunngasoq imaqqartoq aalajangersakkanik inummik 18-it inorlugit ukiulimmik akissarsiutigalugu atoqateqarnermut peqataatillugu atonerluinermik. Tamatuma saniatigut pinerluttulerinermik inatsimmi § 91 inatsisunik unioqqutitsilluni pinngitsaaliineq pillugu aalajangersakkanik imaqqarpoq.

Kiisalu taaneqassaaq pinerluttulerinermik inatsimmi § 84 kannguttaattuliorfigisaanermut tunngasumi inuk kinguaassiuutitigut kannguttaattuliornikkut piitaalijuinnermik innarliippat imaluunniit tamanut ammasumik mamiasutsitsinermik pilersitsippat pinerluttunngortinneqqarpoq.

7.2. Inatsisunik Atuutsitsinermut Ministereqqarfimmit isumaliutersuutit aamma aaqqissuussineq siunnersuutigineqqartoq

7.2.1. Inatsit nr. 319 apriliip 28-anni 2009-meersukkut danskit pillaasarneq pillugu inatsisaat nutaamik § 235 a-mik ilaneqqarpoq (maanna aalajangersimasutigut allannguuteqqartumik § 227-mik), tamatumani pinerlunninngortinneqqarluni meeqqap takutitassiami kinguaassiuutitigut assuarnartumi peqataaneranut pissarsiorneq peqataanerlu, tak. imm. 1, aamma taamatut takutitassiami isiginnaartutut najuunneq, tak. imm. 2. Aalajangersagaq ivertinneqqarpoq siunertaralugu Europarådip Isumaqatigiissutaani artikel 21, meeqqat kinguaassiuutitigut atonerlugaanermut atoqatigiinnermilu atonerluinermut illersorniarnerrannut tunngasoq eqqortinniarlugu tamatumuunalu danskit isumaqatigiissummik atortussanngortitsinnissaa pisinnaanngortinniarlugu. Danmarkip isumaqatigiissut atortussanngortereerpaa Kalaallit Nunaannut (aamma Savalimmiunut) nunanut najukkanut tunngasunik nangaassuteqqarluni.

Isumaqatigiissummi artikel 21 pisussaatsivoq naalagaaffiit ilaasortaasut pinerlunninngortissagaat meeqqap pornografiimi takutitassiami peqataatinnera imaluunniit meeqqap imatut peqataatitaanera allaat meeraq pinngitsaalillugu pornografiimi takutitsinermi peqataatillugu imaluunniit arlaatigut iluanaarniutigalugu siunertani taama ittuni meeqqap atonerlunnissaa, imaluunniit piaaraluni pornografiimi takutitassiat meeqqanik peqataatitsisut isiginnaarlugit. Imm. 147-mi takuneqarsinnaavoq isumaqatigiissummut nassuiaataasumik nalunaarummi, oqariaatsimik ”pornografiimik takussutissiineq”-mik nassuiaat erseqqinnerusoq naalagaaffinnut peqataasunut innersuussutigineqqarmat, aamma tamatumunnga tunngasumik ilaatigut pingaartinneqarsinnaammat pissutsip tamanut ammasumi imaluunniit inunni ataasiakkani aamma inuussutissarsiornermi

imaluunniit inussutissarsiornerunngitsumik ilisarnaqutit pingaartinneqarsinnaammata. Peqatigitilluguli oqaatigineqarpoq aalajangersakkami pingaartillugu siunertarineqarmat eqqorniarlugit aaqqissukkamik "uumassusilittut sarsuasumik" meeqqanik atoqatigiinnermik erseqqissumik peqataasunik isiginnaarutissiorneq, aamma imm. 143-mi nalunaarummi nassuaataasumi takussutissaqarmat "kinguaassiuutitigut iliorsimaneq erseqqissoq"-p erseqqissumik killilernissaa minnerpaatigut meeqqap kinguaassiuutaasa saqqummersinnginnissaat pinerlunninngortitsinermi ilaatillugu.

Inatsimmut piareersaatitigut takuneqarsinnaavoq, pillaasarnermik inatsimmi § 228 arnerisitsinermut/anguserisitsinermut tunngasup, § 229, imm. 1 kinguaassiuutitigut kanngunartuliornermik siuarsaanermut tunngasup, aamma § 262 a, imm. 2 inunnik niuffateqartarnermut tunngasup imarereermagit pisunik assersuutigalugu pissarsiorloq, pinngitsaaliisoq imalunniit meeqqanik pornografiimik takussutissaliornermik atornerluisoq, taakku "kinguaassiuutitigut kanngunartuliorlutut" isigimmassuk, tassunga ilagitillugu assersuutigalugu meeraq takutitseqataasoq allanik kinguaassiuutitigut atoqateqaqataappat. Tamatuma saniatigut pillaasarnermik inatsimmi § 260 inatsisunik unioqqutitsilluni pinngitsaaliinermit tunngasoq ilaatigut ilaavoq.

Takuneqarsinnaavortaaq pillaasarnermik inatsimmi § 232 kannguttaatsuliorfigisaanermit tunngasoq pisuni aalajangersimasuni atornerqarsinnaassavoq pisuni aalajangersimasuni isumaqatigiissutip artikel 21-mi taaneqartuni, ilaatigut apeqqutaalluni meeqqamit (atuuttumik) akuersissut pissarsiarineqarsimanersoq. Pillaasarnermik inatsimmi § 232 taamaakkaluortoq assersuutitut atorsinnaassasimannigilaq pinerlunninngortitsinermit periarfissaliissutitut inuit amerlasuut akornanni isiginnaartumut ataasiakkaanut, 17-inik ukiullip pornografiimi takutitassiami peqataanerani, soorlu atisaajarluni takutitsinermit najuuttumut.

Innersuussutigineqarpoq Folketingstidende 2008-09, tapiliusaaq A, qupp. 2449-2450.

7.2.2. Danskit pillaasarnemik inatsisaannik 2013-imi allannngortitsinermi taamani pillaasarnemik inatsimmi § 226-mi mianersuaalliorneq pillugu aalajangersakkatut atuuttoq § 228-mi ingerlateqqinneqarpoq aalajangersimasunik allanguinertalerlugu, tassungalu atatillugu annertusineqarluni ilaatigut § 227, imm. 1-imik, inuup 18-it inorlugit ukiullip pornografiimik takutitassiami peqataaneranut peqataanerit ilaatilerlugit.

Inatsimmut piareersaatini takuneqarsinnaavoq, Pillaasarnermik inatsisiliorneq pillugu siunnersuisoqatigit isumaqartut, mianersuaalliornermik pinerlunninngortitsineq eqqarsaatigalugu inuk 18-it inorlugit ukiulik atatiinnarneqassanersoq pissutigalugit aalajangersakkat immikkut siunertaqartut illersussallugit inuit 18-it inorlugit ukiullit kinguaassiuutitigut atornerlunneqarnermit imaluunniit atornerlugaanermit, Siunnersuisoqatigiit paasinninnerat malillugu isigimanninneq assingusoq atuuppoq inuup 18-it inorlugit ukiullip pornografiimik takutitsinermit

isiginnaartitsinermit peqataaneranut. Inatsisunik Atuutsitsinermit Ministereqarfimmit isumaqatigineqarput siunnersuisoqatigiit isumaliutersuutaat siunnersuutaallu. Innersuussutigineqarput inatsisissatut siunnersuummut oqaaseqaatit nalinginnaat, imm. 10.2.2.2 aamma 10.2.4, tak. Folketingstidende 2012-13, A, L 141 saqqummiunneratut, qupp. 44-45.

7.2.3. Inatsisunik Atuutsitsinermit Ministereqarfiup paasinninnera imaappoq pinerluttulerinermik inatsip kinguaassiuutitigut pinerluttarnerit pillugit aalajangersagaasa nalinginnaasumik nutarternerinut atasumik ingerlattariaqartoq, iliuitsit danskit pillaasarnermik inatsisaanni § 227-mi imaritinneqartunik pinerlunninngortiterilluni.

Taamaattumik siunnersuutigineqarpoq pinerluttulerinermik inatsimmi § 82-imi aalajangersagaq ivertittariaqartoq, taanna malillugu inuup 18-it inorlugit ukiullip pornografiimik takutitassiamut takutitsinermit najuunneranut peqataaneq pinerluutinngortinneqarpoq, tak. imm. 1, aamma takutitassianik taama ittunik isiginnaarluni najuunneq pinerluutinngortinneqarluni, tak. imm. 2.

Aamma aalajangersagaq – ataani imm. 10.2.3 peqatigalugu internetikkut meeqqanik pornografiilianik isiginnaarneq pillugu aalajangersagassatut siunnersuutaasoq peqatigalugu – piumasagaataavoq Europarådip meeqqat kinguaassiuutitigut atornerlugaanermut atoqatigiinnikullu atornerluinermut illersugaanerit pillugu isumaqatigiissutaanik Kalaallit Nunaata kingusinnerusukku akuersissuteqarnissaanut, tamanna pisassanngorsimassappat.

Aamma siunnersuutigineqarpoq – pillaasarneq pillugu inatsimmut atuuttut assigalugit – eqqartuussisoqarsinnaasoq, inuup 18-it inorlugit ukiullip pornografiimik takutitsinermit peqataatinneranut peqataatitsisoq, tak. § 82, imm. 1, pinerluffigineqartup ukioqqortussusianut tunngasumik mianersuaalliorsimappat.

Pillaasarnermilli inatsimmi § 228-mi mianersuaalliornermik pisumi allanut naleqqiullugu sakkukinnerusumik pillaasoqarnissaanut tunngasoq ilaatinneqassanngilaq, pineqaatissiissutit aalajangersarnerannut pinerluttulerinermik inatsimmi maleruagassat immikkut ittut pissutigalugit.

Innersuussutigineqarpoq inatsisissatut siunnersuummi § 1, nr. 14.

8. Arnerisitsineq/anguserisitsineq il.il.

8.1. Inatsisit atuuttut

8.1.1. Pinerluttulerinermik inatsimmi § 83-imi arnerisitsinermit /anguserisitsinermit tunngasumi ”kinguaassiuutitigut kanngunartuliorneq”-mut atasumik iliuitsit assigiinngitsut

pinerluutinngortinneqarput, akerlianilli kinguaassiuutitigut kanngunartuliorneq imminermini pinerluutinngortinneqarani. Kinguaassiuutitigut kanngunartuliorneq aalajangersakkap isumaa malillugu paasineqassaaq akissarsiutigalugu atoqateqarnertut imaluunniit tassunga assingusutut.

Pinerluttulerinermik inatsimmi § 83, imm. 1 malillugu inuk arnerisitsisutut/anguserisitsisusutut eqqartunneqassaaq

- 1) inuit arlaannik aserorsartitsisoq allat peqatigalugit kinguaassiuutitigut kanngunartuliornermik iluanaarniuteqarnikkut.
- 2) iluanaarutissat pillugit allanik allat peqatigalugit kinguaassiuutitigut kanngunartuliornermik aserorsaaq, imaluunniit
- 3) akilersilluni atortittarfiuteqartoq

Imm. 1 aamma 2-mi piumasaavoq ingerlatami ingerlanneqartumi inuit arlaannik akilersuilluni atoqateqarnermut aserorsaaqassasoq imaluunniit arlaata pinaveersaartissagaa akilersilluni atoqateqartarneq taamaatinneqassasoq, Taamaalilluni pineqarpoq ”atornerluineq”-tut ittoq. Tamanna pissuteqarpoq aalajangersimasumik naliliinermik, ingerlataq taamatut ilisarnaquteqarnerneq. Immikkoortinneqassapput ”iluanaaruteqarniarneq”, paasisariaqartoq annertusutut ataasiugaluartumillunniit pisumi, aamma ”inuussutissarsiut”, paasisassaasoq piumasarineqartoq aalajangersimanerusumik ingerlatsivittut.

Arnerisitsineq/anguserisitsineq pingajuattut tassaasinnaavoq ”akilersilluni atortittarfiuteqarneq”, tak. imm. 1, nr. 3. Akilersilluni atortittarffik tassaavoq inuk akiliinikkut pisisunut atoqateqartussaq najuuttoq. Taamaalilluni piumasaavoq aalajangersimasumik sumiiffeqarnissaq iliuitsit ingerlannissaannut. Aammataaq piumasaavoq (tak. akilersilluni atortittarfimmik ”ingerlatsineq”, pineqartoq ingerlatamik aningaasaqarnikkut soqutigisaqartuusoq.

Arnerisitsinermut/anguserisitsinermut aammataaq § 83, imm. 2-mi pisut allat pingasut, taakkunanga marluk 21-t inorlugit ukiulinnut killiligaasut, eqqartuussaassutigineqarsinnaapput.

Siullertut inuk inummik 21-t inorlugit ukiulimmik kinguaassiuutitigut kanngunartuliornermik inuussutissarsiuteqarnissamik kajumissaarisooq imaluunniit ikiuisooq eqqartuunneqassaaq. Tamatumunga ilaavoq peqataaneq sunaluunniit inuup 21-t inorlugit ukiullip kinguaassiuutitigut kanngunartuliornermik inuussutissarsiuteqarniarneranut peqataasoq, tassunga ilagitillugu kinguaassiuutitigut kanngunartuliornermik inuussutissarsiummik ingerlatsinermik ingerlaqqilluni.

Aappaattut inuk inummik 21-t inorlugit ukiulimmik, taanna allami kinguaassiuutitigut kanngunartuliornermik ingerlatsisinniarlugu imaluunniit taamatut ittumik kanngunartuliornermik Kalaallit Nunaanniit angallassinermut eqqartuunneqassaaq.

Pingajuattut inuk inummik sumiiffimmi allami, kinguaassiuutitigut kanngunartuliornermik inussutissarsiuteqartinniarlugu imaluunniit taama ittumik kanngunartuliornermut peqataatinniarlugu, inuk taanna siunertarisamik paasitinneqarsimanngippat, Kalaallit Nunaanniit angallassinermut eqqartuunneqassaaq. ”Sumiiffimmi allami” paasisassaasoq taakkunani marluusuni taaneqartuni naalagaaffimmi piffiit allat (Danmark aamma Savalimmiut) aamma nunat allat.

§ 83, imm. 3 malillugu eqqartuunneqassaaq inuk kinguaassiuutitigut kanngunartuliornermik siuarsaasoq iluanaarniarnissamik pissuteqartumik imaluunniit akulikinnerusumik uteqattaartumik akunnermiliuttusoq imaluunniit allap inuussutissarsiutaanik kinguaassiuutitigut kanngunartuliornikkut atonerluisoq.

Kiisalu § 83, imm. 4 malillugu eqqartuunneqassaaq inuk akunnittarfimmi imaluunniit unnuisarfimmi inimik inuussutissarsiutigalugu kinguaassiuutitigut assuarnartuliornermut atukkiussisoq. Piumasaavoq inuussutissarsiutigalugu assuarnartuliorneq (kisianni tamatiguunngitsaq tamatumunnga inimik atukkiussinerusoq) pisarpat aalajangersimasumik ingerlatatut.

8.2. Inatsisinik Atuutsitsinermut Ministereqarfimmit isumaliutersuutit aamma aaqqissuussineq siunnersuutigineqartoq

8.2.1. Danskít pillaasarneq pillugu inatsisaata 2013-imi allanngorneratigut taamani pillaasarnermik inatsisip § 228-a arnerisitsinermut/anguserisitsinermut tunngasoq aamma § 229-a akissarsiutigalugu atoqateqarnermi akunnermiliuttutut il.il. ingerlatsineq, imarisamigut pinerluttulerinermik inatsisip § 83-ianut aalajangersakkamut atuuttumut assingusoq atuukkunnaarsinneqarpoq aalajangersakkanilu nutaani allaganngortinneqarluni (§ 233 aamma § 233 a).

Pillaasarneq pillugu inatsimmi § 233, imm. 1-imi aalajangersagakkap nutaap arnerisitsinermut / anguserisitsinermut tunngasup pinerlunninngortippaa inuk inuup allap akiliilluni akiliinissamilluunniit neriorsuilluni pisisumut kinguaassiuutitigut pissusilersorneranut ingerlatsisusoq.

Inatsip allannguutaa tunuliaqutaqarpoq Pillaasarnermik inatsit pillugu Siunnersuisoqatigiit siunnersuutaannik. Inatsisissamut piareersaatini takuneqarsinnaavoq siunnersuisoqatigiit isumaqartut akilersilluni atoqateqartarnermik ingerlatsineq, atortittartup nammineq ingerlatsinera qaangerlugu, taamaallaat inatsisinik naapertuilluni aaqqissugaasinnaammat akilersillutik atortittartut

arlallit naligiimmik ataatsimoornerattut. Siunnersuisoqatigiit taamaalillutik isumaqarput allatut aaqqissueriaatsini akilersillutik atortittartut atornerlugaanissaannut nalorninartoqarpallaartoq. Siunnersuisoqatigiit tassunga atasumik siunnersuutigaat aalajangersagaq atuuffeqarsinnaasoq pineqartoq apeqqutaatinnagu soorlu akilersilluni atortittarnermi, imerniartarfinni atortittarnermi, qanitilluni atortittarnermi imaluunniit aqqusinermi atortittarnermi. Akilersilluni atortittariaatsini tamani atuuppoq, sulisitsisutut tunuliaqutaqarsinnaanera ingerlatsinermik aaqqissuisumik, aamma tunuliaqutaasoq taanna eqqorneqartussaasoq pillaanissamik aalajangersagassatut siunnersuummi.

Inatsisinik Atuutsitsinermut Ministereqarfimmit siunnersuisoqatigiit isumaliutersuutaat siunnersuutaallu isumaqatigineqarput.

Inatsisissatut siunnersuummut oqaaseqaatit nalinginnaat innersuussutigineqarput, imm. 7.2.2.2 aamma 7.2.4, tak. Folketingstidende 2012-13, A, L 141, saqqummiunneratut, qupp. 32 aamma 35-36.

§ 233. imm. 2-p nutaap pinerlunningortippaa inuk atornerluisoq inuup allap inuussutissarsiutigalugu akilersilluni akiliinissamilluunniit neriorsortilluni pisisumik atoqateqarnera, imaluunniit iluanaarutissamisut imaluunniit akulikinnerusumik akunnermiliuttutut pissusilersorluni siuarsaraa inuup allap akilersilluni akiliinissamilluunniit neriorsortilluni pisisumik atoqateqarnera. Aalajangersakkamut tunuliaqutitut inatsisissamut siunnersuummut piareersaatini takussaavoq, Pillaasarnermik inatsisiliorneq pillugu Siunnersuisoqatigiit isumaqartut amerlanerit eqqarsaatigalugit – naak pinngitsaaliineq imaluunniit peqquserlulluni imaluunniit ileqqussaannigitsumik allatut sunniinikkut – pinerlunnerusariaqartoq inuup allap inuussutissarsiutigalugu akilersilluni atortittartuuneranik atornerluineq sivisunerusumik akilersilluni atortittartup isertitaanik pissarsisassalluni, isertitaqartoq inatsisitigut imaluunniit pissusissatigut piomasaqarsinnaatinnagu. Siunnersuisoqatigiit aamma siunnersuutigaat inuit allat akilersillutik atortittarnerannik ingerlatsisuuneq pillaaarneq pillugu aamma inuup allap akilersilluni atortittarnerikkut inuussutissarsiutaanik atornerluineq siunnersuutigineqartup saniatigut pillaaasarnermik aalajangersakkani attatiinnarneqassanngitsut akunnermiliuttuunermik immikkut pinerlunninngortitsinikkut.

Inatsisinik Atuutsitsinermut Ministereqarfimmit siunnersuisoqatigiit isumalersuutaat siunnersuutaallu nalinginnaasumik isumaqatigineqarput, taamaattoq tunuliaqutassaqaarsorinagu akunnermiliuttut ingerlatsinerup pinerlunnerutinnissaata atorunnaarsinnissaa, ministereqarfiup paasinninnera malillugu nalornisitsinermik nalunaarsinnaammat.

Inatsisissatut siunnersuummut oqaaseqaatit nalinginnaat innersuussutigineqarput, imm. 7.2.2.3, 7.2.2.4 aamma 7.2.4, tak. Folketingstidende 2012-13, A, L 141 saqqummiunneratut, qupp. 32 aamma 35-36.

§ 233, imm. 3-p nutaap pinerlunninngortippaa akunnittarffimmi inimik atukkiussineq inuup allap inuussutissarsiutigalugu akiliinikkut akiliinissamilluunniit neriorsuinikkut pisisumik atoqateqarnissaanut. Inatsisissamut piareersaatitigut takussaavoq, tamatuminnga ininik

akigisartagaattut akiliilluni inuussutissarsiutigalugu atortittarnermut pinerlunninngortitsineq siunnersuisoqatigiit paasinninnerat malillugu annertunngitsoq. Akissarsiutigalugu atortittarnermut ininik atortitsineq allanut naleqqiullugu qaffasinngitsumik pillaasarneq pillugu aalajangersakkamut, inuup allap akilersilluni atortittarnermik inuussutissarsiuteqarneranik atonerluinertut, siunnersuisoqatigiit atatitassatut siunnersuutigisaattut, sukanganerusement ilagitinneqassaaq, Pinerlunnerujunnaarsitsinerli siunnersuisoqatigiit paasinninnerat malillugu periarfissiissaaq akunnittarfiuteqarnermik ingerlatsinermi immikkut aaqqissuunneqassasut init atukkiussat (allamut tungatillugu akigitinneqartunik pissusissamisoortunik akilerlugit) inuussutissarsiutigalugu atortittarnermut atugassatut. Siunnersuisoqatigiit tamanna tunngavigalugu taamaattumik tunngavissaqarsorinngilaat pillaasarnermut aalajangersakkamik attuuttumik atorunnaarsitsinissaq.

Inatsisinik Atuutsitsinermit Ministereqarfimmit siunnersuisoqatigiit isumaliutersuutaat siunnersuutaallu isumaqatigineqarput.

Inatsisissamut siunnersuummut oqaaseqarfiginnissutit tamanut atuuttut innersuussutigineqarput, imm. 7.2.2.4 aamma 7.2.4, tak. Folketingstidende 2012-13, A, L. 141, saqqummiunneratut, qupp. 33 aamma 35-36.

§ 233 a nutaap pinerlunninngortippaa, inuup inatsisinik unioqutitsilluni paatsoortitsineramik ersersitsinera, qularunnarsitsinera imaluunniit atonerluinera imaluunniit periaaseq alla ileqqussaannngitsoq atorlugu allamik akiliilluni imaluunniit akiliinissamik neriorsuilluni pisisumik atoqateqartitsinera. Inatsisissamut piareersaatitigut takussaavoq Pillaasarnermik inatsit pillugu Siunnersuisoqatigiit isumaliutigisimagaat pisariaqartoq taamatut immikkut pinerlunninngortitsinerup attatiinnarnissaa piaraluni atonerluinikkut inummik akilersilluni atoqateqarnermut saasaaneq. Siunnersuisoqatigiit oqaatigaat tamatumunnga tunngasumik aalajangersakkamut atuuttumut ilagitinneqassagaanni illuatungaani iliortoq inummik allamik ”saasaasoqartariaqartoq”. tassalu eqqunngitsumik siunertalimmik imaluunniit assigisaannik ileqqussaannngitsunik periaaseqarluni, illuatungatigullu tamanna pisinnaassannngitsoq siunertaralugu iliortoq imaluunniit inuk pingajuusoq aningaasatigut iluanaartoq, tamaannerani pineqassamat inummik niuffateqarneq, tassaasoq pinerlunneq pingaarutilimmik ilungersunarnerusoq. Siunnersuisoqatigiit isumaqarput aalajangersagaq ajoqusiinerugunnannngitsumik tunngaveqarluni atorunnaarsinneqarsinnaasoq atuunnermigut pisariaqannngitsutut Inatsisinik Atuutsitsinermit Ministereqarfimmit siunnersuisoqatigiit isumaliutersuutaat siunnersuutaallu isumaqatigineqarput. Innersuussutigineqarput inatsisissatut siunnersuummut oqaaseqarfiginnissutit tamanut atuuttut, imm. 7.2.2.5 aamma 7.2.4, tak. Folketingstidende 2012-13, A, L 141 saqqummiunneratut, qupp. 33 aamma 35-36.

8.2.2. Inatsisinik Atuutsitsinermit Ministereqarfimmit isumaqarfigineqarpoq isigimasat danskit arnerisitsinermit/anguserisitsinermit il.il. tunngasunut nutaanik allagannngortitsinerannut tunngaviusut annertuutigit isigimasanut Kalaallit Nunaanni atuuttunut assingusuusut.

Taamaalilluni siunnersuutigineqarpoq pinerluttulerinermik inatsimmi § 83 arnerisitsinermut / anguserisitsinermut il.il. tunngasoq nutaamik allaganngortinneqassasoq pillaaasarnermik inatsimmi §§ 233 aamma 233 a naapertorlugit.

Taamaalilluni siunnersuutigineqarpoq pinerluttulerinermik inatsimmi § 83, imm. 1-itut ivertinneqassasoq aalajangersagaq inummik, inuup allap akiliilluni akiliinissamilluunniit neriorsortilluni pisisumik atoqateqarneranik, tamatumani assigiimmik pineqarpat akilersilluni atortittarfik allaluunniit, ingerlatsisuusumik pinerluttunngortitsineq.

Aammattaq siunnersuutigineqarpoq allatigut atorneerluinermut inerteqqut atuuttoq, inuup allap inuussutissarsiutitut akiliilluni akiliinissamilluunniit neriorsorneqarluni pisisumik atoqateqarnera, imaluunniit inummik allamik akiliilluni imaluunniit akiliinissamik neriorsorneqarluni pisisumut iluanaarnissaq siunertaralugu imaluunniit uteqattaartumik akunnermiliuttutut pissusilersoneq, ingerlateqqinneqassasoq § 83, imm. 2-mi.

Peqatigitillugu § 83, imm. 3-mi akunnittarfimmi ininik inuussutissarsiutigalugu atoqateqartarnermut atugassamik atukkiussisarnermik immikkut pinerlutunngortitsisarneq atuuttoq attatiinnarneqassasoq siunnersuutigineqarpoq.

Kiisalu § 83, imm. 4-mi akilersilluni atortittarnermut inummik saasaanerup inerteqqutaanerata nutaanngorsakkatut ilusilerlugu attatiinnarnissaa siunnersuutigineqarpoq, taamaalilluni siunissami inuup inatsisinik unioqqutitsilluni paatsoortitsinermik ersersitsinera, qularunnaarsitsinera imaluunniit atorneerluinera imaluunniit periaaseq alla ileqqussaangitsoq atorlugu allamik akiliilluni imaluunniit akiliinissamik neriorsuilluni pisisumik atoqateqartitsinera pinerlunninngortillugu.

Innersuussutigineqarpoq inatsisissatut siunnersuummi § 1, nr. 17.

9. Kannguttaalliorfigisaaneq

9.1. Inatsisit atuuttut

Pinerluttulerinermik inatsimmi § 84, imm. 1 malillugu inuk kannguttaalliornikkut piitaajuissutsimik innarliisoq imaluunniit tamanut ammasumik mamianartuliortoq kanguttaalliorlutut eqqartunneqassaaq. Taamattaq imm. 2 malillugu atuuppoq inuk assilissamik pigisanilluunniit kinguaassiuutitigut assuarnartuliortunik inummut 16-it inorlugit ukiulimmut tuniniaasoq.

Aalajangersagaq tunngaviatigut atuuppoq aalajangersakkatut ataatsimoorfittut, atuutsinneqarsinnaasutut kinguaassiuutitigut iliuitsinut pinerluttulerinermik inatsimmi kapitali 18-

imi aalajangersagakkanut allanut ilaatinneqanngitsunut, taamaattorli pineqaatiissiinissamut naapertuuttut atorneqarsinnaasutut.

9.2. Inatsisissatut siunnersuutip ilusilenera

9.2.1. Danskit pillaasarneq pillugu inatsisaata 2013-imi allanngortinnerani pillaasarneq pillugu inatsimmi § 232 kannguttaalliorfigisaanermut tunngasoq oqaasertamigut nutarterneqarpoq paasiuminarsarneqarlunilu, taamanikkut allanngortitaanermi pinerluttulerinermik inatsimmi § 84, imm. 1-imut imamigut assingulluni. Inatsisip allanngortinneratigut ”kinguaassiuutitigut kannguttaalliorneq” allanngortinneqarpoq imaalillugu ”kanngunartumik pissusilersorneq”, ”imaluunniit tamanik mamiatsatsitsineq”-mut innersuussineq peerneqarluni. Inatsisissatut siunnersuutit malippaat Pillaasarnermik inatsisiliorneq pillugu Siunnersuisoqatigit siunnersuutaat. Pillaasarnermik inatsit pillugu Siunnersuisoqatigit oqaatigaat tamatumunnga tunngavioq isumaliutissiissuminni nr. 1534/2012, qupp. 595-596-imi ilaatigut oqariaaseq ”kinguaassiuutitigut kanngunartuliorneq” oqaatsitut pisoqalisimasoq, aamma ”imaluunniit tamanik mamiatsatsitsineq”-mik innersuussuteqarneq pisariaarussimasoq, pineqarmata pissutsit ilamerngi oqariaatsimi ”kanngunartumik pissusilersorneq”-mi imaritinneqareersut.

Pillaasarneq pillugu inatsimmi § 216 pinngitsaaliilluni atoqateqarnermut tunngasoq pinerluffigisaasup imatut inissisimaneranik pineqartoq iliuutsimut akisinnaanani, tak. qulaani imm. 4.2.1 atorneqarlunermik ilaqalernerata kinguneranik pissutsit tamakku § 232-mit ilagitinneqarunnaarput.

9.2.2. Inatsisip Atuutsitsinermut Ministereqarfimmit isumaqarfigineqarpoq pinerluttulerinermik inatsip kinguaassiuutitigut pinerluttarnermut tunngasup nalinginnaasumik nutarterneranut atasumik assinganik § 84, imm. 1-imi nutaanngorsaanissaq aamma oqaasertatigut paasiuminarsaanissaq pisariaqartinneqartoq.

Siunnersuutigineqarpoq ”kinguaassiuutitigut kanngunartuliorneq” kingoraarserneqassasoq ”kanngunartumik pissusilersorneq”-mik aamma ”tamanik mamiatsatsitsineq” aalajangersakkami atuukkunnaassasoq.

Oqaatigineqarportaaq, imm. 4.2.2.-mi nalunaarneqartutut, atorneqarlunikkut atoqateqarneq pinerluffigineqartoq inissisimatillugu iliuutsimut akisinnaanani, siunissami ilagitinneqassasoq pinerluttulerinermik inatsimmi § 77-imi pinngitsaaliilluni atoqateqarnermut tunngasumi, tamatumani ilaalluni assinganik § 84, imm. 1-ip atuuffimmigut qumartinera.

Inatsisissatut siunnersuummi § 1, nr. 16 innersuussutigineqarpoq.

10. Meeqqat pornografiliarineqartarnerat

10.1. Inatsisit atuuttut

Pinerluttulerinermik inatsimmi § 85, imm. 1 malillugu meeqqanik pornografiilortutut eqqartuunneqassaaq inuk assinik filminillunniit kanngunartulianik, inunnik 18-it inorlugit ukiulinnik takutitassianik kanngunartulianik nuutsitanik assigisaannillu siammarterisoq.

Oqariaaseq ”assilisat, filmit allallu kanngunartuliatut nuutsitat assigisaallu” ilagaat aamma meeqqanik pornografiiliat takutitassaliat soorlu assit qarasaasiakkut pilersitat meeqqanik pornografiiliarisanik imallit. Atuuffiata avataaniitpput atortussiat kanngunartulianik imarisat kisimik allaganngorlugit nuutsinneqarsimasut.

Oqariaatsimi ”kanngunartut” toraagaapput ilaatigut assilisat takutitsisut meeraq atoqatigiinnermi peqataatinneqartoq, imaluunniit meeraq allatigut assiliinermut atatillugu ilimaginarloq peqqarniitsumik narrunarsaanermik iliorneq pisimasoq soorlu meeraq kinguaassiuutitigut imaluunniit atoqateqarnermut atasumik attuuanaanermut assinut inuttatut atorneqartoq. Meeqqanik mattaangasunik assilisat nalinginnaasut, soorlu sissami pinnguarnermi aalajangersakkatut siunnersuutigineqartut avataanniipput.

”Inuit 18-it inorlugit ukiullit ”-mut innersuussut imatut paasisassaasoq, pineqartoq 18-it inorlugit ukioqartutut isikkoqarpat, iliuuseqartullu uppersarsinnaanngippagu pineqartoq ilumut 18-ileereersimasoq, pinerluutip imaata ilaa naammassineqarsimasutut isigineqassaaq.

Oqaaseq ”siammarterpaa” ataatsimoortumik taaguutaavoq iliuitsinut pinerlunninngorsimasunut. Oqaasertaliinermut ilagittinneqarpoq siammarterineq sunalunniit, tamatumunnga ilaallutik, avammut niuerneq, siammarterineq, nuussineq il.il. Meeqqanik takussutissiatut pornografiilianik siammartigassiaralugit misiligutitut sanaartortarneq pinerluttuliornerusussaavoq.

§ 85, imm. 2 malillugu eqqartuunneqassaaq inuk inunnik 18-it inorlugit ukiulinnik assilisanik filmilianillunniit assuarnartulianik, allanik assuarnartuliatut takutitassalianik nuutanik assigisaannillu pigisalik imaluunniit akiliuteqarnikkut nalunngisaqalersoq. Aalajangersakkamulli ilaangilaq inummik 15-ileerersimasumik assuarnartulianik assilisanik pigisaqarneq, pineqartoq pigisaqarnermut akuersisimappat, tak. § 85, imm. 3. Kisianni meeqqanik mattaangasunik assilisat nalinginnaasut nalunaarneqartut malillugit pinerluttunngornerup avataanniipput, assilisat taama ittit oqariaatsimut ”assuarnartut”-nut ilagittinneqanngimmata.

.

TV-kkut aallakaatitanik assilisanillunniit paasisutissanik qitiusumik toqqorsivimmeersunik

nammineq qarasaasiarisap seqersitsiviatigut isiginnaarnermi, assiliasat isiginnaartup pigisaasut oqaatigineqarsinnaanngillat. Assilli toqqorneqarnerat pineqarpat, taamaalilluni pineqartoq assilissamik saqqummeqqissitsisinnaalersillugu, atortussiat isigineqassapput pineqartup pigisaasut.

Aalajangersakkamut aamma ilagitinneqarpoq pisoq inuup meeqqat pornografiiliarinerannut atortussiat pissusiinik, aalajangersakkami taaneqartumik, akiliinikkut nalunngisaqalenera. Piginninnerup pinerlunninngortinneranut taamaalillutik ilagitinneqarput pisut, inuup – piginninnivik pineqanngikkaluarpullunniit – akiliinikkut meeqqat pornografiiliarinerannik nalunngisaqalenera. Pisut piaarinaatsuinerugaluartutut ittut, internetimi atuisut immikkoortunut immikkut ittunut isertarnerat, tamatumani meeqqat pornografiiliarineqarnerannut iserneq akeqarani, aalajangersakkap avataaniipput. ”Akiliuteqarneq”-up taaneqartup ilagaa akiliineq qanorluunniit ittoq, tassunga ilagitillugu tunniussanik allanik taarsiineq. Pingaaruteqanngilaq akiliuteqarneq qanoq apuunneqarnerasoq, tassunga ilaalluni akiliineq soorlu ingerlatinneqartoq internetimik tuniniaasukkut imaluunniit pisoq toqqannartumik meeqqat pornografiiliarineranni atortussianik nittartakkamik piginnittumut akilerneqarpat.

Aammattaaq § 85, imm. 4 malillugu eqqartuunneqassaaq inuk inummik 18-it inorlugit ukiulimmik assuarnartulianik assilisanik, filmilianik assigissaannillu atortussiaminik tuniniaanissaq imaluunniit allatigut siammarterinissaq siunertaralugit suliaqartoq.

Aalajangersakkami piumasarineqarpoq inuup 18-it inorlugit ukiullip nalunngissagaa, assiliasat assuarnartuliat il.il. suliarineqartut. Anngiortumik assiliineq imaluunniit assinik suliaqarneq § 84-imut attuumassuteqarpoq (kanngutsaalliorfigisaaneq) imaluunniit § 94, imm. 1. nr. 4-mut (inummik sumiiffimmi tamaniunngitsaq najorneqarsinnaasumi) assiliineq ilaavoq.

Immiussinerit aalajangersakkamut ilaatinneqassagunik imaqqassapput assilisanik assuarnartulianik. Tamatumani pineqarput assuarnartutut ilisat takutitsisut kujannermik imaluunniit pissutsinik kujannermut assingusunik. Aammattaaq immiussinerit ilagitinneqarput allatigut immiussinermut atasumik ilimagineqarpat peqqarniitsumik narrunarsaataasumik iliorsimaneq, soorlu inuk atorneqarsimappat kinguaassiuutinik imaluunniit atoqateqarnermut eqqaanartumik attuanninnermut assilisittutut.

Pinerlunnermik iliornermut ilagitinneqarput ”assuarnartuliorluni assilisanik, filmilianik imaluunniit taakkununga assingusut”-nik immiussineq. Oqaariaatsimut ”taakkununga assingusut”-nut ilagitinneqarput assinik nuussinerit, s.i. assit toqqaannartumik nuutassiat, toqqorsinertaqanngitsut.

Pornografiilianut assilisittutut inunnik 15-it inorlugit ukiulinnik atuneq aammattaaq ilagitinneqarsinnaavoq § 79-imut (meeqqamik 15-it inorlugit ukiulimmik kujanninneq imaluunniit atoqateqarneq).

Innersuussutigineqarput suliat § 85-imut piareersaataasut, tak. Folketingstidende 2007-08,

tapiliusseq A, qupp. 1660-1661.

10.2. Inatsisinik Atuutsitsinermut Ministereqarfimmit isumaliutersuutit aamma aqqissuussineq siunnersuutigineqartoq

10.2.1. Danskit pillaasarneq pillugu inatsimmik 2013-imi allanngortitsineranni pillaasarneq pillugu inatsimmi § 235-mi meeqqanik pornografiiliarinnittarneq pillugu oqaasertatigut nutaanngorsaasoqarpoq, taamaalilluni ”assuarnartut” allanngortinneqarluni imaalilluni ”pornografiiliat”. Oqaasertatigut nutaanngortitsinermi siunertarineqanngilaq iliuutsit imarisaasa aalajangersakkaniittut allannguiffiginissaat.

Aammattaaq pillaasarneq pillugu inatsimmi § 235, imm. 3-mi, inummik 15-it sinnerlugit ukioqalereersimasumik assilisanik assuartulianik pigisaqarnissamut akuersisimasumut, piginnittuunerup pinerlunninngortinnginnera, annertusineqarpoq assiliivimmik assilisanut filmilianullu. Inatsimmut piareersaataasuni takuneqarsinnaavoq Pillaasarnermik inatsiseqarneq pillugu Siunnersuisoqatigiit ilaatigut oqaatigigaat, pingaartorsiutaannginnerusoq 15-inik ukiulimmik pornografiinik ataasiakkanik pigisaqarnissaq pineqartumik pornografiimik filmiliavimmik pigisaqarnerminngarnit. Taamaakkaluartoq siunnersuisoqatigiit isumaqarput uninngasunik assit assilisallu sarsuatitat, tassunga ilagitillugit filminit qiukkat sivikitsut, teknikimik atortoqarnerup nalaani ineriartornermi immikkoortitsinissaq naleqqukkunnaartoq.

Tamatumunnga atatillugu taaguut ”akuersissummik tunniussisimasoq” allanngortinneqarpoq ”akuersisimasoq”-mut. Tamatumani siunertarineqarpoq erseqqissisissallugu pigisaqarnermik akuersineq nammineq tunuartinneqarsinnaammat kinguneqartumik piginnittuarneq ilanngussinnginnermik aalajangersagaq malillugu pillaatissiissutissaajunnaarmat.

Inatsisinik Atuutsitsinermut Ministereqarfimmit siunnersuisoqatigiit isumaliutersuutaat siunnersuutaallu isumaqatigineqarput.

Inatsisissatut siunnersuummut oqaaseqaatit nalinginnaat innersuussutigineqarput, imm. 8.2.4 aamma 8.2.6, tak. Folketingstidende 2012-13, A, L 141 saqqummiunneratut, qupp. 38-39.

Pinerluttulerinermik inatsimmi § 85-ip assigai pillaasarneq pillugu inatsimmi §§ 226-mik aamma 235-mik siornatigut oqaasertaliinerit.

10.2.2. Danskit pillaasarneq pillugu inatsisaani inatsit nr. 319, apriliip 28-anni 2009-meersumi § 235, imm. 2, meeqqat pornografiiliarineqartarnerannut atortussanik pigisaqarnermut tunngasoq

annertusineqarpoq ilagitilerlugit pisut inuup siunertalimmik internetikkut il.il. meeqqat pornografiiliarinerinik atortussanik pissarsiornera, naak atortussiat toqqorsivianniingikkaluartut soorlu pineqartup qarasaasiaani, aamma atortussianik pissarsineq akiliutitaqanngikkaluartuq.

Inatsimmi siunertaavoq meeqqat kinguaassiuutitigut atonerlunneqaratik atoqatigiinnermilu atonerlunneqaratik Illersugaanissaat pillugu Europarådip Isumaqatigiissutaanik danskit atortussanngortitsinissaat pisinnaanngortinniassallugu. Isumaqatigiissutip artikel 20, imm. 1, litra f-iani aallavigalugu naalagaaffiit qularnaassavaat paasisitsiaanermut attaveqatigiinnermullu teknikikkut atortussiat ikiortigalugit piaaraluni meeqqanik pornografiimik periarfissarsiornerup pillarneqaatigineqartarnissaa. Danmarkimili internetikkut pornografiimik isiginnaarnerup pinerlunninngortinneqartarneranik apeqquq isumaqatigiissutip atortilinnginnerani isumaliutersuutigineqarsimavoq. Inatsisilik Atuutsitsinermut Ministereqarfiup aningaasatigut pinerluttuliorneq aamma paasissutissat atorlugit pinerluttarneq pillugu ataatsimiititaliaata (Brydesholt-udvalget) tamatumunnga tunngasumik isumaliutissiisummut ilagittinneqartumi nr. 1377/1999-mi meeqqat pornografiiliarineqartarnerat aamma IT-kkut paasiniaasarneq pillugit, qupp. 58 f.-imi ilaatigut oqaatigaa. meeqqat pornografiiliarineqartarnerannut internetikkut atortussiat pisuni arlalinni toqqorneqartariaqanngitsut/aaneqartariaqanngitsut, pissutigalugu internetimik atuisoq pineqartuq meeqqat pornografiiliarineqartarnerata ilaanni immikkut ittunut isiginnaarsinnaammat (nittartakkanut il.il.). Ataatsimiititaliaq tamanna tunngavigalugu isumaqarpoq naammassanngitsoq, pinerlunninnguinerup avataatigut tigusinnaasamik piginninnermik atueriaaseq annertuutigut taarsigaasimammat. Innersuussutigineqarpoq Folketingstidende 2008-09, tapiliussaq A, qupp. 244.

10.2.3. Inatsisilik Atuutsitsinermut Ministereqarfimmit isumaqarfigineqarpoq danskit 2009-mi aamma 2013-imi meeqqanik pornografiiliarinnittarnermik aalajangersagaannik allannguinerannut annertusisitsinerannullu tunuliaqutaasutut isigimanninneq, annertuutigut Kalaallit Nunmaanni atuuttunik isigimanninnermut annertuutigut assingusoq.

Taamalilluni siunnersuutigineqarpoq pinerluttulerinermik inatsimmi § 85, imm. 1, 2 aamma 4-mi oqaasertatigut nutaanngorsaasoqassasoq, taamalu ”assuarnartut” “pornografii”-mik allanngortinneqarluni.

Siunnersuutigineqarportaaq pinerluttulerinermik inatsimmi § 85, imm. 2-mi, meeqqanik pornografiilianik piginninnermut nalunninnginnermullu tunngasoq annertusineqassasoq piaaraluni meeqqanik pornografiilianik pissarsiornermut atortussanik internetikkut il.il. oissarsiorarneq ilagilerlugu, naak atortussiat toqqorneqanngikkaluartut, aamma atortussanik pissarsineq akiliuteqarfigineqanngikkaluartuq. Oqaatigineqarportaaq aalajangersagaq taama ittoq – qulaani imm. 7.2.2.-p ataani aalajangersagassatut siunnersuutigineqartumut, inuk 18-it inorlugit ukiulik pornografiimik takutitassiorluni pissusiliornermut peqataasoq taamalu ittumut isiginnaarnermut peqataasoq - tunngavissaasut meeqqat kinguaassiuutitigut atonerlunneqaratik atoqatigiinnermilu

atornelunneqaratik illersugaanissaannik Europarådip isumaqatigiissutaanut Kalaallit Nunaata kingusinersukkut atortussanngortitsinissaanut, tamanna pisassangorsimappat.

Tamatuma saniatigut siunnersuutigineqarpoq § 85, imm. 3-mi pinngitsoortitsisinnanermik aalajangersagaq nutaamik allaganngortinneqassasoq oqaasertalerneqarlunilu, taamaalilluni ilagitilerlugit inummik 15-inik ukioqalereersimasumik assiliivimmik assilisat, filmit assigisaallu pineqartoq piginnittutut akuersisimappat.

10.2.4. Kiisalu siunnersuutigineqarpoq pinerluttulerinermik inatsimmi § 85, imm. 4-p atuussinnaaffia annertusineqassasoq ilagitilerlugu pinerluffigineqartup ukioqqortussusianik isigimanninneq.

Aalajangersagaq taassumunga assingusooq siumugassaavoq danskit pillaasarneq pillugu inatsisaanni § 228-mi, taannalu malillugu § 226-mik inummik 18-t inorlugit ukiulimmik pornografiimik assiinerlut, filmiliornermut assigisaannulluunniit tunngasumik unioqqutitsisimaneq, pinerluffigineqartup qanoq issusianik iliortup ilisimanninnginnerata kinguneranik iliortoq piaaraluneersimasutut oqaatigineqarsinnaanngimmat, pillarneqassasoq allanut naleqqiullugu pillaammik sakkukinnerusumik, pinerliisoq taamaattoq mianersuaaliorluni iliorsimappat.

Qulaani Imm. 6.2.2.-mi aamma 7.2.2.-mi taaneqartutut Pillaasarneq pillugu inatsisiliornermi Siunnersuisoqatigiit pillaasarneq pillugu inatsisip 2013-mi allanngortinneranut atasumik isummerfigaat pinerluffigineqartup ukioqqortussusia tunngavigalugu mianersuaalliornermik pinerlunninngortitsisarneq attatiinnarneqartariaqarnersoq. Siunnersuisoqatigiit tamatumunga tunngatillugu ilaatigut oqaatigaat inummut 18-it inorlugit ukiulimmut mianersuaalliornerup pinerlunninngortinneqartarnera attatiinnartariaqartoq pineqartillugit atoqatigiinnikkut atornerluineq imaluunniit atornerluineq. Siunnersuisoqatigiit tamatumunnga tunngatillugu ilaatigut innersuussutigaat pillaasarneq pillugu inatsimmi aalajangersagaq, siammarterinissaq siunertaralugu pornografiimut assiliinerlut imaluunniit filmiliornermut tunngasoq. Inatsisilik Atuutsitsinerlut Ministereqarfimmit isumaqatigineqarput siunnersuisoqatigiit isumaliutersuutaat siunnersuutaallu. Innersuussutigineqarput inatsisissatut siunnersuummut oqaaseqaatit nalinginnaasutt, imm. 10.2.2.2 aamma 10.2.4, tak. Folketingstidende 2012-13, A, L 141 saqqummiunneratut, qupp. 44-45.

Inatsisilik Atuutsitsinerlut Ministereqarfiup paasinninnera imaappoq, pingaartumik inuit 18-it inorlugit ukiullit atoqatigiinnikkut atornerlugaanermut imaluunniit atornerlugaanermut illersorniarlugit isigimanninnerup assinga Kalaallit Nunaanni assisaanik atuuttoq, taamaattumillu mianersuaalliornerup assigisaanik pinerlunninngortinngortinnissaa siunnersuutigineqassasoq. Tamatumunga tungatillugu oqaatigineqarpoq pinerluffigisap inuusuttutut ukioqqortussusianut atasumik mianersuaalliorneq nalitsinni pinelunninngortitaareersoq pinerluttulerinermik inatsimmi § 79-imi (meeqqanik kinguaassiuutitigut atoqateqartarnermut tunngasumi), § 80-imi (inummik 18-it inorlugit ukiulimmik pisut assigiinngitsunik ussiiniarneq) aamma § 81-imi (inummik inuusuttumik

atoqateqarneq, qulaani imm. 6.2.2-mi eqqartorneqartut).

Taamaattoq pillaasarneq pillugu inatsimmi §228-mi aalajangersagaq mianersuaalliorqartillugu pillaatip atsikkutigiissumik sakkukinnerusumik uuttuutigineqartarnissaanut tunngasoq ilanngunneqassanngilaq, pinerluttulerinermik inatsimmi pineqaatissiisssutinik aalajangersaasarnerni immikkut malittarisat pissutigalugit.

Inatsisissatut siunnersuummi § 1, nr. 17-20 innersuussutigineqarput.

11. Inunnik niuffateqartarneq

11.1. Inatsisit atuuttut

Pinerluttulerinermik inatsimmi § 93 malillugu inuk pissarsiniartoq, angallassisoq, nuussisoq, ineqartitsisoq imaluunniit kinguneratigut inummik tikisitsisoq, inunnik niueruteqartut eqqartuunneqassaaq, tamatumani atorneqarlutik imaluunniit atorneqarsimallunik § 91 malillugu inatsisit uniorlugit pinngitsaaliineq, § 92, oqaaseqatigiit siulliit malillugit kiffaanngissusiiiaaneq § 98 malillugu qunusaarinerit, inatsisinut akerliusumik ersersitsineq, kukkusumik tammaasorininnermik sakkortusisitsineq imaluunniit atornerluineq imaluunniit pineqartup kinguaassiuutitigut ileqqorlutsinneratigut pineqartumik atornerluinissaq siunertaralugu allatigut pissusissaanngitsumik periuseq, pinngitsaaliilluni sulisitsineq, inussiaateqarneq imaluunniit inussiaateqarnermut assingusumik pissusiliorneq imaluunniit timit pisataannik peersineq, eqqartunneqassaaq inunnik niuffateqartutut.

§ 93, imm. 2 malillugu assigisaa atuuppoq, inuk inummik pineqartumik ilaatigut kinguaassiuutitigiut kanngunartuliornikkut, pinngitsaaliilluni sulisitsinikkut, inussiaateqarnikkut imaluunniit inussiaateqarnermut assingusumik iliornikkut imaluunniit timip pisataanik peersinikkut atornerluiniarluni inuttassarsiuisoq, angallassisoq, nuussisoq, ineqartitsisoq imaluunniit kinguneratigut inummik 18-it inorlugit ukiulimmik tikisitsisoq imaluunniit akiliisoq imaluunniit allatut iluaqutissarsiortoq anguniarlugu inummit pinerluffigineqartumik oqartussaffiginnittumit atornerluinissamut akuersisummik pinissaq, aamma tassaasumit taamatut akiliisitsisoq allatigulluunnit iluaqutissarsisoq.

11.2. Inatsisunik Atuutsitinermit Ministereqarfimmit isumaliutersuutit aamma aqqissuussineq siunnersuutigineqartoq

11.2.1. Danskit pillaasarneq pillugu inatsisaata 2013-imi allanngornerani § 262 a-mi inunnik niueruteqarnerut tunngasumi oqaasertatigut nutaanngorsaasoqarpoq, taamaasilluni ”kinguaassiuutitigut kanngunartuliorneq” imatut taarserneqarluni ”akilersilluni atoqateqartarneq, pornografiinik assinik filminillu assiliineq, pornografiimi takutitassiamik isiginnaartitsineq”.

”Akissarsiutigalugu atortittarneq”-mi pineqarpoq pisisumut akilersilluni imaluunniit akiliinissamik neriorsortilluni atortittarneq. ”Pornografiimi assilisanik imaluunniit filminik assiliineq”-mi pineqarput § 226-imi ”pornografiimi assilisanik filminik assigisaannillu assiliineq (soorlu qulaani imm. 10.2-p ataani eqqartorneqartut) assigisaat. ”Pornografiimik takutitsinermik isiginnaartitsineq” paasisassaavoq § 227-mi (qulaani imm. 7.2-mi eqqartorneqartut) pineqartup pissuseqataatut. Innersuussutigineqarput aalajangersakkamut piareersaatit, tak. Folketingstidende 2012-13, A, L 141 saqqummiunneratut, qupp 68-69.

Pinerluttulerinermik inatsimmi § 93-ip assigaa pillaasarneq pillugu inatsimmi § 262 a-p siusinnerusukkut allaganngortinnera.

11.2.2. Inatsisinnik Atuutsitsinermut Ministereqarfimmit paasinninneq unaavoq pinerluttulerinermik inatsisip kinguaassiuutitigut pinerlunnerit pillugit aalajangersagaanik nalinginnaasumik nutaanngorsaanerup assinganik pinerluttulerinermik inatsimmi § 93 nutaanngorsartariaqartoq.

Taamaalilluni siunnersuutigineqarpoq pinerluttulerinermik inatsimmi § 93, imm. 1 aamma 2 allanngortinneqassasut, taamaalilluni ”kinguaassiuutitigut kanngunartuliornissaq ”-mik siunertaqarluni atornerluineq allanngortinneqassasoq imatut ”akissarsiutigalugu atortittarneq, pornografiimi assinik imaluunniit filmilianik assiliineq, pornografiimi takutitassianik isiginnaartitsineq.”

”Akissarsiutigalugu atortittarneq” tamatumunnga atasumik paasisassaavoq tassaasoq akiliilluni imaluunniit akiliiniarluni neriorsuilluni pisisumik atoqateqarneq. ”Pornografiimi assilisanik imaluunniit filmilianik assiliineq” paasisassaavoq § 85, imm. 4-mut naapertuuttumik (inummi 18-it inorlugit ukiulimmik pornografiimi assilisanik, filmilianik imaluunniit assigisaannik assiliineq pillugu), ”imaluunniit assigisaannik” § 93-imut ilagittinneqassanngitsutut siunnersuutigineqaraluarpalluunniit apeqqutaatinnagu. ”Pornografiimi takutitassianik isiginnaartitsineq” paasineqassaaq oqariaatsip § 82-imi (inuup 18-it inorlugit ukiullip pornografiimi

pornografiimik takutitassiami tamatumaniilu najuunnermi peqataanera pillugu) isiginnaartitsinermi ilanngunneqartup pissusiatut.

Innersuussutigineqarpoq inatsisissatut siunnersuummi § 1, nr. 21.

12. Suliani inunnik niuffateqarnermut tunngasuni illersuisut

12.1. Inatsisit atuuttut

Kalaallit Nunaanni eqqartuussisarneq pillugu inatsimmi § 333, imm. 1 malillugu, eqqartuussisarneq pillugu inatsit atuuttoq malillugu ilaatigut kinguaassiuutigut pinerluttuliornermi suliani assigiinngitsuni, (pinerluttuliornermik inatsimmi §§ 74, 77-81 aamma 84, imm. 1) pinerluffigisaasup noqqaassuteqarneratigut eqqartuussivik illersuisumik. pinerluffigisaasumik tapersersuisusssamik siunnersuisussamillu ivertitsisarpoq, imaassimanngippat inatsisinik unioqqutitsineq pissutsimigut persuarsiuutissaannginnerusoq imaluunniit illersuisumik tapersersorteqarneq malunnartumik pisariaqarsorinanngippat. Pinerluffigisaasoq 15-it inorlugit ukioqarpat pinerluffigisaasoq piginnaatitaassaaq illersuisoqarnissamat, suliani pineqarpata pinerluttulerinermik inatsimmi §§ 74 aamma 77 – 81.

Aalajangersagarli suliani pinerluttulerinermik inatsimmi § 93-imut inunnik niuffateqarnermut tunngasumut ilaasuni illersuisumik ivertitsinissaq periarfissaqartitsinngilaq.

Illersuisup suliassai erseqqinnerusumik saqqummiunneqarput illersuisup suliassai qanoq iliorsinnaatitaaffiilu pillugit nalunaarut nr. 241 marsip 18-ianni 2011-meersukkut. Illersuisup suliassaasa ilaattut ilaatigut unaasinnaavoq pinerluffigisaasup pinerluttulerinermik suliap ingerlatinneranik nassuiaannissaanut ilaaneq, aamma illersuisup pinerluffigisaasoq najuuteqatigisinnaavaa eqqartuussivimmi aamma suliap misissuiffiginerani, soorlu pinerluffigineqartup politiinit apersorneqarnerani. Aammattaaq illersuisup pinerluffigisaasoq ilitersorsinnaavaa pinerluffigisaasunut periarfissarititanik, assersuutigalugu tarnip pissusiinik ilisimasalimmit ikiorserneqarnissamik il.il. Danskilli eqqartuussisarneq pillugu inatsisaat malillugu illersuisut eqqartuussisusilerisut assignagit illersuisoq eqqartuussivimmut tunngasunik piginnaatitaanngilaq suliassaqaranilu.

12.2. Inatsisinik Atuutsitsinermit Ministereqarfimmit isumaliutersuutit aamma aaqqissuussineq siunnersuutigineqartoq

Inatsisit nr. 228 apriliip 2.-ani 2003-meersukkut danskit eqqartuussisarneq pillugu inatsisaanni §

741 a illersuisutut eqqartuussissuserisumik piginnaaniliisarnermut tunngasoq annertusineqarpoq inunnik niuffateqartarnermik suliat ilagittinneqalerlutik. Tarnip pissusiatigut suleriaatsimilu pissutsit, illersuisutut eqqartuussissuserisumik ivertitsinermut tunngaviusut tamatumunnga tunuliaqutaasutut oqaatigineqarpoq, taakkualu suliani inunnik niuffateqarnermut tunngasuni assigisaanik atuuttut oqaatigineqarluni, tamatumani pineqarsinnaammata pinerluffigineqartumik kinguaassiuutitigut atornerluineq, imaluunniit atorneqarsimalluni inatsisinik unioqqutitsilluni pinngitsaaliineq imaluunniit kiffaanngissusiiaaneq. Innersuussutigineqarput inatsisissatut siunnersuummut oqaaseqaatit nalinginnaat, tak. Folketingstidende 2002-03, tapiliussaq A, qupp. 2621-2622.

Inatsisinik Atuutsitsinermut Ministereqarfimmit paasinnineq unaavoq isigimasat danskit eqqartuussisarneq pillugu inatsisaanni illersuisutut eqqartuussissuserisumik piginnaaniliineq pillugu malittarisassanik annertusisitsinermut tunngaviusut, illersuisumik ivertitsineq eqqarsaatigalugu Kalaallit Nunaanni isigimasat annertuutitigut assigigaat.

Taamaattumik siunnersuutigineqarpoq eqqartuussisarneq pillugu inatsimmi § 333 allangortinneqassasoq, taamaalilluni aamma pinerluttulerinermut inatsimmi § 93-imik inunnik niuffateqarnermut tunngasumik unioqqutitsinernik suliassani pinerluffigisaasup noqqaassuteqareerneratigut illersuisumik ivertitsisoqarsinnaanngorlugu.

Inatsisissatut siunnersuummi § 2 innersuussutigineqarpoq.

13. Pisortanut aningaasaqarnikkut allaffissornikkullu kinguneri

Inatsisissatut siunnersuut suliassaqaqarfinni ilaatinneqartuni suliassat annertuserannik kinguneqassasoq naatsorsuutigineqarpoq. Tamatumunnga aningaasartuutaanerusut Inatsisinik Atuutsitsinermut Ministereqarfummut atugassiissutit iluanni akilerneqarnissaat ilimagineqapoq.

14. Inuussutissarsiortunut il.il. aningaasaqarnikkut allaffissornikkullu kinguneri

Inatsisissatut siunnersuut inuussutissarsiortunut il.il. aningaasaqarnikkut allaffissornikkullu kinguneqassanngilaq.

15. Innuttaasunut allaffissornikkut kinguneri

Inatsisissatut siunnersuut innuttaasunut allaffissornikkut kinguneqassanngilaq.

16. Avatangiisinut kinguneri

Inatsisissatut siunnersuut avatangiisinut kingunessanngilaq.

17. EU-mi inatsiseqarnermut pissutsit

Inatsisissatut siunnersuut EU-mi inatsiseqarnermut sammisortaqaanngilaq.

18. Oqartussat aamma suliniaqatigiiffiit il.il. tusarniaaffigineqartut

Inatsisissatut siunnersuummut missiliuut 5. december 2016-imiit 16. januar 2017-imut oqartussanut suleqatigiiffinnullu il.il. tusarniaassutigalugu nassiussorneqarpoq:

Nunatta Eqqartuussivia, Kalaallit Nunaanni Eqqartuussiviit, Domstolsstyrelsen, Datatilsynet, Rigsadvokaten, Rigspolitiet, Kalaallit Nunaanni Politimesteri, Direktoratet for Kriminalforsorgen, Kalaallit Nunaanni Pinerluuteqarsimasunik Isumaginiffik, Den Danske Dommerforening, Dommerfuldmægtigforeningen, Kredsdommerit Peqatigiiffiat, Foreningen af Offentlige Anklagere, Politiforbundet, Kalaallit Nunaanni Politiit Peqatigiiffiat, Danske Advokater, Kalaallit Nunaanni Illersuisut Peqatigiiffiat, Landsforeningen af Forsvarsadvokater, Amnesty International, Børnerådet, Børnesagens Fællesråd, Peqatigiiffik Kalaallit Meerartaat, Børns Vilkår, Center mod Menneskehandel, Danner, Dansk Røde Kors, Det Kriminalpræventive Råd, Hjælp Voldsofre, Institut for Menneskerettigheder, KFUKs sociale arbejde, Kriminalpolitisk Forening (KRIM), Kvinderådet, Landsforeningen for Voldsramte Kvinder, Landsorganisationen af Kvindekrisecentre, Landsorganisationen mod seksuelle overgreb, Offerrådgivningerne i Danmark, Pro Vest, Red Barnet, Reden International, Retspolitisk Forening, Retssikkerhedsfonden, Seksualpolitisk Forum aamma Sexarbejdernes Interesseorganisation.

Aammattaaq inatsisissatut siunnersuut piffissami 1. maj 2017-imiit 2. juni 2017-imut oqartussanut suleqatigiiffinnullu il.il. tusarniaassutigalugu nassiussuunneqarpoq:

Aasianni qimarnguik, Dansk Psykologforening – Kalaallit Nunaanni immikkoortoqarfik, Kalaallit Nunaanni Isumaginninnermut Naammagittaalliuuteqartarfik, Inuit Pisinnaatitaaffiinut Kalaallit Nunaata Siunnersuisoqatigiivi, Kalaallit Eqqartuussisuserisut, qimarngui Illermit, Ilulissani qimarnguik, KANUKOKA, Kommunerqarfik Sermersooq, Meeqqat Inuusuttullu

Oqaloqatigiinnittarfiat (MIO) – Børnetalsmanden, Narsami qimarnguik, Nuummi qimarnguik, Paamiuni qimarnguik, Qaqortumi qimarnguik.

Aammattaaq inatsisissatut siunnersuummut missiliuut Kalaallit Nunaanni Namminersorlutik Oqartussanut oqaaseqarfigisassatut saqqummiunneqarpoq.

19. Eqikkakkatut immersugaq

	Kingunissat ajungitsut/aningaasartuutit annikinnerusut (aappimik akiguit, amerlassusaat taakkit)	Kingunissat pitsaangitsut/aningaasartuutit annertunerusut (aappimik akiguit, amerlassusaat taakkit)
Naalagaaffimmut, kommuninut nunallu immikkoortuinut aningaasaqarnikkut kinguneri	Pingaarutilinnik soqanngilaq	Pingaarutilinnik soqanngilaq
Naalagaaffimmut, kommuninut nunallu immikkoortuinut allaffissornikkut kinguneri	Pingaarutilinnik soqanngilaq	Pingaarutilinnik soqanngilaq
Inuussutissarsiortunut aningaasaqarnikkut kinguneri	Soqanngilaq	Soqanngilaq
Inuussutissarsiortunut allaffissornikkut kinguneri	Soqanngilaq	Soqanngilaq
Avatangiisinut kinguneri	Soqanngilaq	Soqanngilaq
Innuttaasunut allaffissornikkut kinguneri	Soqanngilaq	Soqanngilaq
EU-mi inatsiseqarnermut pissutsit	Inatsisissatut siunnersuut EU-mi inatsisiliseqarmut sammisortaqaanngilaq	

EU-mi inatseqarnikkut pisussaaffinnik atuutsitsilerneq	AAP	NAAGGA
		X

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Siunnersuutigineqarpoq kinguaassiuutitigut pinerluttarnerit pillugit malittarisassat oqaatsitigut nalinginnaasumik nutarsarnejassasut, taamaalillutik ”kinguaassiuutitigut allatut atoqateqarneq” pinerluttulerinermik inatsimmi innersuussutit allanngorlugit imaalillugit: ”atoqateqarnermi pissuseqarneq alla”. ”Atoqateqarnermi pissuseqarneq alla” tamatumunnga atatillugu paasineqassaaq tassaasoq atoqateqarneq utsutsigut iteruillunilu atoqateqarnermit allaasoq.

Taamaalilluni nutaatut piumasarineqarpoq pinerluttulerinermik inatsimmi oqariaatsitut ”kujanninneq”-mut siunissami iteruilluni kujanninneq ilaalissaq (suaaassutsikkut assigiinngitsut assigiillu akornanni).

Aammattaaq nutaatut piumasarineqarpoq oqariaaseq siunissami ”atoqateqariaaseq alla”-mut ilaassasut inuit suaassuseqatigiinngitsut suaassuseqatigiillu akornanni atoqateqarneq ilaassasoq. Tamatumani pineqanngilaq inatsimmik atuuttumik allanngineq, tassami pinerluttulerinermik inatsisip § 82-ip kingunerimmagu pinerluttulerinermik inatsimmi §§ 77-81-imut aalajangersakkat assigiimmik atuuffeqarnerat isigimallugu kina suiassuseqammik atoqateqarnerisooq.

Tamanna kinguneqarpoq pinerluttulerinermik inatsimmi § 82-ip atuuffeerunneranik, taamaattumik aalajangersakkap atorunnaarsinneqarnissaa siunnersuutigineqarpoq, tak. inatsisissatut siunnersuummi § 1, nr. 14.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.2 innersuussutigineqarpoq.

Nr. 2-mut

Pinerluttulerinermik inatsimmi § 74 malillugu inuk aaqatigalugu kinguleriissumik ilaquuttanik imaluunniit qatannгимminik angummik arnamilluunnii kinguaassiuutitigut atoqateqartoq allatulluunniit kinguaassiuutitigut atoqateqartoq ilaquuttamik atoqateqarsimasutut

eqqartuunneqassaaq.

Aaqatigalugu kinguleriissumik ilaqtanik kinguaassiuutitigut atoqateqarnerup inerteqqutaanera aamma qitornavissiartaanut kinguleriissumik ilaquataasunut annertusineqassasoq siunnersuutigineqarpoq. Akerlianilli qatanngutigiit kinguaassiuutitigut atoqatigiinnissaannik inerteqqut atuuttoq aaqatigalugu qatanngutitut suli killilerneqartussaassaaq.

Tamatuma kinguneranik siunnersuutigineqarpoq pinerluttulerinermik inatsimmi § 80, imm. 2 (inatsisissatut siunnersuummi § 1, nr. 14) qitornavissianik, qitornarsianik paaqqutarisanik il.il. 18-it inorlugit ukiulinnik atoqateqarneq pillugu aalajangersakkami attuttumi qitornavissianut tunngasumik innersuussut aalajangersakkamit piissasoq..

Siunnersuutip taamaalilluni kingunerissavaa qitornavissiallit qitornavissiallu 18-it inorlugit ukiullit akornanni, angajoqqaat taakkualu qitornaasa qitornavissiaasa 15-it qaangerlugit ukiullit akornanni aamma angajoqqaat qitornavissiallit taakkualu qitornavissiaasa aaqatigalugit qitornaasa imaluunniit qitornavissiaasa 15-it qaangerlugit ukiullit akornanni atoqatigiinnerup nutaamik pinerlunninngortinnera.

Aalajangersagassatut siunnersuutip paasineratut Kalaallit Nunaanni inatsisini, tassunga ilagitillugu nunat tamalaat akornanni inunnut ataasiakkanut tunngasunik inatsisini atuuttuni qitornavissiaqarnerit innuttaanermi inatsisitut atuupput.

Qitornavissiaqarnerit aalajangersakkap paasineram malillugu qitornavissiaqarneq ilaavoq, tamannalu Kalaallit Nunaanni inatsisit malillugit, aamma nunat tamalaat akornanni inuinnarnut inatsisit malillugit innuttaasut akornanni atuuffeqarpoq.

Aalajangersagassatut siunnersuutigineqartumi qitornavissiaqarneq atuuttuassaaq qitornavissiaqarneq atuukkallartillugu. Qitornavissiaqarneq atorunnaarsinneqarpat (Kalaallit Nunaannut atuuttumik), aalajangersagassatut siunnersuut siusinnerusukkut qitornavissiaqartup aamma siusinnerusukkut qitornavissiaasup akornanni kinguaassiuutitigut atoqatigiinnerannut atorneqassanngilaq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 3.2. innersuussutigineqarpoq.

Nr. 3-mut

Pinerluttulerinermik inatsimmi § 77, imm. 1, nr. 1 malillugu, inuk nakuusernarmigut imaluunniit nakuusernissamik qunusaarinermigut inummik pinngitsaaliilluni kujannittoq allatulluunniit kinguaassiuutitigut allatut atoqateqartoq pinngitsaaliilluni atoqateqarsimasutut eqqartuunneqassaaq.

Oqaasertaliussat nutarterneqarnissaat siunnersuutigineqarpoq, taamaalilluni ”kinguaassiuutitigut allatut atoqateqartoq” allannngortinneqassaaq ”atoqatigiinnikkut allatut pissusiliortoq”-nngorlugu. Tamatumunnga atatillugu ”atoqatigiinnikkut allatut pissusiortoq” utsukkut iteruillunilu kujanninneq pinnagit atoqatigiinnikkut allatut pissusilersortoq, atoqatigiinneq suaiaaqatigiinnngitsut imaluunniit suaiaaqatigiit akornanni pigaluarpat.

Inatsisissatut siunnersuummut imm. 2.2-mut oqaaseqaatit nalinginnaat innersuussutigineqarput.

Pinerluttulerinermik inatsimmi § 77, imm. 1, nr. 2 malillugu kingaluunniit inummik katissimanngisaminik iliutsimut akerlileeriarsinnaanngitsumik kujannittoq allatulluunniit kinguaassiuutitigut atoqateqartoq pinngitsaaliilluni atoqatigiinninnermut eqartuunneqassaaq.

Aalajangersakkap atuuffiata pissutsinut katissimanerup iluani iliuserineqartunut annertusinissaa siunnersuutigineqarpoq. Siunnersuutip kingunerissavaa, inooqatigiit katissimasut akornanni akornanni atoqatigiinnerit aalajangersakkamut matumunnga naleqqiullugit aappariit katissimanngitsut akornanni atoqatigiinnerisut nalilersorneqartassasut. Siunnersuutip aamma kingunerissavaa katissimasut inooqatigiinnngitsut akornanni atoqatigiinnerit inuit allat inooqatigiinnngitsut akornanni atoqatigiinnerattut nalilersorneqartarnissaat.

Atorneqarfigisinnaasaata annertusinissaa ilanngullugu siunnersuutigineqarpoq, tamatumani innarlugaasoq imatut inissisimassaaq iliutsimut akerliusinnaanani. Maleruagassat atuuttut malillugit atoqatigiinnikkut kanngunarsaanerit taamatut ittut taamaallaat pinerluttulerinermi inatsimmi § 84 kannguttaalliorfigineqarnernermut tunngasoq malillugu suliarineqarsinnaaapput. Taamatut atoqateqarnerup pinngitsaaliineq pillugu aalajangersakkamut nuunneratigut – innarlugaasup qanoq issusianik atorneqarluineq assigalugu – pinngitsaaliilluni atoqateqarneq assigalugu sakkortuumik pinerluutaanera takutinniarneqarpoq.

Siunnersuummi siunertarineqarput pisut pinerluisoq periarfissaqartoq pinerluffigisaq pakasassallugu kujalerlugulu imaluunniit allatut atoqatigilerlugu, pinerluffigineqartup iliuseqarfigisinnaanngisaanik. Pinerluffigisaq inissisimanini pissutigalugu iliutsimut akerliliisinnaangippat, atoqateqar-neq nalilerneqassaaq aalajangersakkami tamatumunnga tunngasoq naapertorlugu. Siunnersuummut iliutsimi pissutsit pinerluffigineqartup akerlilersorsinnaanngisaata ilangunneqarneratigut siunniunneqarput pisut, pinerluffigineqartoq qanoq annertutigisimik akerliliisinnaanersoq, kisianni pisorpiami qanoq iliorsinnaanani, pinerluffiginnittuup kujanninneq

allatulluuniit atoqarneq aallarereeraa.

Pisorpiani taamaattumik pineqarput pisut pinerluffigineqartoq tamakkiisumik ilaannakortumillunniit atisaajarsimasoq, aamma pinerluffiginnittup pissusissattut periarfissaqartoq perusulernartumik attualaassallugu. Assersuutitut taaneqarsinnaapput asattornermi ikiuunneq, nakorsamit misissortin-neq, tagiartuineq assigisaallunniit. Taamaasilluni ”pisumi” siunniussaavoq ilumoortumik attuisoqarsimanissaa, immikkut qajannaatilimmik inissisimaneq pinnagu,, assersuutigalugu aningaasatigut pinngitsuuisinnaannginneq.

Tamatuma saniatigut inatsisissatut siunnersuummi oqaaseqaatini nalinginnaasuni imm. 4.2 innersuussutigineqarpoq.

Nr. 5-imut

Pinerluttulerinermik inatsimmi § 79-imi inummik 15-it inorlugit ukiulimmik kujanninneq imaluunniit kinguaassiuutitigut allatut atoqateqarneq pinerluutinnngortinneqarpoq. Atoqatigiinnerit taamatut ittut pinerluttulerinermik inatsimmi pinngitsaaliinerit pillugit aalajangersakkanut ilaangillat, nakuuserneq imaluunniit nakuusernissamik qunusaarineq il.il. atorpeqarsimannngippata, tak. § 77.

Tamaattumik siunnersuutigineqarpoq § 77-imi pinngitsaaliilluni atoqateqarnermik oqariaaseq imm. 1, nr. 3-mik nutaamik annertusineqassasoq, tassani ilatiginneqarluni meeqqamik 12-it inorlugit ukiulimmik kujanninneq imalunnit allatut atoqateqarneq. Taamaasilluni tamatuma pinngitsaaliilluni atoqateqarneq assigalugu ilungersunartumik pinerluutaanera malunnartinniarneqarpoq.

Tamatuma saniatigut inatsisissatut siunnersuummi oqaaseqaatini nalinginnaasuni imm. 4.2 innersuussutigineqarpoq.

Nr. 6-imut

Pinerluttulerinermi inatsimmi § 77, imm. 2 malillugu kinaluunniit, iliuuseq imm. 1-imut ilaatinneqarsinnaanngikkaluartoq, unioqqutitsilluni pinngitsaaliilluni kujannittoq allatulluuniit kinguaassiuutitigut atoqatiginnittoq, tak. Pinerluttulerinermi inatsimmi § 91.

Oqaatsitigut nutaanngorsaasoqarnissa siunnersuutigineqarpoq, taamaasilluni “allatut kinguaassiuutitigut atoqatiginnittoq” allannngortinneqassalluni “atoqatigiinnikkut allatut pissusilersortoq”-nngorlugu. Tamatumunnga atatillugu “atoqatigiinnikkut allatut pissusilersortoq” paasineqassaaq utsukkut iteruilluniluunniit kujanninnerit pinnagit atoqatigiinnikkut pissusilersuutitut allatut, inuit assigiinnngitsunik suaassusillit imaluunniit suaqaatigiit akornanni pisimagaluarpalluunniit.

Tamatuma saniatigut inatsisissatut siunnersuummi oqaaseqaatini nalinginnaasuni imm. 2.2 innersuussutigineqarpoq.

Nr. 7-imut

Pinerluttulerinermermi inatsimmi § 78, imm. 1 malillugu kinaluunniit inuup niaqulaarnera, imaluunniit eqqarsartaatsimigut innarluuteqarnera atornerlullugu pineqartumik katissimanngisaminik kujannittoq allatulluunniit kinguaassiuutitigut atoqatiginnittoq pinerluttuutinneqarpoq.

Aalajangersakkap annertusineqarnissaa siunnersuutigineqarpoq, pisut katissimanerup iluani pisimasut ilaalersillugit. Siunnersuutip kingunerissavaa katissimasut inooqatigiinngitsut akornanni pisut siunissami inuit allat inooqatigiinngitsut akornanni pisut assigalugit siunissami nalilersorneqartarnissaat.

Aammattaaq oqaatsitigut nutaanngorsaasoqarnissaa siunnersuutigineqarpoq, taamaasilluni “kinguaassiuutitigut atornerluineq” allanngortinneqassalluni “atoqatigiinnikkut atornerluineq”-nngorlugu. Taamatut iliornermi aalajangersakkami iliuutsip imarisaata allanngortinneqarnissaa siunniussaangilaq.

Tamatuma saniatigut oqaatsitigut nutaanngorsaasoqarnissaa siunnersuutigineqarpoq, taamaasilluni “kinguaassiuutitigut allatut atoqateqarneq” allanngortinneqassalluni “allatut atoqatigiinneq” atornerqalersillugu. Tamatumunnga atatillugu “allatut atoqatigiinneq” pineqartillugu, utsukkut imaluunniit iteruilluni kujanninneq pinnagit atoqatigiinnerit allat pineqartarput, inuit suuiaaqatigiinngitsut suiaaqatigiilluunniit akornanni tamanna pigaluarpat apeqqutaatinnagu.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.2. aamma 5.2. innersuussutigineqarput.

Nr. 8-mut

Pinerluttulerinermermi inatsimmi § 78, imm. 2-mi kinaluunniit inuup atorfimminik imaluunniit aningaasatigut pinngitsuuisinnaannginneranik atornerluerujussuarluni katissimanngisaminik kujannittoq allatulluunniit kiguaassiuutitigut atoqatiginnittoq pinerluuteqartunnngortitaavoq.

Aalajangersakkap pisunut katissimanerup iluani pisimasunut annertusineqarnissaa siunnersuutigineqarpoq.

Ilanngullugulu katsorsagaanermik paaqqutarinermillu pinngitsuuisinnaanermik sakkortuumik atornerluineq ilaalersillugit aalajangersakkap annertusineqarnissaa siunnersuutigineqarpoq.

Katsorsaanermik annertuumik atorneerluinerup ilagissavai inuit nakorsaatinik pinngitsuuisinaajunnaarsitsisartunik sivisuumik katsorsaagaasut, imaassimappat nakorsap katsorsaasup pineqartullu akornanni annertuumik pinngitsuuisinnaannginneqartoq, aamma nakorsap pinngitsuuisinnaannginneq tamanna annertuumik atorneerlussimappagu napparsimasumik kujanninniarluni allatullunnit atoqateqarluni. Katsorsaanikkut pinngitsuuisinnaannginnermik annertuumik atorneerluinerup aamma ilagaa pisut allat taamaaqataannik pinngitsuuisinnaajunnaarsitsisut nakorsap katsorsaasullunniit allap napparsimasullu akornanni taamaaqataanillu nakorsaap katsorsaasullunniit akornanni.

Paaqqutarineqarnikkut pinngitsuuisinnaannginnermik atorneerluinerup ilaapput inuit namminneq angerlarsimaffimminni katsorsaasarfimmilunniit imaluunniit inissisimatitsivimmi il.il. paaqqutarineqarnikkut (annertuumik) ikiorserneqartartut, imaassimappat katsorsaasut pineqartullu akornanni pinngitsuuisinnaanngittoqartoq, pinngitsuuisinnaannginnerlu tamanna annertuumik atorneerlunneqartoq pineqartumik kujanninniarluni allatullunnit atoqateqarniarluni.

Peqatigitillugu siunnersuutigineqarpoq oqaasertatigut nutaarsaasoqassasoq, taamaalilluni ”atorfimminik” allanngortinneqassalluni imaalilluni ”sulinnikkut” pinngitsuuisinnaannginneq. Tamatumuuna siunertarineqanngilaq iliuutsip imaata aalajangersakkami allanngortinnissaa.

Katissimalluni aapparissamik (imalunniit katissimanani najugaqammik) katsorsaanikkut paaqqutarineqarnikkullunniit katissimasaminik imaluunniit (inoqamminik katissimanngisaminik) annertuumik pinngitsoorsinnaanngisaqartumik kujanninneq imaluunniit kinguaassiuutigut allatut atoqateqarneq, ilumut § 78, imm. 2-mut ilaalluni katsorsaanikkut imalunniit paaqqutarinnikkut pinngitsuuisinnaannginnermik sakkortuumik atorneerluinerunersoq aalajangersimasumik nalilerneqassaaq. Avikkumalluni najugaqatigiikkunnaarnissamillunniit siorasaarinikkut kujanninneq imalunniit allatigut atoqateqarneq imminermini annertuumik atorneerluinertut isigineqarsinnaanngilaq, aamma taamaappoq taamaalinerani avissimaneq najugaqatigiikkunnaarsimanerlunniit katsorsaanerup kiffartuussinerullunniit, aapparissap annertuumik pinngitsoorsinnaanngisaata, unitsinneranik kinguneqassagaluarpat. Katsorsaanerulli paaqqutarinninnerullunniit katissimasap (inoqatillunniit katissimanngisap) pinngitsoorsinnaanngilluinnagaata unitsinneqarnisaanik aalajangersumik qunusaarineq atorlugu kujanninneq allatullunniit kinguaassiuutisigut atoqateqarneq pissutsit aallaavigalugit taamatut sakkortuumik atorneerluinerusinnaavoq, katsorsaanermik paaqqutarinninnermillunniit unitsitsineq avinnermut aappariikkunnaarnermullunniit attuumassuteqanngikkaluarpallunniit.

Tamatuma saniatigut oqaatsitigut nutarterisoqarnissaa siunnersuutigineqarpoq, taamaasilluni “kinguaassiuutitigut allatut atoqateqarneq” allanngortinneqassalluni “allatut atoqatigiinneq” atorneqalersillugu. Tamatumunnga atatillugu “allatut atoqatigiinneq” pineqartillugu, utsukut imalunniit iteruilluni kujanninneq pinnagit atoqatigiinnerit allat pineqartarput, inuit suuiaaqatigiinningsut suiaaqatigiillunniit akornanni tamanna pigaluarpat apeqqutaatinnagu.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.2 aamma 5.2 innersuussutigineqarput.

Nr. 9-mut

§ 78, imm. 3-mi kinaluunniit meeqqanut aamma inuusuttunut angerlarsimaffimmi, tarnimikkut nappaatilinnut napparsimaavissuarmi, imaluunniit paaqqinniffimmi assingusumi atorfeqarluni nakkutilliisuulluniluunniit paaqqinniffimmiittumik kujannitoq allatulluunniit kinguaassiuutitigut atoqatiginnittoq pinerluttuutinneqarpoq.

Aalajangersakkap normunut pingasunut avinneqarnissaa siunnersuutigineqarpoq, taamaasilluni nr. 1 pinerluttunik isumaginnittoqarfiup Kalaallit Nunaanni suliffeqarfiinut tunngassalluni, nr. 2 kiffaanngissusiiakkanut, politiinit tigummineqartunut tunngassalluni, nr. 3-lu suliffeqarfinnut allanut tunngassalluni.

Tamatumunnga atatillugu siunnersuutigineqarpoq “allatut kinguaassiuutitigut atoqateqarneq” allanngortinneqssasoq “allatut atoqatigiinneq”-nngorlugu. Tamatumunnga atatillugu “allatut atoqatigiinneq” pineqartillugu, utsukkut imalunniit iteruilluni kujanninneq pinnagit atoqatigiinnerit allat pineqartarput, inuit suuiaaqatigiinngitsut suiaaqatigiilluunniit akornanni tamanna pigaluarpat apeqqutaatinnagu.

Taamaasilluni *nr. 1*-imi erseqqissumik inerteqqutigalugu pinerluuteqarsimasunik nakkutilliivimmi sulisup inissisimasullu, sulisup nakkutigisaata, akornanni kujanneq imaluunniit allatigut atoqateqarneq erseqqissumik inerteqqutigineqassasoq siunnersuutigineqarpoq.

Taamatut iliornikkut inatsisinut atuuttunut naleqqiullugu inerteqqut annertusineqarpoq, pinerluttunik isumaginnittoqarfimmi sulisut tamaasa ilaalersillugit, akerlianilli sulisunut tigummineqartumut oqartussaasunut killilerneqarluni.

Pinerluuteqarsimasunik isumaginnittoqarfimmi sulisunik pineqarput allaffeqarfimmi pingaarnermi atorfillit aamma nakkutilliivinni suliffeqarfinnilu sulisut, tassunga ilaallutik inissiisarfiit aamma pinerlussimasunik iperagaasimasunik nakkutilliisut. Inerteqqut atuuppoq piffissani pineqartup pinerluuteqarsimasunik nakkutilliivimmi inissisimanerani, tassunga ilagitillugit aneertarneq nammineerallarsimaneq, napparsimmavimmi uninnganeq il.il., kisiannili inerteqqut atuutinngilaq inunntu iperagaanerup kingorna imaluunniit misiligummik iperagaanerup nalaani. Inerteqqut aalajangersumik nalilersuereernerup kingorna sivitsorneqarsinnaassaaq, aneernerup nammineerallarnerrulluunniit kingorna takkutinnitsooreernikkut qimaasimanerullu kingorna piffissami sivikinnerusumi atuuttussanngorlugu, kingornali inissinneqarfigititamiinneq unitsinneqarsimasutut isigineqassaaq.

Inerteqqut inunntu misiligummik iperagaanermik kingorna imaluunniit utaqqisitamik eqqartuussaasimaneq naapertorlugu pinerluttunik isumaginnittoqarfimmit nakkutigineqartunut

atuutinngilaq.

Sulisut inissinneqarsimasunut ”oqartussaasut” pineqarneranni, inuit inissinneqartumut atatillugu inissinneqartup atugaanut sunniuteqarsinnaasut siunniussaapput. Sulisoq inissinneqartumut naleqqiullugu pisortatigoortumik aalajangiisinnaatitaanersoq apeqqutaanngilaq.

Nr. 2-mi nutaatut siunnersuutigineqarpoq politiini sulisup inuullu kiffaanngissusiiagaasimasup politiinillu nakkutigineqartup akornanni kujanneq imaluunniit allatut atoqatigiinneq inerteqqutaalissasoq.

Inerteqqut atuuppoq politiini atorfilinnut tamanut, tassunga ilagitillugit kommunefogedit, atorfeqaral-lartitaasut aamma akissarsiaqaratik sulisuusut.

Inerteqqut atuuppoq kimulluunniit kiffaanngissusiiagaasumut politiinillu nakkutigisaasunut. Kiffaanngissusiiaanermut tunngavigisaq apeqqutaanngilaq. Inerteqqut atuupportaaq assersuutigalugu parnaarussivimmi nakkutigisassanut pineqaatissiisummillu naammassinnittunut, politiinit utaqqiisaasumik nakkutigisaasunut, assersuutigalugu angallanneqarnermi. Inerteqqut atuupportaaq pineqaatissiisummik naammassinnittunut nakkutigisaallutik aneertunut, politiit pineqartumik nakkutiginnittuusimappata.

Inerteqqummi pineqarput kinguaassiuutitigut atoqateqarnerit kiffaanngissusiiagaanerup nalaani pisut, pineqartup politiinit nakkutigisaanerani. Inerteqqut taamaalilluni atuutinngilaq kiffaanngissusiiaanerup qaangiutereeraangat, imaluunniit pineqartoq politiinit nakkutigisaajunnaaraangat (kiffaanngissusiiaanerup qaangiussimannginnera apeqqutaatinnagu).

Nr. 3-mi siunnersuutigineqarpoq § 78, imm. 3-mi aalajangersagaq atuuttoq aalajangersimasunik allannguuteqartillugu ingerlateqqinniarlugu, pinerluuteqarsimasunik nakkutillivimmit suliffiit allaasut eqqarsaatigalugit.

Siunnersuutigineqarpoq suliffeqarfimmik nakkutilliisumut innersuussut allanngortinneqassasoq nakkutilliisumut suliffeqarfittalimmut. Tamatumani taamaallaat pineqarpoq erseqqissaaneq, aamma aalajangersagaq taamaalilluni allannguuteqarani atuutissaaq ilaatigut inunnut suliffimmi pineqartumi sulisuusunut (tassunga ilagitillugit sulisuugallartut, piffissap ilaani sulisuusut aamma akissarsiaqaratik sulisut) atuullunilu apeqqutaatinnagu sulisup suliffimmi inissinneqarfiusumi nakkutilliisuunersoq.

Siunnersuutigineqarportaaq ikiorneqartussat inaat aalajangersakkamit peerneqassasoq, aamma siunnersuutigineqarpoq suliffeqarfiit sinnerisa taaguutaat nutarsarneqassasut, taamaalilluni ”meeqqat inuusuttullu angerlarsimaffiat” imaluunniit ”inuusuttut inaat” allanngussasut imaalertutik ”Ulloq unnuarlu paaqqinniffiit imaluunniit meeqqat inuusuttullu najugaqarfia”, aamma ”niaqulaartunut napparsimmavik” allanngussasoq imaalertuni ”tarnikkut nappaatilinnut immikkoortoqarfik”. Siunnersuutigineqarportaaq immikkut ersersinneqassasoq ulloq unnuarlu paaqqinniffinni sulisut inunnut tarnikkut annertuumik innarluutilinnut sullissisut ilagittinneqarmata.

Sulisup inuullu inissiisarfittut inissiisarfimmi unnuisussatut inissinneqartullu akornanni atoqatigiinnermut aalajangersagaq allannguuteqarani atuuppoq. Aalajangersagaq taamaalilluni atuutinngilaq inummut inissiisarfimmi unnuinnartussamut, assersuutigalugu napparsimasumut tarnit nakorsaannut immikkoortumi uninngatitaanani katsorsartittumut, imaluunniit inummut ullukkut ornittakkami ingerlatami, innarluutillit suliffiani assigisaannilunniit (pineqartumi ulloq unnuarlu najugaqarani) peqataasumut.

Aalajangersagaq allanngorani atuuppoq piffissami killilikkami pineqartup inissiisarfimmi inissisimanerani, tassalu aamma pineqartoq inissinneqarfik najornagu unnuigallartitaappat, assersuutigalugu ilaquuttamini katerisimaaqataalluni, ilaqutariinni oqilisaassisuni ilaqutarsianiluunnit sapaatip akunneranik naanersiorluni, napparsimmavimmi uninngalluni il.il. Aalajangersagaq aamma atuuppoq paasisassarsiorluni feeriarluniluunniit angalanerni inissiisarfimmit aaqqissugaasuni. Inissiisarfimmiinneq qaangiukkaangat, tassunga ilagitillugu inissiisarfimmut allamut nuunnikkut, aalajangersagaq atuukkunnaartarpoq. Aalajangersagaq aalajangersimasunik naliliinikkut sivissusilerneqarsinnaavoq piffissami killilikkami sivikinnerusumi atuutsillugu aneernerup kingorna utinngitsoornerup kingorna imaluunniit qimaasimanerup kingorna, kisianni tamatuma kingorna Inissiisarfimmiinneq qaangiussimasutut naatsorsuussassaavoq.

Tamatuma saniatigut inatsisissatut siunnersuumut oqaaseqaatini nalinginnaasuni imm. 5.2 innersuussutigineqarpoq.

Nr. 10-mut

Pinerluttulerinermi inatsimmi § 79-imi meeqqamik kujannittoq pinerluttuutinneqarpoq, pinerluttulerinermi inatsimmi § 81-imi inuusuttumut 18-it inorlugit ukiulimmut akiliilluni imaluunniit akiliinissamik neriorsuilluni kinguaassiuutitigut atoqateqartoq pinerluttuutinneqartoq.

Siunnersuutigineqarpoq §§ 79-imi aamma 81-imi oqaasertatigut nutarsaasoqassasoq, taamaalilluni ”kinguaassiuutitigut atoqateqarneq” imaalillugu ”atoqateqarneq”. Tamatumani siunertarineqanngilaq aalajangersakkami iliuutsip imaata allanngortinnissaa.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.2 innersuussutigineqarpoq.

Nr. 11-mut

Pinerluttulerinermi inatsimmi § 79-imi meeqqamik 15-it inorlugit ukiulimmik kujanninneq allatulluunniit kinguaassiuutitigut atoqatiginninneq pinerluutinngortinneqarpoq.

Pinerluttulerinermi inatsimmi § 77-p pinngitsaaliilluni atoqateqarnermut tunngasup meeqqanik 12 inorlugit ukiulimmik atoqateqarnermik ilaqalersillugu (inatsisissatut siunnersuummi § 1, nr. 7), annertusineqarnissaanik siunnersuutip kinguneranik taamatut atoqateqarnerit § 79-imut ilaatinneqarunnaassapput.

Tamatuma kinguneranik pinerluttulerinermi inatsimmi § 79 allanngortinneqassasoq siunnersuutigineqarpoq, pinerluut pinerluttulerinermi inatsimmi § 77, imm. 1, nr. 3-mut ilaangippat, aalajangersakkap atorineqarsinnaannorlugu. Taamaatut iliornikkut § 79-p § 77, imm. 1, nr. 3-mut naleqqiulluni pingaanninnerunera erseqqissarneqassaaq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 4.2 innersuussutigineqarpoq.

Nr. 12-imut

Pinerluttulerinermi inatsimmi § 80, imm. 2-mi qitornavissiamik, qitornassaminik qitornarsiamminilluunniit imaluunniit imminerminut ilinniartitassanngortinneqarsimasumik perorsagassanngortinneqarsimasumilluunniit kujannineq allatulluunniit kinguaassiuutitigut atoqatiginnineq (siunissami: “allatut atoqatiginnineq) pinerluutinngortinneqarpoq.

”Qitornavissiaq”-mut innersuussut § 80, imm. 2-mit peerneqassasoq iunnersuutigineqarpoq. Pinerluttulerinermik inatsimmi § 74-imi aaqatigalugit kingumut malittumik ilaqtanik atoqateqarnermik inerteqqummut tunngasup, kingumut malittumik ilaqtanik qitornavissianik ilaqalersillugu annertusineqassanik peqatigisaanik siunnersuuteqarnerup tamanna kinguneraa, tak. Inatsisissatut siunnersuum-mi § 1, nr. 2.

Tamatuma saniatigut inatsisissatut siunnersuummut oqaaseqaatini nalinginnaasuni imm. 3.2 innersuussutigineqarpoq.

Nr. 13-imut

Pinerluttulerinermi inatsimmi § 81-imi akiliilluni imaluunniit akiliinissamik neriorsuilluni inummik 18-it inorlugit ukiulimmik kujannineq allatulluunniit kinguaassiuutitigut atoqatiginnineq pinerluutinngortinneqarpoq, pinerluuteqartup nalusimangippagu pineqartoq qassinik ukioqartoq imaluunniit tamatuma tungaatigut mianersuaalliorsimaguni.

Siunnersuutigineqarpoq pinerluttulerinermik inatsimmi § 81-imi imm. 2 nutaaq ivertinneqassasoq, tassuuna inerteqqutigineqarpoq inuup 18-it inorlugit ukiullip pisisumut akilersilluni akiliinissamilluunniit neriorsortilluni atoqateqarneranut peqataaneq.

Tamatumunnga atatillugu “allatut atoqatigiinneq” pineqartillugu, utsukkut imalunniit iteruilluni kujannineq pinnagit atoqatigiinnerit allat pineqartarput, inuit suuiaaqatigiinngitsut suiaaqatigiilluunniit akornanni tamanna pigaluarpat apeqqutaatinnagu.

Aalajangersagassatut siunnersuutip taamaalilluni ilagilerpaa inuup 18-it inorlugit ukiullip

akilersilluni akiliinissamillunniit neriorsortilluni pisisumut atoqateqarneranut qanorluunniit ittumik ikiuunneq, ilanngullugit pineqartoq taamaaliornissamut kimigiiserfigineqarsimappat, ussassaarneqarsimappat, salloqittarneqarsimappat imaluunniit uukapaatinneqarsimappat. Pineqartoq akilersilluni akilerneqarnissamillunniit neriorsortilluni kujatsinniarlugu nakuusertoqarsimappat imaluunniit pinerluttulerinermi inatsimmi § 91 malillugu unioqqutitsilluni pinngitsaaliineq alla atorineqarsimappat, pinerluttulerinermik inatsimmi § 77 malillugu pinngitsaaliiluni atoqateqarnermik aamma eqqartuussisoqarsinnaassaaq.

Pinerluttulerinermi inatsimmi § 93, imm. 2-mut inunnik niuffateqarnermut tunngasumut naleqqiullugu aalajangersagaq salliuungilaq. Akerlianilli pillaasoqarsinnaavoq aalajangersakkap aamma ilaatigut pinerluttulerinermik inatsimmi § 77-ip (pinngitsaaliilluni atoqateqarneq) aamma § 79-ip (meeqqanik atoqateqarneq) aporaanneranni.

Taaguut "pisisoq" nangittumik kinguneqarpoq atuuffiup killeqarneranik pisuni ukiukitsup atoqateqarnikkut peqataaffii pisimappata akiliuteqarnikkut imalunniit akilerneqarnissamik neriorsorneqarnikkut. Pisisoq nammineq imaluunniit pingajuusoq akiliisimanersoq pingaaruteqanngilaq. Aamma pisisoq aningaasanik akiliuteqarsimanersoq apeqqutaanngilaq, akiiutilli aningaasanngorlugit naatsorsorneqarsinnaassapput.

Pinerluffigineqartup ukioqqortussusianut tunngasumik pineqartoq mianersuaalliorsimappat, tamatuma eqqartuussutigineqarsinnaanissaa siunnersuutigineqarpoq. Tamatumunnga tungasumik oqaatigineqarpoq pisisup inummik 18-it inorlugit ukiulimmik akiliilluni akiliinissamilluunniit neriorsuilluni atoqateqarneranut atatillugu pinerluffigineqartup ukioqqortussusianut tunngasunik mianersuaalliornera - inatsimmi § 81-iimi pinerlunninngortereermat..

Tamatuma saniatigut inatsisissatut siunnersuummut oqaaseqaatini nalinginnaasuni imm. 6.2 innersuussutigineqarpoq.

Nr. 14-imut

Inummik suaiaqatigisamik kinguaassiutitigut atoqateqartoqartillugu pinerluttulerinermik inatsimmi § 82-imi aalajangersagaq. §§ 77-81-imi aalajangersakkat assigiimmik atuutsinneqarnissaannik piumasaqartoq nutaamik oqaasertalersorneqassasoq siunnersuutigineqarpoq, imarisaalu atuuttut ingerlateqqinneqaratik.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.2 innersuussutigineqarpoq.

Tamatatumunnga atatillugu § 82-imi aalajangersakkamik nutaamik ilanngussisoqarnissaa siunnersuutigineqarpoq, taannalu malillugu inuup 18-it inorlugit ukiullip pornografiimi isiginnaartit-sinermut ilaananeranut peqataaneq, tak. imm. 1, aamma takutitsinertut taamatut ittunut isiginnaartuuneq, tak. imm. 2, pinerluutinngortinneqarput.

Taaguut ”pornografiimik takutitsineq” pineqartillugu ilaatigut pingaartinneqassaaq kujanneq, kujannermit allaasumik atoqatigiinneq imalunniit annertuumik kanngunartumik iliuuseqarneq, soorlu kinguaassiuutinik nittarsaassineq atoqateqarnermullunniit assingusumik attualaarineq pineqarnerisut. Aalajangersagassatut siunnersuummut ilagitinneqartunik isiginnaartitsineq, aallaavigalugu ”pisunik aalasunik isiginnaartitsinerussaaq”, isiginnaartunut najuuttunut toqqaannartumik takutitsisoq. Atoqateqarnermut tungasunik isiginnaartunut toqqaannartumik takutitsineq nalinginnaasumik imminermi 18-it inorlugit ukiulinnut kangunartuussaaq, saqqumisumik soorlu kinguaassiuutit nittarternerqarpata, taamalu pornografiimik takutitsinertut isigineqarluni. Pisutigut aalajangersagassatut siunnersuummut tassunga ilaassapput atoqateqarnermik assigiinngitsunik takutitsinerit, tassunga ilaallutik pisut pineqartoq atisaajarnermik allatullunniit tamataqannginnermik takutitseqataasoq.

Takutitsinermut ilagitillugu soorlu inummik 15-it inorlugit ukiulimmik kujanninneq il.il. pineqarpata eqqartuussissutigineqarsinnaassaaq pinnerluttulerinermik inatsimmi § 79 inummik 15-it inorlugit ukiulimmik kujanninneq pillugu unioqqutitsinertut.

Aalajangersakkap ilagai pornografiimik takusassiilluni ”isiginnaartitsinerit”. Tamatumani siullitullugit salliutillugillu taktutitsinerit pineqarput aatsaat akiliilluni iserfigineqarsinnaasut, kisianni aalajangersakkap aamma imarisinnaassavai takutitsinerit, soorlu aaqqissorneqartartut naapeqatigiinnerni matoqqasuni killilikkamik amerlassusilinnut inunntu akilersuisitsinissaq ilagitinneqarani. Piumasarineqarpoq tamatumani peerneqassasoq aaqqissuussinermi atoqateqarnermut tunngasumik takutitsinerit sioqqutsisumik pilersaarusiorsimanissaq, aamma aalajangersakkamut ilagitinneqassangillat takutitsinerit torrutiinnakkatut ittut, naak isiginnaartoqaraluartoq, soorlu inummik 18-it inorlugit ukiulimmik matoqqasumik nalliuttorsiornermi qiimmassimmaarnermini aalajangertu-mik atisaajarnermik ”isiginnaartitsiniarluni”, tak. ataani imm. 2-mut tunngasut.

Piumasarineqarpoq aalajangersagaq atuutissasoq taamaallaat isiginnaartitsinermut aalajangersimasumut tunngasumut, imaassimappat inuk 18-it inorlugit ukiulik pornografiimik takutitsinermi peqataasoq. Pisumi inuk 18-it inorlugit ukiulik pornografiunngitsumi matoqqasumi isiginnaartitsinermi peqataasoq, aalajangersagaq taamaalilluni atuutissanngilaq, naak isiginnaartitsinermi tassani takutitassat allat inersimasunit peqataaffigineqartut pornografiitut isigiumaneqarsinnaagunaraluartut, imaassimanngippat takutitassat assigiinngitsut akornanni qanittumik atoqatigiinneqarlunilu nuiunneqartoq.

Imm. 1-ip ilagaa inuk inuup 18-it inorlugit ukiullip pornografiimik takutitsinerit isiginnaartitsinermi peqataanera. Aalajangersakkap ilagaa sukkullunniit ikiunneq inuup 18-it inorlugit ukiullip tamatigut isiginnaartitsinermi, tassunga ilagitillugu pineqartup peqataaqqullugu kimigiiserfiginera, pilersaarnera imaluunniit uukapaatinnera. Inatsisit uniorlugit pinnerluttulerinermik inatsimmi § 91 malillugu pinngitsaaliineq atorineqarsimappat aalajangersakkamik tamatuminna umioqqutitsineq aamma eqqartuussissutigineqarsinnaassaaq.

Pineqartoq pinerluffigineqartup ukioqqortussusianut tunngasumik mianersuaalliorsimappat, aamma eqqartuussutigineqarsinnaassasoq siunnersuutigineqarpoq.

Imm. 2-mut ilaapput pornografiimik takutitsilluni isiginnaartitsinermi isiginnaartut tamatumani inummik 18-it inorlugit ukiulinnik peqataasoqarluni, tak. imm. 1. Aalajangersakkami pineqarput taamaallaat piaaraluni pissutsit, isiginnaartullu pineqartup taamaalilluni assersuutigalugu nalunngissavaa taamaaratariaannaasutullu isigissallugu inummik 18-it inorlugit ukiulimmik peqataasoqarnissaa. Aalajangersakkami taamaalilluni pineqassanngilaq pornografiimik takutitsilluni isiginnaartitsinermi atuuttoq, soorlu atisaajarluni takutitsineq, nalullugu inummik 18-it inorlugit ukiulimmik peqataasulik. Pineqartup ingerlannerani malugippagu nammineq pornografiimik takutitsinermik 18-it inorlugit ukiulimmik peqataasulimik isiginnaartuulluni, akerlianik aalajangersagaq atorsinnaassaaq, pineqartup isiginnaarnini nangiinnarsimmagu.

Isiginnaartitsinermi taamatut ittuni ilaapput ”isiginnaartut”, tassalu inuit orniguttut isiginnaartitsinermik pineqartumik najuunnissaq siunertaralugu. Aalajangersakkalli ilaginngilaa soorlu aatsisartoq nassiussamik aanniarlugu najuuttoq isiginnaartitsinerup ingerlanerani, imaassimangippat pineqartoq tamatuma kingorna isiginnaartutut isiginnaartitsinermut najuutilersimasoq.

Pisut tunngavigalugit aammattaaq pinerluttulerinermi inatsimmi § 84-imik kannгуттаalliordfigisaanermut tunngasumik unioqqutitsineq pillugu eqqartuussissoqarsinnaaq, takutitsineq pisoq aalajangersakkamut matumunnga ilaasutut aamma isigineqarsinnaappat.

Tamatuma saniatigut inatsisissatut siunnersuummut oqaaseqaatini nalinginnaasuni imm. 7.2 innersuussutigineqarpoq.

Til nr. 15

Pinerluttulerinermi inatsimmi § 83-imi iliuutsit arlaqartut atortittartuutitsinertut pinerluutinngortitaapput. Aalajangersakkap nutaanik oqaasertalersornissaa siunnersuutigineqarpoq.

Siunnersuutigineqartumi imm. 1-ip ingerlateqqippai imm. 1, nr. 3 atuuttoq, atortittarfiuteqarnermut tunngasoq aamma imm. 3-p ilai akunnermuliuttuunermut allallu akilersilluni atortittartuunerannut tunngasoq, imm. 2-tut siunnersuutigineqartumi imm. 3-p ilaasa sinneri allat atortittartuunerannik atornerluinermut akunnermuliuttuunermulu tunngasut ingerlateqqinneqartut. Imm. 3-tut siunnersuutip imm. 4 atuuttoq ingerlateqqippaa. Kiisalu imm. 4-tut siunnersuutip, imm. 1, nr. 1, akilersilluni atortittarnermut ussiinermut tunngasoq, atuuttoq nutartikkatut ingerlateqqippaa.

Imm. 1-itut siunnersuummi atortittartuutitsineq pillugu eqqartuunneqarsinnaavoq inuk ingerlatsisuusoq inuup allap akilersilluni imaluunniit akiliinissamik neriorsortilluni pisisumut atoqateqarneranik.

Aalajangersakkami pineqarpoq inuk tunuliaqtsiisoq inuup allap akilersilluni imalunnit akiliinissamik neriorsortilluni pisisumik atoqateqarneranik ingerlatsisuusoq.

Aalajangersagaq atuutinngilaq inuup nammineq ingerlataminik ingerlatsisup akilersilluni imaluunniit akiliinissamik neriorsortilluni nammineq pisisumik atoqateqarnerat.

Aalajangersagaq aamma atussanngilaq inuit arlallit ataatsimoorlutik ingerlataqarpata akilersillutik imalunniit akiliinissamik neriorsortillutik pisisumik atoqartarnerannut, taamaalillutik aningaasartuutunik avitseqatigiittarlutik. Aalajangersagarli atuutilissaaq imaasimappat akilersillutik atortittartut ilaat ataaseq akilersillutik atortittartunut allanut tunngasumik siuttutut ingerlappat imaluunniit akilersillutik atortittartut allat isertitaannit pissarsiat ilaannik pissarsisartoq, tamanna aningaasartuutunik avitseqateqarnermik ersinngippat. Aalajangersagaq aamma atuutilissaaq imaasimappat ingerlatsineq siulersorneqartoq inummit tamatumani akilersilluni atortittartut sulisuunngitsumit.

Aalajangersagaq inummut ataatsimut, nammineq akilersilluni atortittartut ingerlatsivimmi sulisumut atuuttungussappat, pineqartup nammineq ingerlatsivimmi akilersilluni atortittartut isertittagai taamaalinerani pissarsiaapput pillarneqaataasussaannngitsumik (aamma taamatumuuna pinerlunnikkut pissarsiaanatik pinerluttulerinermik inatsimmi § 166, imm. 1 malillugu arsaarinissutigineqarsinnaasut).

Aalajangersagaq atuutissaaq inummut ”ingerlatsivimmik ingerlatsisoq”-mut inuup allap akiliilluni akiliinissamillunniit neriorsuilluni pisisumut atoqateqarneranut.

Tassaniippoq pineqartup akuunerani aalajangersimasunik annertussuseqassammat akuttoqatigiittuussallunilu aalajangersagaq atuutilersinnagu. Akerlianilli akilersilluni atortittartumut ingerlatami akuunissamik piumasaaqateqanngilaq. Aamma inuup ataatsit pisisumut akilersilluni akiliinissamillunniit neriorsuilluni atoqateqarneri ilagittinneqarput, imaasimappat tunuliaqutsiisup ingerlaasii ataatsimoortut ima annertussuseqartut, pineqartoq isigineqarsinnaaluni allat akilersillutik atoqateqarnerannut ”ingerlatsivimmik ingerlatsisoq”-tut.

Kisianni ”ingerlatsivimmik ingerlatsi”-lernissaaq pisariuvallaanngilaq aalajangersagaq tunngavigissagaanni. Aamma allat akilersillutik atortittarnerannik tunuliaquttatut ”sukisaartaatigalugu ingerlatsineq” ilaavoq. Assersuutigalugu ingerlatsivik kinguneqartoq akilersillutik atortittartut sapaatit akunnerisa naaneri allortarlugit akilersillutik imaluunniit akiliinissamik neriorsortillutik pisisartunut amerlangitsunut atoqateqartartut aalajangersakkamut ilagittinneqarsinnaapput. Akerlianilli ingerlatsivik ima kinguneqartoq akilersilluni atortittartut qaammat ataaseq allortarlugu ikittunik atoqateqartartoq aalajangersakkamut ilaanngilaq.

Akilersilluni atoqateqartarnek ininit aalajangersimasunit ingerlanneqartartoq, pisisut tassunga saaffiginissinnaallutik tassanilu akilersilluni atoqateqartartumik atoqateqarlutik (akilersilluni atoqateqartarfik) pineqartillugu, § 83, imm. 1-itut siunnersuut, § 83, imm. 1, nr. 3-mi (akilersilluni atortittarfiuteqarneq” pillugu, aalajangersakkamut atuuttumut assinguvoq.

Aalajangersakkalli siunnersuutigineqartup ilagaa akilersilluni atortittarfiuteqarnermut assingusumik allatut periaaseqarluni akilersilluni atortittarnermik ingerlatsineq, taamaallaat pineqaraangat inuk

ataaseq (tuniuiaqtsiisooq) ingerlatsisooq inuup allap akilersilluni akililiinissamillunniit neriorsuilluni pisisumut atoqateqarneranik, tak. qulaani, oqariaasit tamakku pillugit. Assersuutitut taaneqarsinnaapput imerniartarfinni akilersilluni atortittarneq, qaniuilluni atortittarneq aamma aqqusinermi atortittarneq.

Aalajangersakkamut ilaavoq inuk (tunuliaqtsiisooq) ingerlatsivimmik ingerlatsisuuq, tassalu taassuma aalajangertarpa ingerlatsiviup ingerlannera. Tamanna atuuppoq taanna inuttut ingerlatsivimmi najuuttarpat imaluunniit ingerlatsivimmi oqartusnaanini allat atorlugit ingerlappagu. Taaneqareersutut ajornanngilaq tunuliaqutaasooq aalajangersakkap isumaa malillugu peqatigitillugu nammineq ingerlatsivimmi atortittartuusoq. Aamma ajornanngilaq inuit arlallit ataatsimoorlutik akilersilluni atortittarnermik ingerlatsiviup ingerlanneranut aalajangiisuusarpata taamalu marluullutik imaluunniit tamarmiullutik aalajangersakkatut siunnersummut toqqaannartumik ilaassallutik.

Tamatuma saniatigut § 83, imm. 1-itut siunnersuutigineqartoq, pinerluttulerinermik inatsimmi § 13 peqataanermut tunngasoq malillugu, aammattaaq kikkut tamarmik kajumissaarinikkut, siunnersuinikkut piviusunngortitsinerluunniit aqutugalugu iliuitsimut peqataasimasut.

Mannali atuuppoq, inuit allat iliuitsip imaani taaneqarsimasut – tassalu ilaatigut akilersilluni atortittartoq ("inuk alla"), ilaatigut pisisooq ("pisisooq") – peqataaneq pillugu aalajangersakkamik unioqqutitsisut eqqartuunneqarsinnaanngitsut, iliuitsip imaanik aallaatiginninnermi aallaatigineqartutuut tuniniaa-sutut aamma pisisutut akilersillutik akililiinissamillunniit neriorsortillutik atoqateqarsimagunik.

Aammattaaq illersuinissamik soqutigisamut aalajangersakkap iluaqusigassaanut tassunga ilaavoq – tassa akilersillutik atortittartut illersussallugit tunuliaqtsiisumit atornerlunneqannginnissaannit – akilersillutik atortittartut akilersilluni atortittarnermik ingerlatsivimmi sulisuusut aallaavittut eqqartuunneqassanngitsut akilersilluni atortittarffimmik ingerlatsinermi peqataasutut.

Ataatsimut isigalugu tamatuma kinguneraa tunuliaqtsiisooq akilersilluni atortittarffimmik ingerlatsippat, inuit tunuliaqtsiisumik ikiuisut eqqartuunneqarsinnaasut peqataasutut. Tamanna atuuppoq ilaatigut inunnut ininik attartortitsisunut imaluunniit akilersilluni atortittarnermik ingerlatsivimmut tuniakkani kiffaartuussissutinillunniit tunniussisuusut (soorlu ussasaarineq imaluunniit akilersuisitsineq) aamma inunnut akilersillutik atortittartuunatik ingerlatsivimmi sulisuusunut, assersuutigalugu nakkutilliisut, biilertut, oqarasuaamik paarsisut, saaffiginnittarffimmiittut il.il. Peqataasunut tamanut atuuppoq pinerluttulerinermik inatsisini akisussaassutsip piumasarimmagu piarineq, tassunga ilagitillugu isigimanninneq pineqartoq tassaasooq ingerlatsivik tamatumani inuk alla akilersilluni akililiinissamillunniit neriorsortilluni pisisumik atoqateqartoq. Pinerluttulerinermi inatsisini akisussaassutsip taamaalilluni aamma piunasaqaat akilersilluni atortittarffimmik ingerlatsivik tunuliaqutaasumit ingerlanneqartoq akilersillutik atortittartunit pinnani ilaatigut piarinerusoq.

Aammattaaq akilersilluni atortittartoq akilersilluni atortittarffimmik ingerlatsivimmi

tunuliaqutsiisumit ingerlanneqartumi sulisoq – aamma taamaalilluni akilersilluni atortittarnikkut atornerlugaanermi eqqugaasoq – aallavittut eqqartuunneqartariaqanngilaq pissutigalugu akilersilluni atortittartoq assersuutigalugu oqarasuaatinik imaluunniit saaffiginnittarfimmik nakkutiginninnermik, pisiniartarnermik, nerisassiornermik, eqqiaarnermik il.il. aamma suliaqartarsimappat. Aatsaat akilersilluni atortittartoq ingerlatsiviup ingerlannerani akilersillutik atortittartunut allanut naleqqiulluni aqutsisutut inissisimappat, pinerluttulerinermik inatsisini peqataanermut akisussaaneq aatsaat atornerqarsinnaavoq.

Aalajangersagaq atuutissaaq apeqqutaatinnagu tunuliaqutsiisooq iluanaarutitik pissarsisimappat pissarsinissamilluunniit anguniagaqarsimappat.

Pissutsit taamaallaat maanna inuup allap akilersiluni atortittarnermik inuussutissarsiuteqarneranik atornerluinermik eqqartussissutaasinnaasut, tak. aalajangersagaq atuuttoq pinnerluttulerinermik inatsimmi § 83, imm. 3 immikkoortuata aappaani, atortittartuuteqarnerli § 83, imm. 1-itut siunnersuutigineqartumi nassuiakkatut ittoq pineqarsimappat, siunissami eqqartuussissutigineqarsinnaavoq akilersilluni atortittarfimmik ingerlatsineq naligalugu.

Aalajangersagaq pinerluttulerinermi inatsimmi § 93-imut, inunnik niuffateqarnermut tunngasumut naleqqiullugu salliungilaq, taamaattumillu suleriaatsimi akilersilluni atortittarnermik ingerlatsineq ilaassalluni, tamatumani pinngitsaallineq, peqquserlunneq imaluunniit periaaseq alla akilersilluni atortittartunut atornerqarsimassanani. Periaatsit tamakku atornerqarpata pisut tunngavigalugit pineqassaaq inunnik niuffateqarneq.

§ 83, imm. 1-itut siunnersuutip, aamma § 81, imm. 2-tut siunnersuutip (inatsisissatut siunnersuummi § 1, nr. 14), inuup 18-it inorlugit ukiullip akilersilluni imalunniit akiliinissamik neriorsortilluni pisisumik kujanninnermut peqataanermut tunngasup aporaaffiini pineqaatissiisoqarsinnaavoq.

Imm. 2-tut siunnersuutigineqartumi immikkoortoq siulleq malillugu eqqartunneqassaaq allatigut inuup allap inuussutissarsiutigalugu akilersilluni imaluunniit akiliinissamik neriorsortilluni pisisumut atoqateqarneranik atornerluisoq.

Soorlu oqaasertalerneratigut ("allatigut") takuneqarsinnaasoq aalajangersagaq imm. 1-itut siunnersuummut, inuit allat akilersilutik atoqateqartarnerannik ingerlatsinermit tunngasumut, naleqqiullugu salliunngilaq.

Aalajangersagaq aammattaaq pinerluttulerinermik inatsimmi § 93-imut, inunnik niuffateqarnermut tunngasumut naleqqiullugu, aamma § 81, imm. 2-tut siunnersuummut, inuup allap 18-it inorlugit ukiullip akilersilluni imaluunniit akiliinissamik neriorsortilluni pisisumik atoqateqarneranut peqataanermut tunngasumut naleqqiullugu salliunngilaq.

Pinerluttulerinermi inatsimmi § 83, imm. 3-p immikkoortuisa pingajuat, inuup allap akilersilluni atoqateqartarnermik inuussutissarsiuteqarneranut tunngasoq, § 83, imm. 1-itut siunnersuummut,

imalunniit § 81, imm. 2-tut siunnersuummut ilagittinneqanngitsoq, aalajangersakkp ingerlateqippaa, aamma iliutsip imarisaanik allannguinnissaq siunertarineqanngilaq.

Aalajangersakkap taamaalilluni inuup allap akilersilluni atoqateqarnermik inuussutissarsiuteqarneranik atornerluineq nangittumik ilagaa. Aamma akilersilluni atoqaternermik inuussutissarsiut saniatigooralugu inuussutissarsiutaasinnaavoq. Akilersilluni atorertartumik 18-it inorlugit ukiulimmik atornerluineq § 81, imm. 2-tut siunnersuutigineqartumut ilaammat oqaatigineqassaaq, taannalu inuussutissarsiutigalugu akilersilluni atorertarnermut aamma inuussutissarsiutigineqanngitsoq akilersilluni atorertarnermut atuuppoq.

”Atornerluineq ” allannguteqanngitsumik paasineqassaaq tassaasoq akilersilluni atoqateqartartup isertitaasa ilaannik ataavartumik tunniusseqqittarnissamut akilersilluni atoqateqartartumik sunniiniarnertut, naak tiguisoq inatsisitigut nalinginnaasumillunniit tamatumunnga piunaqaateqarsinnaanngikkaluortoq. Taamatut sunniineq pisut tunngavigalugit pisinnaavoq oqaasertaqanngitsumik, kisianni akilersilluni atoqateqartartup isertitaasa ilaannik qisuariartitaqanngilluinnartumik tiguisinera pinerluttunngortitsinermit ilagittinneqanngilaq. Atornerluineq aamma piussaag imaassimappat akilersilluni atoqateqartartup akiligassani allat akiliutigisartagaannit imaluunniit nalinginnaasutut pissusissamisoortutullu isigineqarsinnaasumit akisunerujussuanngorlugit akilertarpagit. Assersuutitut taaneqarsinnaapput ininik akisunaarlugit atukkiussineq.

Pinngitsaaliisoqarsimanngippat, peqquserluttuqarsimanngippat allatullunniit pissusissaanngitsumik sunniiniartoqarsimanngippat akilersilluni atorertartup pilersorneqarnermut ikiuuttarnera inatsisinik unioqqutitsinerussanngilaq, akilersilluni atorertartup pineqartup inatsisitigut pisussaaffigalugu akiliuttariaqagaanut, (katissimasamut qitornanullu), imaluunniit nalinginnaasumik paasinineq malillugu pisussaaffinnik atuuttoqartillugu (soorlu inooqammut, angajoqqaanut qatanngutinullunniit pissutsit erseqqinnerusut apeqqutaatillugit) pissusissamisoortumik pisussaaffiugaangat.

Allat akilersillutik atoqateqarnerannik suliffiuteqarnek pillugu imm. 1-itut siunnersuummut, aamma imm. 2-tut siunnersuummi pineqartut siullianni pineqartumut sanilligu aalajangersagaq pingaaruteqannginneruvoq.

Aalajangersagaq aamma pinnerluttulerinermik inatsimmi § 93-imut, inunnik niuruteqarnermut tunngasumut, aamma § 81, imm. 2-tut siunnersuutigineqartumut, inuup allap 18-it inorlugit ukiullip akilersilluni imaluunniit akilerneqarnissamik neriorsortilluni pisisumik atoqateqarneranut peqataanermit tunngasumut naleqqiullugu salliutinneqanngilaq.

Pinerluttulerinermi inatsimmi § 83, imm. 3-mi oqaaseqatigiinni siullerni allat akilersillutik atorertartuunerannut akunnermiliututut ingerlataqarnermit tunngasoq, § 83, imm. 1-imi, imm. 1-imi oqaaseqatigiinni siullerni imaluunniit § 83, imm. 2-mi oqaaseqatigiinni siullerni, imaluunniit § 81, imm. 2-mi aalajangersagassatut siunnersuutigineqartumi ilaanngitsut aalajangersakkakkut ingerlateqqinneqarput, aamma iliutsip imarisaata allanngortinneqarnissaa siunertarineqanngilaq.

Imm. 3-tut siunnersuut, inimik inuussutissarsiutigalugu akilersilluni atortittarnermut atugassanik attartortitsinermut tunngasukkut, § 83, imm. 4-mi atuuttoq oqaatsitigut nutarsaatitalerlugu ingerlateqqinneqarpoq.

Siunnersuutigineqarpoq ”unnuisarfik” ”akunnittarfik”-mik innersuussutiginnerup sanianiittoq atorunnaarsinneqassasoq, tassa ”unnuisarfik” inatsisiliornermi oqartaatsitut atorunnaarmat aamma nalitsinni nalinginnaasumik oqalunnermi nalinginnaanani, Aammattaaq siunersuutigineqarpoq ”inuussutissarsiutigalugu tiinganikkut kanngunartuliorneq” ”atussallugu inuup allap inuussutissarsiutigalugu akilersilluni akiliinissamillunniit neriorsortilluni pisisumik atoqateqarnissaanik ”-mik kingoraarserneqassasoq. Aalajangersakkami iliuitsip imarisaanik allanguinissaq siunertarineqanngilaq.

Pinngitsaaliineq, pakasaaneq allatullunniit periaaseq assuarnartoq atorineqarsimanngipaat, assersuutigalugu akilersilluni atortittartup inooqataata akilersilluni atortittartumit pilersugaanera imaluunniit akilersilluni atortittartup najugaqatiginagu aappaata nalinginnaasunik tunissutisisarnera inatsisinik unioqutitsinerussanngillat.

Pisuni killissaaniittuni illuatungeriit akornanni pissutsit nalilerneqarnerat tunngavigineqassaaq, akilersilluni atortittartup inummut allamut aningaasaqarnikkut iluaqusiinera naammaginartumik tunngaveqarnersoq imaluunniit tiguisup tungaanit atornerluinerunersoq. Tamatumunnga atatillugu aamma oqaatigineqassaaq piaaraluneernissaq aalajangersakkami piumasaqaataammat, aamma aningaasaqarnikkut iluaquserneqarneq tunniussisup akiliisitsilluni atortittartuuneranit aningaasalersugaanersoq.

Imm. 2-tut siunnersuutigineqartumi oqaaseqatigiit aappaat malillugu inuk inuup allap akilersilluni imaluunniit akilerneqarnissamik neriorsorneqarluni atortittarneranik siuarsaasoq, taamatullu iliornermigut iluanaarniuteqartoq imaluunniit arlaleriarluni akunnermiliuttuusimasoq eqqartuunneqassaaq.

Imm. 4-tut siunnersuutaasoq malillugu inuk uukapaatitaanermik inatsisinik unioqutitsisumik saqqummersitsisoq, sakkortusisitsisoq imaluunniit atornerluisoq, imaluunniit pissusissaanngitsumik periuseqarluni allap akilersilluni imaluunniit akilerneqarnissamik neriorsortilluni pisisartumik kinguaassiuutitigut atoqartitsisoq eqqartuunneqassaaq.

Aalajangersakkap nutartikkatut ilusilikkamik ingerlateqqippaa § 83, imm. 1, nr. 1 attuuttuusoq, akilersilluni atortinnissaanut ataavartitsineq.

Aalajangersagaq pinerluttulerinermik inatsimmi § 93-imut, inunnik niuffateqarnermut tunngasumut, naleqqiullugu aamma § 81, imm. 2-mi siunnersuutigineqartumut, inuup 18-it inorlugit ukiullip akilersilluni imalunnit akiliinissamik neriorsortilluni pisisumik atoqateqarneranut tunngasumut naleqqiullugu salliunngilaq. Aalajangersagaq taamaattumik pisut tungavigalugit atuutissaaq inunnut 18 sinnerlugit ukiulinnut pisuni tamatumani pineqanngitsoq pineqartup atornerlunnissaa.

Aalajangersagaq tunngavoq inummut peqquserlulluni imaluunniit allatut assuarnartumik pissuseqarluni inuup allap akilersilluni imaluunniit akiliinissamik neriorsortilluni atoqateqarnissaanut pisinnaalersitsisumut. Iliuutsimi pinnguutit ”inatsisit uniorlugit saqqummersitsineq, qularunnarsitsineq imaluunniit pakasaanermik atornerluineq” aamma periaaseq assuarnarteq alla” - inunnik niuffateqarneq pillugu aalajangersakkap immikkoortuatut siullertulli, tak. pinnerluttulerinermik inatsimmi § 93, imm. 1, nr. 4 aamma 5.

Aalajangersakkamut ilagitinneqangillat ”§ 91-imi inatsisit uniorlugit pinngitsaaliineq”, ”§ 92, imm. 1 malillugu kiffaangissusiaaneq”, imalunniit ”§ 98 malillugu qunusaarinerit”, pinnerluttulerinermik inatsimmi § 93, imm. 1, nr. 1- 3 mit. Arlaat atoqateqarneq sunaluunniit pisinnaalersinniarlugu inatsisit uniorlugit pinngitsaaliineq atorneqassappat, eqqartuussisoqarsinnaavoq pinngitsaaliilluni atoqateqarnermik § 77 malillugu. Arlalitsigut tamanna atuutissaartaaq kiffaangissusiaaneq imaluunniit qunusaarineq pinnerluttulerinermi inatsimmi § 98-imi taaneqartutuut atoqateqarneq pisinnaalersillugu (pissutigalugu tamanna arlalitsigut tassaasarmat inatsisinik uniuilluni pinngitsaaliineq).

§ 83, imm. 1, nr. 2-mi aalajangersagaq atuuttoq, iluanaarnissamik siunertalimmik akilersilluni atortitartitsiniarneq imalunniit akilersilluni atortittarnermik inuussutissarsiortunik allanik pinaveersimatitsiniarneq, unitsitsiniarluni, ingerlateqqinneqanngilaq.

Aalajangersakkap immikkoortua siulleq – iluanaarnissamik siunertalimmik akilersilluni atortitartitsiniarneq – tamarmiulluni pinnerluttulerinermik inatsisip § 93-ianut, inunnik niuffateqarnermut tunngasunit, ilagilivissinneqarsimavoq, taamalu inatsisit atuuttut tunngavigalugit atuuffeeruteerluni.

Aalajangersakkap immikkoortuata aappaa – iluanaarnissamik siunertaqarluni akilersilluni atortittarnermik inuussutissarsiummik ingerlatsisumik pinaveersimatitsiniarneq, unitsitsiniarlugu – pinnerluttulerinermik inatsimmi § 93-imut, inunnik niuffateqarnermut tunngasumut, ilagilivissinneqarsimasutut isigisariaqarlersimasoq. Tamanna pisut uniorlugit periassappat, inuup ataatsip assuarnartumik pissusilimmik akilersilluni atoqateqartarnermik inuussutissarsiutaanik pinaveersima-titsineq, taanna pineqartoq akilersilluni atortittartumik pissarsisimanngitsoq, angallassisimanngitsoq, nuutsitsisimanngitsoq najugaqartitsisimanngitsoq imaluunniit, kingusinnerusukkut akilersilluni atoqateqartartumik tikisitsisimasoq (imaluunniit taamatut iliornermut peqataasimanngitsoq, tak. pinnerluttulerinermik inatsimmi § 13), pissuseq pineqartoq nangittumik pillaatissiissutigineqar-tussaavoq, § 83, imm. 1-itut siunnersuutigineqartoq malillugu, inuit allat akilersillutik atortittarne-rannik ingerlatami ingerlatsineq pillugu, imaluunniit § 83, imm. 2, imm. 1, inuup allap inuussutissarsiutigalugu akilersilluni atortittarnermik inuussutissarsiutilimmik allatigut atornerluineq.

§ 83, imm. 2, atuuttoq, kaammattuineq inuup 21-t ataallugit ukiullip akilersilluni atortittarnissamik il.il. noqqaanissaanik, ingerlateqqinneqanngilaq.

MAalajangersakkap immikkoortua siulleq - inummik 21-t inorlugit ukiulimmik akilersilluni

atortittartutut inuussutissarsiuteqarnissamik il.il. kaammattuinnermut tunngasoq – eqqarsaatigalugu inummik 18-it inorlugit ukiulimmik atortittartutut inuussutissarsiuteqarnissamik kaammattuineq ikiuinerluunniit § 81, imm. 2-tut siunnersuutigineqartumut, inuup 18-it inorlugit ukiullip akilersilluni imaluunniit akiliinissamik neriorsortilluni pisisumik kujanninneranut peqataanermut tunngasoq, ilagitinneqalissaaq. Taamatut 18-iniit 20-nut ukiulimmik kaammattuineq ikiuinerluunniit akerlianik siunissami pinerlunnerujunnaassaaq, imaassimappat pineqanngitsoq allat akilersilutik atortittar-nerannik ingerlatsivimmi ingerlatsinissaq (§ 83, imm. 1-itut siunnersuut), allatigut inuup allap akilersilluni atoqateqartarnermik inuussutissarsiutaanik imaluunniit akilersilluni atortittartuunermi akunnermiliuttuuneranik atornerluineq (§ 83, imm. 2-mi siunnersuut) imaluunniit assuarnartumik sunniuteqarneq (§ 83, imm. 4-mi siunnersuut). Siunnersuutip taamaalilluni ilagaa siunissami malittarisassat assigiit atuutissasut 18-init 20-nut ukiulinnut taamatulli 21-t sinnerlugit ukiulinnut.

Aalajangersakkap immikkoortuata aappaa eqqarsaatigalugu – inummik 21-t inorlugit ukiulimmik akilersilluni atortittartuutitsilernissaq siunertaralugu Kalaallit Nunaannit angallassinermut peqataaneq – tassa taamatut inummik 18-it inorlugit ukiulimmik angallassineq inatsisitigut atuutereerpoq pinerluttulerinermik inatsimmi § 93, imm. 2-mut, inummik 18-it inorlugit ukiulimmik inummik niuffateqarnermut tunngasumut, ilaalluni. Taamatut 18-20-nik ukiulimmik angallassinermut peqataaneq akerlianik pillaatissutaasussaangilaq, imaassimangippat assuarnartumik sunniineq pineqarsimasoq (tak. § 93, imm. 1, inunnik niuffateqarneq pillugu). Siunnersuutip taamaalilluni ilagaa siunissami malittarisassat assigiit atuutissasut 18-20-nut ukiulinnut taamatullu 21-t sinnerlugit ukiulinnut.

Aalajangerskkap immikkoortuisa pingajuat – inummik siunertamut sianigisaqanngitsumik akilersilluni atortittartuulernissaq siunertaralugu Kalaallit Nunaannit angallassinermut peqataaneq – pineluttulerinermik inatsimmi § 93-imut, inunnik niuffateqarnermut tunngasumut, ilagitilivinneqarsimavoq, taamalu inatsisit atuuttut malillugit atuuffeerutereerluni.

Tamatuma saniatigut inatsisissatut siunnersuummut oqaaseqaatini nalinginnaasuni imm. 8.2 innersuussutigineqarpoq.

Nr. 16-imut

Pinerluttulerinermi inatsimmi § 84, imm. 1 malillugu kinaluunnii kannguttaalliorluni iliuuseqarluni kannguttaalliorfiginnittoq imaluunniit inunnik mamiatsitsisoq eqqartuunneqassaaq.

Siunnersuutigineqarpoq pinerluttulerinermik inatsimmi § 84, imm. 1, kanngutaalliorfigisaanermut tunngasoq, pisariillisarneqassasoq oqaasertatigullu nutarsaavigineqarluni. Taamalilluni siunnersuuti-gineqarpoq ”kannguttaalliorluni atoqateqarneq” allangussasoq imaalilluni ”kanngunartuliorluni atoqateqarneq aamma ”imaluunniit tamanik mamiatsatsitsisoq” aalajangersakkap imm. 1-ianit peerneqassasoq. Aalajangersakkami iliuutsip imarisaata

allangortinnissaa siunniussaangilaq.

Allatigut oqaatigineqarpoq siunnersuuut pinerluttulerinermik inatsimmi § 77-imi pinngitsaaliilluni atoqateqarnermik aalajangersagaq annertusineqassassasoq, ilagilerlugu inummik imatut *inissimasumik* pineqartoq iliuitsimut akerliliisinnaanani, kujanninneq imaluunniit allatut atoqateqarneq (tak. inatsisissatut siunnersuummi § 1, nr. 5) kinguneqartoq pissutsit taama ittut § 84, imm. 1-imut ilagittinneqarsinnaajunnaarlutik.

Tamatuma saniatigut inatsisissatut siunnersuummut oqaaseqaatini nalinginnaasuni imm. 9.2 innersuussutigineqarpoq.

Nr. 17-imut

Pinerluttulerinermi inatsimmi § 85-imi meeqqanik pornografiimut tunngasumi inunnik 18-it inorlugit ukiulinnik inuunerlunnermik assilisanik il.il. siaruarterinermut il.il. atatillugu iliuitsit arlaqartut pinerluutinngortinneqarput.

Oqaatsitigut nutarsaasoqarnissaa siunnersuutigineqarpoq, taamaalilluni § 85, imm. 1, 2 aamma 4-mi "inuunerlunneq" "pornografiimik" taarserneqassalluni. Aalajangersakkami iliuitsip imarisaata allangortinnissaa siunniussaangilaq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 10.2 innersuussutigineqarpoq.

Nr. 19-imut

Siunnersuutigineqarpoq pinerluttulerinermik inatsimmi § 85, imm. 3, meeqqat 15-it sinnerlugit ukiullip assinginik kinguaassiutitigut inuunerunnermut tunngasunik pigisaqartoq, pineqartoq pigisaqartoqarnissanut akuersisimappat, aalajangersakkamut ilaannginneranut tunngasoq nutaamik oqaasertalersorneqassasoq.

Oqaasertalersuinissamik siunnersuutikkut ersersinneqarpoq ilaatitsinnginnermut imm. 1-imi aamma 2-mi inerteqqutit assigisaat pineqartut, tassalu assit, filmit assigisaalluunniit pornografiusut. Ilaatitsinnginnermulli inummik piunngitsumik 18-it inorlugit ukiulimmik takusassiat pornografiunngitsut nangittumik ilaanngillat.

Oqarnermi "pornografiusut" ilaatigut siunniunneqarput assilisat, filmit imaluunniit taaku assigisaat takutitsisoq meeqqamik atoqatigiinnermik peqataasulik, imaluunniit meeqqamik assiliinerani allatigut ilimagineqartoq pisoqarsimasoq annertuumik narrunarsaanertut iliuitsimik, s.i. meeraq kinguaassiutinik imaluunniit atoqateqarnermut assingumik attuuaanermi assiliinerani assilisittutut

atorlugu. Meeqqanik mattaangasunik assit nalinginnasut, soorlu sissami pinnguartunik, aalajangersakkatut siunnersuumi pineqartut avataaniipput.

Aamma oqaasertaliissutitut siunnersuummi nalunaarneqarpoq ilaannginneq taamaallaat atuuttoq, pineqartup piginnittuuneq akuerisimappagu. Tamatumaniippoq ilaatigut piginnittunermik akuersineq qaquguluunniit utertinneqarsinnaasoq imatut kingunilimmik nangittumik piginnittuuneq pinerluttulerinermik inatsimmi § 85, imm. 2-mi inerteqqummut ilagitinneqassammat.

Piaarineq piumasarineqarmat, siornatigut akuersisimanermik utertitsinerup kingorna inatsisitigut akisussaannermi piumasarineqarpoq pinerluttoq piaarisimasoq pineqartillugu akuersinerup utertinnera. Naak akuersineq tunngaviatigut nipaatumik utertinneqarsinnaaaluartoq, uppersaatis-siinissaq tunngavigalugu pisuni pineqarsinnaavoq eqqartuussut, imaassimappat akuersineq erseqqissumik utertinneqarsimasoq. Tamanna aamma atuuppoq peerariinnerup naaneranut tunngasuni, tassunga ilagitillugu najugaqatigiikkunnaarneq, tamatumani nangittumik piginnnnermik inatsisitigut akisussaaneq, assersuutigalugu peerarisimasamik assilisanik filminillunniit pornografiusunik assiliinerup nalaani 15-it aamma 18-illu akornanni ukioqarsimasuni, taamanilu piginninnissamut akuersisimasumut taamaattumik piumasaqaataassaaq, peerarisimasap erseqqissumik pineqartuq qinnuigisimassagaa assiliasat imaluunniit filmit aserorteqqullugit.

Tamatuma saniatigut inatsisissatut siunnersuummut oqaaseqaatini nalinginnaasuni imm. 10.2 innersuussutigineqarpoq.

Nr. 20-mut

Pinerluttulerinermi inatsimmi § 85, imm. 4-mi, pinerluutinngortinneqarpoq inunnik 18-it inorlugit ukiulinnik assiliineq, filmiliorneq assigisaannillu iliorneq kinguaassiuutitigut inuunerlunnermut tunngasunik, assiliasat tuniarnissaat allatulluunniit iliorluni siaruarternissaat siunertaralugu.

Pinerluffigineqartup ukioqqortussisia pillugu mianersuaalliorneq pinerlunninngortinneqassasoq siunnersuutigineqarpoq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 10.2 innersuussutigineqarpoq.

Nr. 21-mut

Pinerluttulerinermi inatsimmi § 93, imm. 1-imi iliuitsit arlaqartut pinerluutinngortinneqarput, soorlu inunnik niueruteqarneq, ilanngullugit pineqartup kinguaassiuutitigut kannunartuliortinneratigut, pinngitsaaliissummik sulisinneratigut, inussiaatigineratigut imaluunniit

inussiaatinut assingusumik atugaqartinneratigut imaluunniit timimi atortuinik piiaanikkut pineqartumik atorneerluinissaq siunertaralugu.

Det samme gælder efter § 93, imm. 2 malillugu inummik 18-it inorlugit ukiulimmik, pineqartup ilaatigut kinguaassiuutitigut kanngunartuliortinneratigut atorneerluinissaq siunertaralugu pissarsinermut, angallassinermut il.il. tunngasumut assigisaa atuuppoq.

Oqaatsitigut nutarsaaviginissaa siunnersuutigineqarpoq, tamaalilluni ”kinguaassiuutitigut kanngunartuliorneq” allangortinneqassasoq imaalillugu ”akilersilluni atortittarneq, assilisanik imaluunniit filminik pornografiusunik assiliineq, pornografiimik takutitsilluni isiginnaartitsineq.” ”akilersilluni atortittar-neq”-mi pineqarpoq pisisumut akilersilluni akiliinissamilluniit neriorsortilluni atoqateqarneq. ”Assilisanik filminillu pornografiusunik assiliineq” paasineqassaaq § 85, imm.4, inummik 18-it inorlugit ukiulimmik assilisanik filminik assigisaannillu assiliinermut tunngasoq naapertorlugu, apequtaatinnagu ”assigisaannillu” § 93-imut ilaatinneqassanngitsoq siunnersuutigineqaraluartoq. ”pornografiimik takutitsinermik isiginnaartitsineq” paasineqassaaq § 82-itut siunnersuutigine-qartumi, inuup 18-it inorlugit ukiullip pornografiimik takutitsinermi isiginnaartitsinermut ilaananermut peqataanermut taassumunnga najuinerlut tunngasumi, oqaatigineqartutulli.

§ 83, imm. 1-imut, allat akilersillutik atortittarnerannut tunngasumut (inatsisissatut siunnersuummi § 1, nr. 15) oqaaseqarfiginnissutini taaneqartutut sammiveqatigalugit kinguneruvoq illersuinissamik soqutigisaaq inunnik niuffateqarnermik aalajangersakkap isumagisassaa – tassa pilliutaalersinnaasut inunnik niuffateqarnermut illersussallugit – inuk akilersilluni atortittarnermut atorneerlugaasoq aallaavigalugu eqqartunneqassanngimmat inunnik niuffateqarnermut peqataasutut akilersilluni atortittarnermik ingerlassami ikiuunnini pissutigalugu, assersuutigalugu oqarasuaatinik saaffiginittarfimmillunniit nakkutilliinikkut, pisiniarnikkut, nerisassiornikkut, eqqiaanikkut il.il. Taamaallaat akilersilluni atortittartoq pissarsiornermi, angallassinermi, nuutsitsinermi najugaqartitsinermi imaluunniit inummik tigusinermi pisuni aalajangersakkami taaneqartutut, peqataanermut pillagaanissaq eqartorneqarsinnaavoq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 11.2 innersuussutigineqarpoq.

§ 2-mut

Kalaallit Nunaanni eqqartuussisarnermik inatsimmi § 333 naapertorlugu pinerluttulerinermi inatsimmik unioqqutitsinermi innarligaasup qinnuteqarneratigut illersuisumik ivertitsisoqarsinnaavoq. Aalajangersakkami pinerluttulerinermi inatsimmi § 93, inunnik niuffateqarnermut tunngasoq taaneqanngilaq.

Aalajangersakkap annertusineqarnissaa siunnersuutigineqarpoq, taamaasilluni inunnik niuffateqarneq pillugu pinerluttulerinermi inatsimmi § 93-imik unioqqutitsinermik suliani innarligaasumut illersuisumik ivertitsinissaq periarfissaalissaaq, pineqartup tamanna qinnuteqaatigippagu. Suliaq ilungersunanginnerusuuppat, imaluunniit illersuisumik ivertitsinissaq erseqqissumik pisariaqanngitsutut isigineqarsinnaappat, illersuisumik ivertitsinissamik qinnuteqaat eqqartuussivimmit itigartinneqarsinnaavoq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 12.2 innersuussutigineqarpoq.

§ 3-mut

Inatsit ulloq [...] atuutilissasoq siunnersuutigineqarpoq.

Inatsisissatut siunnersuut inatsimmut atuuttumut sanilliullugu

Oqaasertaliineq atuuttoq

Inatsisissatut siunnersuut

§ 1

Kalaallit Nunaanni pinerluttulerinermi inatsimmi, inatsit nr. 306, 30. april 2008-meersumi, inatsit nr. 735, 25. juni 2014-meersumi § 1-ikkut, inatsit nr.103, 3. februar 2016-meersumi § 4-kkut aamma inatsit nr. 149, 7. februar 2017-meersumi § 2-kkut allanguuteqarsimasumi tulliuttunik allannguisoqassaaq:

1. Inatsimmi tamarmi ”kujanneq imaluunniit kinguaassiuutitigut allatut pissusilersorneq” imatut allanngussaaq: ”kujanneq imaluunniit allatut atoqateqarneq”.

§ 74. Ilaquttatut qanigilluinnakkamik atoqateqarnermut eqqartuunneqassaaq kinaluunniit kinguaamigut qanigisaminik imaluunniit qatannгимminik kujannittoq allatulluunniit atoqateqartoq.

2. § 74-imi *imm.* 2-tut ivertinneqassaaq: ”Kinguaarisatut ilaqutarisamik kujanninneq imaluunniit allatut atoqateqarneq pineqartillugu nallersuunneqassaaq aqatigisamik ilaqutariinnermi qitornavissiamut.”

§ 77. Pinngitsaaliilluni

atoqateqarnermut
eqqartuunneqassaaq kinaluunniit

1) nakuuserluni imaluunniit
nakuusernissaq siorasaarutigalugu
pinngitsaaliilluni kujannittoq
allatulluunniit kinguaassiuutitigut
atoqatiginnittoq

2) inummik katissimanngisaminik
iliuutsimut
akerlileeriarinnaangitsumik
kujannittoq allatulluunniit
kinguaassiuutitigut
atoqatiginnittoq.

Imm. 2. Taamatuttaaq
pineqassaaq kinaluunniit, iliuuseq
imm. 1-imut
ilaatinneqarsinnaangikkaluartoq,
unioqqutitsilluni pinngitsaaliilluni
kujannittoq allatulluunniit
kinguaassiuutitigut
atoqatiginnittoq.

§ 78. Kinguaassiuutitigut
atornerluinermut
eqqartuunneqassaaq kinaluunniit
inuup niaqulaarnera imaluunniit
eqqarsartaatsimigut
innarluuteqarnera atornerlullugu
pineqartumik
katissimanngisaminik kujannittoq
allatulluunniit kinguaassiuutitigut

3. § 77, imm. 1, nr. 1 -imi ”kujannittoq
allatulluunniit kinguaassiuutitigut
atoqatiginnittoq” allanngussaaq
imatut: ”allatut atoqateqartoq”,

4. § 77, imm. 1, nr. 2-mi
peerneqassaaq ”katissimanngisamut”,

5. § 77, imm. 1, nr. 3-tut
ilanngunneqassaaq”

”3) meeqqamik 12 inorlugit ukiulimmik
kujannittoq allatulluunniit
kinguaassiuutitigut atoqateqartoq”

6. § 77, imm. 2, ”allatulluunniit
kinguaassiuutitigut atoqatiginnittoq”
allanngortinneqassaaq
imatut: ”allatulluunniit atoqatiginnittoq”.

7. § 78, imm. 1-imi
allanngortinneqassaaq ”kinguaassiuutitigut
atornerluineq” imatut ”atoqatigiinnikkut
atornerluineq”
aamma ”katissimanngisaminik
kujannittoq, allatulluunniit
kinguaassiuutitigut atoqatiginnittoq”
allanngortinneqassaaq imatut ”kujannittoq
allatulluunniit atoqateqartoq”,

atoqatiginnittoq.

Imm. 2. Taamatuttaaq
pineqassaaq kinaluunniit inuup
atorfimminik imaluunniit
aningsaatigut
pinngitsuuisinnaannginneranik
atornerluerujussuarluni
katissimanngisaminik kujannittoq
allatulluunniit kinguaassiuutitigut
atoqatiginnittoq.

Imm. 3. Aammattaaq
eqqartuunneqassaaq kinaluunniit
meeqqanut aamma inuusuttunut
angerlarsimaffimmi, tarnimikkut
nappaatilinnut
napparsimmavissuarmi
imaluunniit paaqqinniffimmi
assingusumi atorfeqarluni
nakkutilliisuulluniluunniit
paaqqutarinniffimmiitumik
kujannittoq allatulluunniit
kinguaassiuutitigut
atoqatiginnittoq,

8. § 78, imm. 2-mi ”atorfimminik
imaluunniit aningsaatigut
pinngitsuuisinnaannginneranik ... kujannittoq
allatulluunniit kinguaassiuutitigut
atoqatiginnittoq” allanngortinneqassaaq
imatut” ”sulinikkut, aningsaasaqarnikkut,
imaluunniit katsorsagaanikkut
paaqqutarineqarnikkulluunniit
pinngitsuuisinnaannginneranik ...
kujannittoq allatulluunniit atoqateqartoq”.

9. § 78, imm. 3, imatut
allanngortinneqassaaq:

”*Imm. 3.*

Aammattaaq inuk eqqartuunneqassaaq.

1) Kalaallit Nunaanni
Pinerluuteqarsimasunik
isumaginnittoqarfimmi atorfilik inummik
pinerluttumik nakkutilliiviup inissiisarfia
ilaanni inissisimasumik, taassumangalu
nakkutigineqartussatut inissisimasumik
kujannittoq imaluunniit allatut
atoqateqartoq.

2) inuk politiini atorfilik inummik
kiffaanngissusiagaasimasumik politiinillu
nakkutigineqartumik kujannittoq
imaluunniit allatut atoqateqartoq,
imaluunniit

3) inuk ulloq unnuarlu inissiisarfimmi
imaluunniit meeqqanut inuusuttunullu
najugaqarfimmi, tarnikkut
napparsimasunut immikkoortortami,
inunnut tarnikkut annertuumik
innarluutilinnut ulloq unnuarlu
inissiisarfimmi imaluunniit inissiisarfimmi
assingusumi nakkutilliisutut atorfilik
kujannittoq imaluunniit allatut

atoqateqartoq.”

§ 79. Kinguaassiuutitigut meeqqanik atoqatiginninnermut eqqaartuunneqassaaq kinaluunniit meeqqamik 15-it inorlugit ukiulimmik kujannittoq allatulluunniit kinguaassiuutitigut atoqatiginnittoq, pinerluuteqartup meeqqap ukiui nalusimanngippagit imaluunniit matuma tungaatigut manersuaalliorluni iliorsimalluni.

10. §§ 79 aamma 81-imi ”kinguaassiuutitigut atoqatiginnittoq” allanngortinneqassaaq imatut ”atoqateqartoq”.

11. § 79-imi ”mianersuaalliorluni” allanngortinneqassaaq imaallillugu ”mianersuaalliorluni, imaassimanngippat pissusilersorneq § 77, imm. 1, nr. 3-mut ilagittinneqartoq”

§ 80. Atoqatiginninnissamut saasaarisutut eqqaartuunneqassaaq kinaluunniit ukiumigut misilittakkamigullu inersimanerunerminik peqqarniitsumik atornerluilluni inummik 18-it inorlugit ukiulimmik kujannittoq, pilerluuteqartup nalusimanngippagu pineqartoq qassinik ukioqartoq imaluunniit tamatuma tungaatigut mianersuaalliorluni iliorsimaguni.

Imm. 2. Taamatuttaaq eqqaartuunneqassaaq kinaluunniit inummik 18-it inorlugit ukiulimmik qitornavissiarisaminik, qitornassaminik qitornarsiaminilluunniit imaluunniit imminerminut ilinniaritassanngorsimasumik perorsagassanngorsimasumillu kujannittoq allatulluunniit kinguaassiuutitigut atoqatiginnittoq, pinerluuteqartup

12. § 80, *imm. 2-*mi ”qitornavissiarisaminik” piissaaq.

nalusimangippagu pineqartoq
qassinik ukioqartoq imaluunniit
tamatumata tungaatigut
mianersuaalliorluni iliorsimaguni.

§ 81. Inuusuttumik akiliilluni
atoqateqarnermut
eqqartuunneqassaaq kinaluunniit
akiliiniarluni imaluunniit
akiliinissamik neriorsuilluni
inummiik 18-it inorlugit
ukiulimmik kujannittoq
allatulluunniit kinguaassiuutitigut
atoqatiginnittoq, pinerluuteqartup
nalusimangippagu pineqartoq
qassinik ukioqartoq imaluunniit
tamatumata tungaatigut
mianersuaalliorluni iliorsimaguni.

13. § 81-imi imm. 2-tut
ilanngunneqassaaq:

»*Imm. 2.* Taamattaq eqqartuunneqassaaq
inuk inuup 18-it inorlugit ukiullip
akilersilluni imaluunniit akilersinnissamik
neriorsortilluni pisisumut
atoqateqarneranut peqataasoq, pinerluisup
pineqartup qassinik ukioqarnera
nalunngissimappagu imaluunniit
tamatumata tunngaaticigut
mianersuaalliorluni iliorsimaguni.»

§ 82. Aalajangersakkat §§ 77-81-
imiittut taamatuttaaq
atuutissapput kimulluunniit
suaaassuseqatiminik
kinguaassiuutitigut
atoqatiginnittumut.

14. § 82 imatut allaganngortinneqassaaq:

”**§ 82.** Inummik inuusuttumik
atornerluinertut eqqartuunneqassaaq inuk
inuup 18-it inorlugit ukiullip
pornografiimik takutitassiami
takutitsisutut peqataaneranut peqataasoq
pineqartup pineqartup qassinik
ukioqarnera nalunngissimappagu

imaluunniit tamatuma tungaatigut
mianersuaallioortumik iliorsimaguni.

Imm. 2. Taamatutaaq eqqartuunneqassaaq
inuk takutitassiamik imm. 1-mi
taaneqartumik inuup 18-it inorlugit
ukiullip peqataaffiani isiginnaartutut
najuuttoq.

§ 83. Iluanaarniutigalugu
atortittartuutitsinermut
eqqartuunneqassaaq kinaluunniit

1) peqqusersiorfinnilluni allanik
kinguaassiuutitigut
inuunerloqateqarnikkut
iluanaaruteqartitsiaasoq,

2) iluanaaruteqarnissaq
pissutigalugu
peqqusersiorfinnilluni allanik
kinguaassiuutitigut
inuunerloqateqartitsisoq
imaluunniit kinguaassiuutitigut
inuunerlunnermik
inuussutissarsiateqartup
taamaaliorneranik
soraarussinaveersaaliuisoq,
imaluunniit

3) atortittarfiutilik.

Imm. 2. Taamatutaaq
pineqassaaq kinaluunniit
inumik 21-t inorlugit
ukiulimmik kinguaassiuutitigut
inuunerlunnermik
inuussutissarsiateqarnissamik
kajumissaarisooq ikiuisorluunniit,
aamma kinaluunniit inuup
Kalaallit Nunaanniit aallarneranut
peqataasoq, aallartoq allami
inuunerlunnermik
inuussutissarsiateqassammat
imaluunniit inuunerlunnermut

15. § 83 imatut allaganngortinneqassaaq:

»**§ 83.** Kinaluunniit
atortittartuutittartuutitsinermut
eqqartuunneqassaaq allap akilersilluni
imaluunniit akilerneqarnissamik
neriorsorneqarluni pisisartumik
atoqateqartarneranik suliffimmik
ingerlatsisoq.

Imm. 2. Taamatutaaq pineqassaaq inuk
allap inuussutissarsiuutigalugu akilersilluni
imaluunniit akilerneqarnissamik
neriorsorneqarluni pisisartumik
atoqateqartarneranik atornerluisoq,
imaluunniit allap akilersilluni imaluunniit
akilerneqarnissamik neriorsortilluni
pisisartumik atoqateqartarneranik
iluanaarniutigalugu siuarsaasoq
imaluunniit arlaleriarluni
akunnermuliuttuusarsimasooq.

Imm. 3. Aammattaaq kinaluunniit
eqqartuunneqassaaq akunnittarfimmi
inimik, allap inuussutissarsiuutigalugu
akilersilluni imaluunniit
akilerneqarnissamik neriorsortilluni
pisisartumik atoqateqarneranut
atugassamik.

Imm. 4. Taamatutaaq kinaluunniit
eqqartuunneqassaaq allap
uukapaatitaaneramik inatsisinik
unioqqutitsisumik pilersitsisoq,
sakkortusisitsisoq imaluunniit
atornerluisoq imaluunniit assuarnartumik

taamaattumut atorpeqarpat,
aallartoq 21-t inorlugit ukioqarpat
imaluunniit aallarnermut
siunertaasoq ilisimangippagu.

Imm. 3. Aammattaaq
eqqartuunneqassaaq kinaluunniit
kinguaassiuutitigut
inuunerlunnermik siuarsaasoq
iluanaaruteqarnissaq
pissutigalugu imaluunniit
akuttunngitsumik arlaleriarluni
akunnermiliuttuusartoq
imaluunniit allap
kinguaassiuutitigut
inuunerlunnikkut
inuussutissarsiorneranik
atornerluisoq.

Imm. 4. Taamatuttaaq
pineqassaaq kinaluunniit
akunnittarfinni imaluunniit
unnuisarfinni inimik
attartortitsisoq kinguaassiuutitigut
inuunerlunnikkut
inuussutissarsiuuteqarnermut
atugassamik.

§ 84. Kannguttaalliorlutut
eqqartuunneqassaaq kinaluunniit
kannguttaalliorluni iliuuseqarluni
kannguttaalliorfiginnittoq
imaluunniit mamiatsatsitsisoq.

Imm. 2. ---

§ 85. Pornografiimik meeqqanut
tunngasumik pilersitsinermut
eqqartuunneqassaaq kinaluunniit
18-it inorlugit ukiullit assigninik

periuseqarluni allap akilersilluni
imaluunniit akilerneqarnissamik
neriorsortilluni pisisartumik
atoqateqartarneranik aallartitsisoq.”

16. § 84, *imm. 1*-imi ”kannguttaalliorluni”
allanngortinneqassaaq
imaalillugu: ”kanngunartumik”
aamma ”imaluunniit mamiatsatsitsisoq”
piissaaq.

17. § 85, *imm. 1, 2* aamma 4-
mi ”kinguaassiuutitigut
inuunerlunnermut” allanngortinneqassaaq
imaalillugu: ”pornografiimut”.

imaluunniit filmilianik
assigisaannilluunniit
takusassianik kinguaassiuutitigut
inuunerlunnermut tunngasunik
siaruarterisoq.

Imm. 2. Taamatuttaaq
pineqassaaq kinaluunniit 18-it
inorlugit ukiullit assinginik
kinguaassiuutitigut
inuunerlunnermut tunngasunik
imaluunniit filmilianik
assigisaannilluunniit
takusassianik kinguaassiuutitigut
inuunerlunnermut tunngasunik
pigisaqartoq imaluunniit
akiliilluni takusaqartoq.

Imm. 3. Aalajangersakkamut
imm. 2-miittumut
ilanngunneqanngilaq inuup 15-it
sinnerlugit ukiullip assinginik
kinguaassiuutitigut
inuunerlunnermut tunngasunik
pigisaqartoq, pineqartoq
pigisaqartoqarnissaanut
akuersaarsimappat.

Imm. 4. Aammattaaq
eqqartuunneqassaaq kinaluunniit
inummiik 18-it inorlugit
ukiulimmik assiliisoq,
filmiliortoq assigisaannillu
iliortoq kinguaassiuutitigut
inuunerlunnermut tunngasunik,
assililat tuniniarnissaat
allatulluunniit iliorluni
siaruarternissaat siunertaralugu.

18. § 85, *imm. 2*-mi ”akiliilluni” kingorna
ilanngunneqassaaq ”imaluunniit
internetikkut imaluunniit
atortulersuutikkut assingusukkut
paasissutissanik siammarterivikkut”.

19. § 85, *imm. 3*, imatut
allaganngortinneqassaaq:

”*Imm. 3.* Imm. 2-mi aalajangersakkap
ilaginngilaa inuummiik 15-it inorlugit
ukiulimmik assilisanik, filmilianik
imaluunniit assigisaannik pigisaqarneq,
pineqartup pigisaqarneq
akuersimappagu.”

20. § 85, *imm. 4*-mi ”siunertaralugu”
kingorna ilanngunneqassaaq ”pinerliisup
pineqartup qassinik ukioqarnera
ilisimasimappagu, imaluunniit
tamatumunnga atatillugu
mianersuaalliorsimappat”

§ 93. Inunnik nioqquteqarnermut eqqartuunneqassaaq inunnik katersisoq, angallassisoq, nuutsitsisoq, inisimatitsisoq imaluunniit kingusinnerusukkut tigusaqartoq makkuninnga atuisoqarluni imaluunniit atuisoqarsimalluni

1) § 91 naapertorlugu inatsisit unioqqutillugit pinngitsaaliineq,

2) § 92, oqaaseqatigiit siulliit naapertorlugit kiffaanngissusiaaneq,

3) § 98 naapertorlugu siorasaarineq,

4) paasinerluinermik inatsisinut akerliusumik pilersitsineq, sakkortusaaneq atornerluinerluunniit, imaluunniit

5) allatut ittumik assuarnartumik periuseqarneq

siunertaralugu pineqartumik atornerluinissaq kinguaassiuutitigut kanngunartuliornikkut, pinngitsaaliilluni sulisitsinikkut, inussiaateqarnikkut imaluunniit pissutsitigut inussiaateqarnermut eqqaanartutigut imaluunniit timip atortuinik piiaanikkut pineqartumik atornerluinissaq siunertaralugu.

Imm. 2. Taamatuttaaq pineqassaaq kinaluunniit kinguaassiuutitigut kanngunartuliortitsikkut, pinngitsaaliilluni sulisitsinikkut, inussiaateqarnikkut imaluunniit pissutsitigut inussiaateqarnermut eqqaanartutigut imaluunniit timip atortuinik piiaanikkut

21. § 93, *imm. 1, nr. 5-imi aamma imm. 2-mi* ”kinguaassiuutitigut kanngunartuliorneq” allanngortinneqassaaq imaalillugu: ”akissarsiuutigalugu atortittarneq, pornografiimik assinik filmilianilluunniit pornografiimi takutitassianik assiliineq”.

pineqartumik atorneerluinissaq
siunertaralugu

1) inunnik 18-it inorlugit
ukiulinnik katersisoq,
angallassisoq, nuutsitsisoq,
inisimatitsisoq imaluunniit
kingusinnerusukkut tigusaqartoq,
imaluunniit

2) inuk pinerlineqartumut
oqartussaasoq atorneerluinissamut
akuersisinniarlugu akiliuteqartoq
allamilluunniit iluaqutissiisoq,
aamma kinaluunniit taamatut
akiliummik
iluaqutissiissummilluunniit
allamik pissarsiaqartoq.

§ 2

Kalaallit Nunaanni
eqqartuussisarnermik inatsimmi, tak.
inatsisitut nalunaarut nr. 1581, 13.
december 2016-imeersoq, inatsit nr. 149,
7. februar 2017-imeersumi § 1-ikkut
allanngortinneqartumi, tulliuttumik
allannguisoqassaaq:

§ 333. Nakuusernermut
imaluunniit taamaaliornissamik
qunusaarinnermut tunngatillugu
pinerluttulerinnermi inatsimmi §
37-mik imaluunniit §§ 74-imik,
77-81-imik 84, imm. 1-imik, 86,
imm. 1-imik, tak. 12, 88-89 90,
imm. 3, 92-92 kiisalu 112-imik
unioqquitsineq pillugu suliassani
eqqartuussisut pinerlineqartumiit
noqqaavigineqarnikkut
illersuisumik ivertitsissapput
taassumunnga tapersersuillunilu

**1. § 333, imm. 1-imi ”§§ 91, 92”
allanngortinneqassaaq imaalillugu: ”§§
91-93”.**

ilitsersuisuusussamik,
ivertitsisoqassanngilarli
inatsisinik unioqquitsineq
ilungersunartuunngippat
imaluunniit illersuisumik
ikiortissaqartitsinissaq
pisariaqanngitsutut
isigineqartariaqarpat.
Pinerlineqartoq 15-it inorlugit
ukioqarpat illersuisussamik
ivertitsivigineqarsinnaatitaavoq,
suliassaq pinerluttulerinermi
inatsimmi §§ 74-imut aamma 77-
81-imut tunngasuuppat.

Imm. 2. ---

§ 3

Inatsit ulloq [...] atuutilissaaq